

DAKOTA
WOWAPI WAKAN.
WICOICAGE.

THE
HOLY BIBLE
IN THE
LANGUAGE OF THE DAKOTAS:

TRANSLATED OUT OF
THE ORIGINAL TONGUES;

BY THOMAS S. WILLIAMSON AND STEPHEN R. RIGGS, MISSIONARIES

AMERICAN BIBLE SOCIETY,
INSTITUTED IN THE YEAR 1816,
NEW YORK.

1919

WICOICAGE.

WICOWOYAKE 1.

- 1 Otokahe ekta Wakantanka maḥpiya kin maka kin ahna kaga.
- 2 Unkan maka kin tanton śni, qa takudan ohnaka śni, qa otpaza ośbe kin akan wanke ça, Wakantanka Taniya kin mini kin aman.
- 3 Unkan Wakantanka, Ojanjan kta, eya. Unkan ojanjan.
- 4 Unkan ojanjan wanke cin, he Wakantanka wašte e wanhdake ça, Wakantanka ojanjan kin otpaze cin kici yukinukan ehnaka.
- 5 Qa Wakantanka ojanjan kin, Anpetu eciya, otpaze cin is, Hanyetu eciya. Unkan ohtayetu, qa ohanhanna he anpetu tokaheya kin hee.
- 6 Unkan, Okotonyan wanke kte, mini kin okitahedan, qa mini kin mini kin yukinukan kte, Wakantanka eya.
- 7 Unkan okotonyan kin Wakantanka kage ça, mini okotonyan kuyatanhan kin, qa mini okotonyan akantanhan kin kici yukinukan. Unkan ecetu.
- 8 Unkan okotonyan kin he Wakantanka, Maḥpiya eciya. Unkan ohtayetu, qa ohanhanna anpetu icinonpa kin hee
- 9 Unkan, Maḥpiya kin ihukuya mini wanke cin icunonpa kawitaya kte, ça taku puze cin taninyan wanke kte, Wakantanka eya. Unkan ecetu.
- 10 Unkan taku puze cin he Wakantanka, Maka eciye ça, mini kiwitaya kin he, Miniwanca eciya, qa he Wakantanka wašte e wanhdaka.
- 11 Hehan Wakantanka heya, Maka kin wato icaḥye kte, peji kin he su icaḥye kte, waskuyeca can kin he waskuyeca icaḥye kte, waskuyeca mahen su yuke kte, ocaje otoyohi su kin icaḥye kta, maka akan, Wakantanka eya. Unkan ecetu.
- 12 Unkan maka kin wato aicaga, peji kin ocaje otoyohi su aicage ça, can kin waskuyeca aicaga otoyohi mahen su kin yukan ece. Unkan he wašte e Wakantanka wanhdaka.
- 13 Unkan ohtayetu, qa ohanhanna he anpetu iciyamni kin hee.
- 14 Unkan Wakantanka heya, Maḥpiya okotonyan kin ekta taku iyoyanpa yuke kte, on anpetu hanyetu kici yukinukanyan un kte ça, heon woyaka

unpi kte, makoncage, anpetu, omaka, henakiya.

15 Qa maḥpiya okotonyan kin ekta hena iyoyanpa un kte, maka kin iyoyam ye kte, eya. Unkan ecetu.

16 Wakantanka wiyyoyanpa nom tankinyanyan kaga, tuka uman iyotan tanka kin he anpetu en ounye kte ɕa uman aoptetu kin he hanyetu en ounye kte ; wicanhpi nakun.

17 Hena maḥpiya okotonyan kin ekta Wakantanka ehnaka, maka kin iyojanjan kta e *hecon*.

18 Anpetu hanyetu ko ohinniyan ounye wicakiya, qa ojanjan kin otpaze cin kici yukinukanyan ounye kiya. Unkan he wašte e Wakantanka wanhdaka.

19 Unkan ohtayetu, qa ohanhanna he anpetu icitopa kin hee.

20 Unkan Wakantanka heya, Mini kin taku niyake ota icahye kta, qa taku kinyan maka kin iwankam maḥpiya okotonyan kin ohna okinyanpi kte.

21 Hecen Wakantanka hogan tankinyanyan oicahye, ɕa taku niyake, taku mini oicage cin ocaje hiyeye cin owasin, hena mini icahkiye ɕa, taku kinyan hupahu tonyan ocaje otoiyohi. Unkan he Wakantanka wašte e wanhdaka.

22 Hena Wakantanka yawašte qa hecen ewicakiya, Icagapi qa ihduotapo, qa miniwanca kin ojudan yakonpo, qa taku kinye cin maka akan ihduotapi kte.

23 Unkan ohtayetu, qa ohanhanna he anpetu icizaptan kin hee.

24 Hehan Wakantanka heya, Maka kin taku niyake oicage cin iyecen icahye kte ; woteca, watutka, wamanica, henakiya ocaje otoiyohi, *eya*. Unkan ecetu.

25 Hecen wamanica ocaje otoiyohi, woteca ocaje otoiyohi, qa taku maka asdohan owasin ocaje otoiyohi, henakiya Wakantanka wicakage, ɕa he wašte e Wakantanka wanhdaka.

26 Hehan Wakantanka hecen eya, Unkiye iyeuncecapi qa ouncage unkitawapi kin en wicašta unkgapi kta, qa miniwanca ekta hogan oicage cin wicayuhe kte, maḥpiya ekta taku kinye cin nakun, qa woteca qa maka kin ocowasin, qa watutka taku maka akan sdohan, ocaje owasin yuhe kta.

27 Wakantanka eyaya iye iyececa wicašta wan kaga, Wakantanka ouncage iyececa kaga ; wica winyan kici wicakaga.

28 Qa Wakantanka wicayawašte qa, Icagapi, qa ihduotapo, qa maka kin ojudan iciyapo, qa denakiya wicayuha yaunpi kta, miniwanca ekta hogan oicage, ɕa maḥpiya ekta taku kinye cin, qa taku niyake maka aškanškan oicage cin owasin, tawa wicaya po ; Wakantanka ewicakiya.

29 Unkan, Ito taku maka akan waicahya suton wojupi owasin ciɕupi, can

waskuyeca suton oicage cin owasin, hena nakun ; hena woyute yayapi kta.
30 Tuka taku maka akan ni un kin, mahpiya taku okinye cin, qa taku maka askanskan kin, taku niya un kin owasin, hena peji wato owasin woyute wicawaqu, Wakantanka eya. Unkan ecetu.
31 Unkan Wakantanka taku kage cin owasin wanhdaka ; unkan iyotan wašte. Unkan ohtayetu qa ohanhanna he anpetu icišakpe kin hee.

WICOWOYAKE 2.

- 1 Hecen mahpiya kin maka kin iyahna, qa taku ohnaka hiyeye cin owasin tanyan yuŝtanpi.
- 2 Unkan anpetu icišakowin, Wakantanka tohtani kage cin owasin ayuŝtan, qa anpetu icišakowin kin en tohtani kage ciqon etanhan okihpa.
- 3 Qa Wakantanka anpetu icišakowin kin he hdawašte, qa hduwakan. Tohtani Wakantanka kage cin owasin anpetu kin he en ayuŝtan, qa okihpa, heon etanhan.
- 4 Mahpiya maka ko kagapi kin, Jehowa Wakantanka maka mahpiya ko kage cin, anpetu kin he en, woicage oyakapi kin dee.
- 5 Can hiyeye cin owasin maka kin en he ŝni itokam, peji tinta oicage cin owasin uye ŝni itokam, Jehowa Wakantanka nahahin maka kin amagaju ye ŝni, qa wicašta maka kicanye kte cin wanica.
- 6 Qa maka kin etanhan po wankantkiya u, qa maka itohnake kin owancaya acuya.
- 7 Hehan Jehowa Wakantanka, maka mdu kin etanhan, wicašta wan kage, ça poge ohdoka ohna ipoh iyeya hecen wicašta nagi ni un kin icaga.
- 8 Unkan Jehowa Wakantanka, Eden heciya wihinanpe cin ekta, wojupi wan kage ça wicašta kin he en ehnaka.
- 9 Qa Jehowa Wakantanka can kin owasin tona owanyag wašte, qa tona woyute wašte aicage cin, maka kin etanhan icaħya, qa wojupi kin cokaya, can wiconi wan kage ça, can wan on taku wašte taku ŝica ko sdonyapi kin he nakun en icaħya.
- 10 Unkan can wojupi kin hpan ye kta e, watpa wan Eden etanhan uye ça hetanhan ointpa tom icaga.
- 11 Ointpa tokaheya kin Piŝon eciyapi ; he Hawila makoce kin owancaya ohomniya.
- 12 Heciya mazaskazi yuke, ça mazaskazi makoce kin he en iyeyapi kin he wašte. Heciya Bedola, qa iħe wicašake iyececa.
- 13 Watpa inonpa Giħon eciyapi ; he Kuŝ makoce kin ohna iyaya.
- 14 Qa watpa iyamni kin Hedeqel eciyapi ; he Aŝur makoce kin

wiyohiyanpata kiya kaduza. Qa watpa itopa kin Yuphrate hee.

15 Unkan Jehowa Wakantanka Adam icu, qa Eden wojupi kin he kicanye ça awanyake kta e, en *ehnaka*.

16 Qa Jehowa Wakantanka wicašta kin hecen eciya, Can wojupi kin owasin etanhan icakiš iciye šni yate kta.

17 Tuka can wan, taku wašte taku šica ko on sdonyapi kin de etanhan yate kte šni ; tohan hetanhan yate cinhan anpetu kin he en nište kta.

18 Hehan Jehowa Wakantanka, Wicašta kin de išnana un kin he šica, wanji iye iyececa wecage kta, eya.

19 Wanna Jehowa Wakantanka, maka kin etanhan tinta wamanica owasin wicakaga, maħpiya *etkiya* taku kinye cin ko owasin, qa Adam en u wicakiya, token caš wicaton kte cin sdonye kta e heon. Unkan token Adam owasin caš wicaton, hecen taku ni un kin otoiyohi caje wicayatapi.

20 Hecen Adam woteca owasin caš wicakiton, maħpiya ektakiya taku kinye cin ko owasin, tinta wamanica nakun owasin ; tuka Adam ookiye iye iyececa wanjidan iyeyapi šni.

21 Unkan Jehowa Wakantanka woštima tanka wan Adam ahinhpaye ya, unkan ištima. Unkan Wakantanka cutuhu kin wanji yujon icu, qa conica kin ecen paohduta iyeya.

22 Qa Jehowa Wakantanka cutuhu kin, wicašta etanhan icu qon on winyan wan kage, ça wicašta kin en kai.

23 Unkan, Miħu kin etanhan de hu ye ça, miceħpi kin etanhan ceħpi ya. De wicašta kin etanhan icupi kin, heon de winohinca eciyapi kta, Adam eya.

24 He etanhan wicašta atkuku hunku kici awicayuštan, qa tawicu kin en ikoyag ičiye kta, hecen ceħpi wanjipidan kta.

25 He ehan Adam tawicu kici napin oge ičiton šni yakonpi ; tuka ištecapi šni.

WICOWOYAKE 3.

1 Wanna wamanica hiyeye cin owasin Jehowa Wakantanka wicakage cin, wamduška kin hecedan ksapa : qa wamduška kin winyan kin heciya, Can wojupi kin en can otoiyohi etanhan yatapi kte šni awicakehan Wakantanka eya he ?

2 Unkan winyan kin wamduška kin heciya, Can wojupi en can waskuyeca aicage cin hena untapi kta ce.

3 Tuka can wanjidan wojupi cokaya he cin, he taku aicage cin hecedan, Ihnuhan yatapi qa odutanpi kin, hecanonpi kinhan niťapi kta ce, Wakantanka eya ce.

- 4 Unkan wamduška kin winohinca kin hecen eciya, Niṭapi kte śni tuka heya ce ;
- 5 Anpetu kin en he yatapi kinhan niś eya išta nimdezapi, qa Taku wakan iyenicecapi, taku wašte taku śica ko sdonyayapi kte cin he Wakantanka sdonya, he etanhan heya ce.
- 6 Unkan can kin waskuyeca woyute wašte, owanyag wašte, qa wicimdeza ksam wicaye kte cin he, winohinca wanyake çehan waskuyeca kin icu, qa yute ça hihnaku kin qu, qa iś eya yuta.
- 7 Unkan napin išta mdezapi, qa tancodan yakonpi kin, hehan sdonkiciyapi, qa suken can ape heca kagegepi, qa on oge içitonpi.
- 8 Unkan anpetu kin cusni hehan, Jehowa Wakantanka ho kin wojupi kin ohna mani kin he nahonpi, qa Wakantanka itohnake kin etanhan wojupi can kin ehna naiçihmanpi.
- 9 Hehan Jehowa Wakantanka Adam kipan, qa heciya, Tukten yaun he ?
- 10 Unkan Adam ayupte ça, Niho kin nawahon qa kowakipe ça namiçihbe, tancodan waun kin heon etanhan, eya.
- 11 Unkan tancodan yaun kin tuwe oniciyaka he ? Can wanjidan etanhan yute śni ciśi qon, hetanhan yata he ? eya.
- 12 Unkan Adam heya, Winohinca mayaqu hee, qa mici un kin, iye can kin etanhan maqu, qa wata ce.
- 13 Unkan Jehowa Wakantanka winohinca kin heciya, Tokeca hecanon he ? Unkan, Wamduška kin mahnaye ça wata ce, winohinca kin eya.
- 14 Unkan Jehowa Wakantanka wamduška kin hecen eciya, Niye decanon, qa heon woteca watutka ko owasin, niś nana niyaścapi. Itpi kin on maka kin asdohan yaun qa tohan yani kin hehanyan maka ece yate kta.
- 15 Qa detanhan niś winohinca kin kici toka kiciya yaunpi kta, qa winohinca cinhintku kin nicinca kici toka kiciya yaunpi kta. He pa kin nicuwa kta, qa niś he siyete kin he yakuwa kta.
- 16 Hehan winohinca kin heciya, Iyonicišice ça ihduniśake cin nina mduota kta. Iyokiśinya cinca yaton, qa nihihna cantiheyaye ça iye wowidag niye kta.
- 17 Unkan wicašta kin heciya, Nitawin kin token eniciye cin anayagoptan, qa can wan etanhan yute śni ciśi qon, etanhan yate cin heon niye on etanhan maka kin yaścapi. Taku aicage cin on htayani qa hecen yate kta, tohan yani kin hehanyan.
- 18 Wapepeka toka hu ko icañ niciye kta, qa peji maka aicage cin yate kta.
- 19 Niite tenimni kin on aguyapi yahdute kta, maka incu kte cin hehanyan. Maka kiu etanhan inicagapi nakaes, maka mdu kin henica qa maka kin ekta icicawin yahde kta.

20 Hehan Adam iye tawicu kin, Ewe eya caś kiton ; taku ni un kin owasin he ina yanpi kin heon etanhan.

21 Unkan Jehowa Wakantanka Adam tawicu kin kici wakihdaka okde wicakicage ça oge wicakicaton.

22 Qa Jehowa Wakantanka heya, Wicaśta kin wanna unkiye wanji he iyeuncecapi, taku wašte taku śica ko sdonya, heon ihnuhan nape yekiye ça wiconi can kin etanhan icu, qa yute ça owihanke wanin ni kte cin.

23 Heon Jehowa Wakantanka wicaśta kin Eden wojupi kin etanhan iyog iyeya ; maka kin etanhan icage cin he kicanye kta ece.

24 Hecen wicaśta kin tankan iyeya, qa can wiconi canku kin awanyake kta e, Eden wojupi wiyohianpa tanhan Kerubim maza sagye ideya śkanśkan un ko ewicahde.

WICOWOYAKE 4.

1 Unkan Adam tawicu kin Ewe sdonya, unkan ihduśake ça Qain he ton, qa, Jehowa etanhan wicaśta wan mduha ce, eya.

2 Qa ake ihduśake ça sunkaku Abel ton. Unkan Abel taħinca wanuyanpi wiħan wicakiya, qa Qain maka kin kicanyan.

3 Unkan omaka ihanke kin hehan Qain waskuyeca maka aicage cin hee Jehowa wakiyuśna.

4 Unkan Abel taħinca wanuyanpi tawa tokaheya tonpi wan, ihdi koya wośna. Unkan Jehowa Abel taku wakiyuśna kin ko, akicitonwan.

5 Tuka Qain taku wakiyuśna ko akicikta śni. Unkan Qain canteptanye ça itohnake tokeca.

6 Unkan Jehowa Qain heciya, Tokeca canniniye ça itohnake enicetu śni ?

7 Tanyan ecanon kinhan ihaniktapi kte śni he ? Tuka tanyan ecanon śni kinhan woaħtani tiyopa kin en yanka. Tuka niye qe cantiheniye kta qa niś wowidake yaye kta.

8 Unkan Qain sunkaku Abel okiya, qa wojupi ekta napin yakonpi qehan najin hiyaye ça sunkaku Abel kikte.

9 Unkan Jehowa Qain heciya, Nisunka Abel tukte e he ? Unkan, Sdonwaye śni. Ecin misunka kin he awanhdag waun he ? eya.

10 Unkan token yaħan he ? Nisunka we kin maka kin etanhan ho umakiya.

11 Qa wanna maka kin nisunka we kin ninape etanhan icu kta e i kin hdukawa kin he etanhan niyaśicapi ce.

12 Detanhan maka kin yakicanyan eśta, taku ota icah niciye kte śni. Maka kin de akan onuniyan qa najica yaun kta ce, eya.

- 13 Unkan Qain Jehowa heciya, Wawahtani kin he tanka kin kajujupicaşni.
- 14 Anpetu kin dehan maka kin detanhan iyog iyemayaya, qa nitoye kin inahbe wakiye kta, maka kin akan onuniyan qa najica waun kta, qa tuwe kaşta iyemaye cinhan makte kta.
- 15 Tuka Jehowa heciya, Tuwe Qain kte kinhan, şakowin akihde woşice akipe kta. Qa Jehowa Qain wapetog ton, hecen on tuwe wanyaka eşa ktepi kte şni.
- 16 Unkan Qain Jehowa itoye kin etanhan inapa, Eden wiyohiyanpa tanhan makoce wan, Nod *eciyapi* kin, he en ounyan.
- 17 Qa Qain tawicu kin sdonya, unkan ihduşake ça Henok ton. Unkan *Qain* otonwe wan kage ça Henok eya caş kiton, cinhintku caje kin iyecen.
- 18 Unkan Henok cinca wan kicitonpi, Irad hee. Unkan Irad Mecujael cinkşiya. Unkan Mecujael Metuşael cinkşiya. Unkan Metuşael Lamek cinkşiya.
- 19 Unkan Lamek winohinca nom wicayuz. Tokaheya kin Ada *eciyapi*, qa iyokihe Zila *eciyapi*.
- 20 Unkan Ada Jabel ton ; he tona wakeya otipi, qa wanuyanpi awanhdakapi kin, hena ateyapi.
- 21 Qa sunkaku Jubal *eciyapi*. Tona candowankiyapi cotanka ko, yahotaninpi kin, hena he ateyapi.
- 22 Unkan Zila he Tubal Qain ton. Taku maza zi on kagapi, qa maza sapa on kagapi ko owasin, iye onspe qa kaga. Qa Tubal Qain tawinohtin Nahama hee.
- 23 Unkan Lamek tawicu Ada Zila kici hewicakiya, Miho kin nahtonpo, Lamek tawicu kin mioie kin anagoptanpo. Wicaşta wan wakte, on camapapi, qa koşka wan on kiunimiçiya ce.
- 24 Qain şakowin akihde tokiçonpi kinhan, Lamek wikcemna şakowin sanpa şakowin tokiçonpi kta ce, *eya*.
- 25 Unkan ake Adam tawicu kin sdonya ; unkan cinca wan ton, qa, Wakantanka cinca tokeca wan maqu, Abel Qain kte qon hee kiya, eye ça Şet eya caş kiton.
- 26 Unkan Şet iş eya cinca wan kicitonpi, qa Enoş eya caş kiton. Hehan tokaheya wicaşta kin Jehowa caje kin hoyekiyapi.

WICOWOYAKE 5.

- 1 Adam wicowazi wowapi kin dee. Wakantanka Adam kage çehan, taku wakan ouncage iyecen icah kiya.
- 2 Wica winyan ko wicakage ça wicayawaşte, qa wicakage çehan Adam eya caş wicaton.

- 3 Unkan Adam waniyetu opawinge sanpa wikcemna yamni ni, qa cinca wan iye ouncage iyecen kicitonpi, qa Śet eya caś kiton.
- 4 Qa Śet tonpi kin he iyohakam, Adam waniyetu opawinge śahdogan ni, qa cinca wica winyan ko kicitonpi.
- 5 Hecen anpetu owasin Adam ni un kin hena waniyetu opawinge napciwanka sanpa wikcemna yamni, hehan ƚa.
- 6 Unkan Śet waniyetu opawinge sanpa zaptan ni, qa Enoś kicitonpi.
- 7 Qa Śet Enoś tonpi kin iyohakam waniyetu opawinge śahdogan sanpa śakowin ni, qa cinca wica winyan ko kicitonpi.
- 8 Hecen anpetu owasin Śet ni un kin hena waniyetu opawinge napciwanka sanpa ake nonpa, hehan ƚa.
- 9 Unkan Enoś waniyetu wikcemna napciwanka ni, qa Qenan kicitonpi.
- 10 Qa Qenan tonpi kin iyohakam Enoś waniyetu opawinge śahdogan sanpa wikcemna sanpa zaptan ni, qa cinca wica winyan ko kicitonpi.
- 11 Hecen anpetu owasin Enoś ni un kin hena waniyetu opawinge napciwanka sanpa zaptan, qa hehan ƚa.
- 12 Unkan Qenan waniyetu wikcemna śakowin ni, qa Mahalele kicitonpi.
- 13 Qa Qenan Mahalele tonpi kin iyohakam waniyetu opawinge śahdogan sanpa wikcemna topa ni, qa cinca wica winyan ko kicitonpi.
- 14 Hecen anpetu owasin Qenan ni un kin hena waniyetu opawinge napciwanka sanpa wikcemna, hehan ƚa.
- 15 Unkan Mahalele waniyetu wikcemna śakpe sanpa zaptan ni, qa Jered kicitonpi.
- 16 Qa Mahalele Jered tonpi kin iyohakam waniyetu opawinge śahdogan sanpa wikcemna yamni ni, qa cinca wica winyan ko kicitonpi.
- 17 Hecen anpetu owasin Mahalele ni un kin hena waniyetu opawinge śahdogan sanpa wikcemna napciwanka sanpa zaptan, hehan ƚa.
- 18 Unkan Jered waniyetu opawinge sanpa wikcemna śakpe sanpa nonpa ni, qa Henok kicitonpi.
- 19 Qa Jered Henok tonpi kin iyohakam waniyetu opawinge śahdogan ni, qa cinca wica winyan ko kicitonpi.
- 20 Hecen anpetu owasin Jered ni un kin hena waniyetu opawinge napciwanka sanpa wikcemna śakpe sanpa nonpa, hehan ƚa.
- 21 Unkan Henok waniyetu wikcemna śakpe sanpa zaptan ni, qa Metuśela kicitonpi.
- 22 Qa Henok Metuśela tonpi kin iyohakam waniyetu opawinge yamni Wakantanka opeya mani, qa cinca wica winyan ko kicitonpi.
- 23 Hecen Henok anpetu tawa owasin waniyetu opawinge yamni sanpa wikcemna śakpe sanpa zaptan.

- 24 Qa Henok Wakantanka opeya mani, qa en un śni, Wakantanka he ikikcu nakaś.
- 25 Unkan Metuśela waniyetu opawinge sanpa wikcemna śakowin sanpa śahdogan ni, qa Lemek kicitonpi.
- 26 Qa Lemek tonpi kin iyohakam Metuśela waniyetu opawinge śakowin sanpa wikcemna śahdogan sanpa nonpa ni, qa cinca wica winyan ko kicitonpi.
- 27 Hecen anpetu owasin Metuśela ni un kin hena waniyetu opawinge napciwanka sanpa wikcemna śakpe sanpa napciwanka, hehan ƚa.
- 28 Unkan Lemek waniyetu opawinge sanpa wikcemna śahdogan sanpa nonpa ni, qa cinca wan kicitonpi.
- 29 Qa, Jehowa maka kin yaśice cin he nape on unkcanyanpi, qa htaunnipi kin en unkikiyapi kte cin dee ce, eye ƚa Nowa eya caś kiton.
- 30 Qa Lemek Nowa tonpi kin iyohakam waniyetu opawinge zaptan sanpa wikcemna śakowin sanpa zaptan ni, qa cinca wica winyan ko kicitonpi.
- 31 Hecen anpetu owasin Lemek ni un kin hena waniyetu opawinge śakowin sanpa wikcemna śakowin sanpa śakowin, hehan ƚa.
- 32 Unkan Nowa wanna waniyetu opawinge zaptan, hehan Śem, Ham, qa Japet, kicitonpi.

WICOWOYAKE 6.

- 1 Hehan wicaśta maka akan ota ayapi, qa cunwintkupi kicitonpi.
- 2 Unkan Wakantanka cinkśi wicaye cin wicaśta cunwintkupi kin hena e waśte wanwicayakapi, qa tona cinpi kin hena etanhan, winohinca wicayuzapi.
- 3 Unkan Jehowa heya, Wicaśta kin wicacehpi kin heca heon wahtanipi en mitaniya he kici owihanke wanin ounye kte śni, tuka anpetu tawa kin hena waniyetu opawinge sanpa wikcemna nonpa kta.
- 4 Unkan anpetu kin hena icunhan, maka kin akan wazise yakonpi, qa Wakantanka cinkśi wicaye cin wicaśta cunwintkupi kin wicayuzapi, qa cinca kicitonpi kin, hena eepi he iyohakam wicaśta waśakapi, wanakaja tanhan wicaśta nina caje wicayatapi.
- 5 Unkan wicaśta maka akan wahtanipi kin ota e, Jehowa wanyaka, anpetu osan wicocante oze okah otoiyohe ecedan śica.
- 6 Unkan wicaśta maka akan icaħ wicaye cin heon, Jehowa iyopeiĉiye ƚa cante iyokiśin iĉiya.
- 7 Qa, Wicaśta icaħ wicawaye cin, maka itohnake kin etanhan wicawakahinte kta ; wicaśta, qa woteca, qa watutka, qa taku maħpiya

ektakiya kinyan un kin henakiya icah wicawaye cin heon iyopemiçiya ce, Jehowa eya.

8 Tuka Jehowa Nowa wanyake ça wacin en yuza.

9 Nowa wicoicage oyakapi kin dee. Nowa wicašta ohan owotanna, qa hecetu wicoicage tawa kin hen, qa Nowa Wakantanka opeya mani.

10 Qa Nowa cinca yamni kicitonpi, Śem, Ham qa Japet.

11 Unkan Wakantanka itokam maka kin honwin ce, qa maka owancaya nina waboticapi.

12 Unkan Wakantanka maka kin wanyaka, unkan honwin ; wicacehpi owasin maka akan iye tacankupi kin honwin kiyapi ce.

13 Unkan Wakantanka Nowa heciya, Taku cehpi yukan owasin owihanke kin mitokam u ce ; iyepi kin on maka kin waboticapi on ojudan ; qa maka kin etanhan ihang wicawaye kta.

14 Wazi can on wata wan içicaga wo. Mahentu kin oškiškeya yakage kta, qa mahen tanhan akapa tanhan ko, canşin apawinta wo.

15 Qa hecen yakage kta. Wata ohanske cin wicişpa opawinge yamni, ohdakinyan kin wicişpa wikcemna zaptan, qa obosdatu kin wicişpa wikcemna yamni kta.

16 Qa wata kin en ojanjan hdepi yakage kta, qa wankantuya wicişpa wanjidan en yahduştan kta. Wata tiyopa kin cuwi kin ekta yakage kta, owanka tokaheya, inonpa, qa iyamni yakage kta.

17 Wanna miye maka akan minitan waye kta, heon taku cehpi yuke cin niyake iyeye cin owasin mahpiya ihukuya, ihang waye kta. Taku maka akan un kin owasin te kta.

18 Tuka wicotakuye mitawa kin niye en nici wahdusuta kta, wata kin en oyape kta nicinca om, nitawin, nicinca tawicupi kin, henana om.

19 Qa taku niya un kin owasin, taku cehpi yukan hiyeye cin ocaje otoiyohi, nom nom mdoka wiye iyahnahna, en owicayahnake kta ; ni wicayaye kta e niye kici wata kin en upi kta.

20 Taku kinye cin token ocaje, woteca token ocaje, wamanica maka akan unpi kin token ocaje, owasin ocaje otoiyohi nom nom niyake wicaduhe kta e niye en upi kta.

21 Qa niye taku yutapi kin ocaje otoiyohi etanhan icu, qa mnayan wo ; hecen taku yutapi anihduhe, ça woteca kin is iyacinyan wicayakihduhe kta.

22 Unkan Nowa Wakantanka token eciye cin, owasin anagoptan, qa ecen econ.

WICOWOYAKE 7.

- 1 Unkan Jehowa Nowa heciya, Niye, tiyohnaka nitawa kin owasin om, wata kin en opa wo ; wicoicage kin de en mitokam owotanna yaun kin wanciyaka ce.
- 2 Woteca wakašotešni ocaje otoiyohi mdoka wiye ahnahna šakowinwin iyacu kta, qa woteca waašapnpi kin, hena nom nom mdoka wiye kici iyacu kta.
- 3 Taku mašpiya ektakiya kinye cin nakun šakowinwin, mdoka wiye ahnahna maka akan aicagapi e niyake wicaduhe kta.
- 4 Ehake anpetu šakowin, hehan maka kin amagaju waye kta, qa taku ni un wakage cin owasin maka kin owancaya etanhan wakahinte kta ce.
- 5 Unkan Nowa, Jehowa token eciye cin owasin ecen econ.
- 6 Nowa tonpi kin ehantanhan waniyetu opawinge šakpe hehan maka kin akan minitan.
- 7 Qa Nowa cinkši wicaye om, qa iye tawicu, cinkši wicaye cin tawicupi ko, hena owasin om minitan mini kin itokapa tanhan wata kin en opa.
- 8 Woteca wakašotešni, qa woteca waašapapi kin, taku kinye cin, taku maka asdohan unpi ko owasin,
- 9 Nom nom mdoka wiye ahnahna Nowa en hipi, wata kin en ; Wakantanka Nowa econ ši qon he iyecen.
- 10 Unkan anpetu šakowin hehan maka kin akan minitan aya.
- 11 Waniyetu opawinge šakpe hehanyan Nowa ni un kin, wi icinonpa, anpetu iake šakowin kin, hehan šbe tanka kin wakoniya hiyeye cin owasin yuomdecapi, qa mašpiya owanyeye hdepi kin owasin yuzamni ehdepi.
- 12 Qa anpetu wikcemna tom, hanyetu wikcemna tom, hehanyan maka kin ahinheya.
- 13 Anpetu kin he en Nowa, qa Šem, qa Ham, qa Japet, Nowa cinkšiwicaye cin, Nowa tawicu kin nakun, cinca tawicupi yamni om, wata kin en hiyupi ;
- 14 Hena qa wamanica ocaje owasin, woteca ocaje owasin, watutka tona maka asdohan unpi ocaje owasin, taku kinyan ocaje owasin, zitkadan owasin taku šun yukan owasin,
- 15 Nom nom hipi, Nowa ekta wata kin en, taku cešpi yuke cin woniya niyake yuke cin owasin,
- 16 Hena en hiyupi ; mdoka wiye ahnahna taku cešpi yuke cin owasin etanhan upi ; Wakantanka econ ši qon he iyecetu. Unkan Jehowa tiyopa kin onataka.
- 17 Unkan anpetu wikcemna tom maka kin ahinheye a, minitan tanka aya ; unkan wata kin okapon maka kin iwankam iyaya.
- 18 Unkan mini kin wašagya aye a maka kin akan nina ihduota, unkan wata kin mini kin aokapota.

- 19 Unkan mini kin nina hin waśagya, maka kin akan, heon he pajodan owasin, tona maĥpiya ihukuya un kin hena aminitan.
- 20 Wiciśpa ake zaptan iwankam mini kin aye, a paha kin aminitan.
- 21 Unkan taku ceĥpi yuke cin owasin, taku maka aśkanśkan un kin, taku kinyan, qa woteca, wamanica, qa watutka tona maka kin akan sdohanpi kin owasin api, wicaśta iyuhpa nakun api.
- 22 Taku maka puze cin akan ni, taku poge on niya un kin, owasin api.
- 23 Unkan taku hiyeye cin maka akan un kin owasin kahintapi, wicaśta, woteca, watutka, maĥpiya zitkadan, owasin maka kin etanhan wicakahinta, qa Nowa iśnana qa tona wata kin ohna om un kin henana okaptapi.
- 24 Anpetu opawinge sanpa wikcemna zaptan mini kin maka kin akan waśagya.

WICOWOYAKE 8.

- 1 Hehan Wakantanka Nowa kiksuye, a wamanica woteca ko owasin, iye kici wata ohna yakonpi kin hena ; qa Wakantanka tate wan maka kin akan iyayupte ya, qa mini kin ayuśtan.
- 2 Qa minihdoka owahinapeye cin onatakapi, maĥpiya owanyeye kin hena koya, qa magaju maĥpiya etanhan kin he ayuśtan.
- 3 Unkan mini kin maka kin etanhan kihda, anpetu opawinge sanpa wikcemna zaptan, hehan mini kin oyaĥe aya.
- 4 Wi iśakowin, anpetu iake śakowin wi kin en, hehan wata kin Ararat he kin en azi.
- 5 Unkan mini kin iyoopta ye a oyaĥe aya, wi iwikcemna kin hehanyan ; wi iwikcemna kin anpetu tokaĥeya kin he en, he paha kin taninyan hiyeya.
- 6 Unkan anpetu wikcemna tom henakeca, hehan Nowa wata kin owanyeye kage ciqon, he yuhdoka.
- 7 Qa kangi wan tankan iyaye ya, unkan iyaye a ohnihdeya un, mini kin maka kin etanhan oyaĥe kin hehanyan.
- 8 Mini kin maka itohnake kin etanhan wanna pus aya, wanyake kta e wakiyedan wan nakun tankan iyaye ya.
- 9 Tuka wakiyedan kin tukten sicuha iyaĥe kte cin iyeye śni, mini kin maka kin owancaya akan un nakaes ; qa Nowa en wata kin ekta hdi ; unkan nape kin kiyugate a wata kin en ikikcu.
- 10 Qa ake anpetu śakowin ape, qa hehan ake wakiyedan wan wata kin etanhan iyaye ya.
- 11 Unkan ihtayetu he ehan wakiyedan kin hdi, qa wihdi can ape wan yapa hdi ; unkan Nowa mini kin maka kin etanhan wanna pus aye cin sdonya.

- 12 Unkan ake anpetu śakowin tokeca ape, qa hehan wakiyedān wan tankan iyaye ya, unkan icimana hdi śni.
- 13 Unkan Nowa tonpi kin ehantānhan wānīyetu opawinge śakpe qa itokaheya kin, wi tokaheya, qa anpetu tokaheya, hehan mini kin maka kin akapātānhan puza, unkan Nowa wata kin akāhpe ciqon yuhdoke a, maka itohnake kin wanna puza wanyake.
- 14 Wi inonpa kin, anpetu iake śakowin kin, hehan maka kin puza.
- 15 Unkan Wakantanka Nowa okiye a,
- 16 Wata kin etānhan ya wo, niye, qa nitawin, qa nicinca, qa nicinca tawicupi kin niye kici ;
- 17 Taku niyake niye kici un kin ko owasin, taku cehpi yukan owasin, taku kinyan, woteca, watutka tona maka asdohan unpi kin owasin, tankan awicayaku kte, hecen maka akan cinca kagapi kte a icagapi, qa ihduotapi kta ce, eciya.
- 18 Unkan Nowa tankan iyaye a, cinca nakun, tawicu, cinca tawicupi koya.
- 19 Taku niyake owasin, wamanica owasin, qa taku kinyan owasin, taku maka akan sdohan un kin owasin, ocaje otoiyohi wata kin etānhan inanpapi.
- 20 Unkan Nowa wahna wośnapi wan Jehowa kicaga qa, woteca wakaśoteśni otoiyohi etānhan, qa taku kinyan wakaśoteśni ocaje otoiyohi etānhan icu, qa wawicayusna, qa huhnah wicaya, wahna wośnapi kin akan.
- 21 Unkan Jehowa waśtemna kin omna, qa Jehowa cante kin ekta heya, Wicaśta kin heon maka kin ake mdaśice kte śni ; ehaeś wicaśta kin hokśiyōqopa kin ehantānhan cante oze śica ece, tuka icimana taku niya un kin owasin ihang waye kte śni, hecamon qon iyecen.
- 22 Tohanyan maka kin wanke cin hehanyan wojupi qa coyapi, qa sni qa didita, qa mdoketu qa wānīyetu, qa anpetu qa hanyetu hena ayuśtanpi kte śni ce.

WICOWOYAKE 9.

- 1 Unkan Wakantanka Nowa, cincawicaye cin ko, wicayawaśte qa, Icagapi qa ihduotapi, qa maka kin owancaya ojudan yapo ;
- 2 Qa taku maka aśkanśkan, taku mahpiya okinye cin ko owasin, maka watutka owasin, qa mini owanca hogan owasin, itonnipapi qa ikonipapi kta, hena owasin ninape kin en niupi ce.
- 3 Taku niya, qa śkanśkan kin owasin woyute nitawapi kta ; peji wato iyecen hena owasin ciupi.
- 4 Tuka we, cehpi wiconi kin hee, yatapi kte śni.
- 5 Qa awicakehan we nitawapi kin on yanipi kin awakite kta, wamanica

otoiyohi nape kin etanhan awakite kta, wicašta nape kin ko etanhan, otoiyohi hunka wanjitku nape kin etanhan wicašta wiconi kin he awakite kta.

6 Wakantanka iye ouncage iyecen wicašta kin kaga ; heon tuwe wicašta weye cinhan, he wicašta eciyatanhan weyapi kta.

7 Qa niyepi icagapi, qa maka kin owancaya ounyanpi, qa he ohna ihduotapo, ewicakiya.

8 Qa Wakantanka Nowa, cinca wicaye cin ko, owicakiye ca ;

9 Iho miye wicotakuye mitawa ciciyasuta qa nicinca nihektam unpi kte cin om.

10 Nakun taku niya un kin, niyepi om unpi kin, taku kinyan, woteca, qa maka wamanica owasin, tona niye om wata kin etanhan inanpapi kin, taku maka akan ni un kin owasin om.

11 Niyepi om wicotakuye mitawa wakaga, qa taku cełpi yukan owasin minitan mini on icimana awihnuni waye kte śni, qa detanhan maka ihang ye kta on, icimana minitan kte śni, ewicakiya.

12 Qa, Wicoicage owasin, hehanyan niyepi en, qa taku ni un kin owasin en, wicotakuye wakage cin wowakta kin dee.

13 Mitinazipe kin małpiya śoka en ewehnake a he wicotakuye maka kin waqu kin, wowakta kin hee kta.

14 Qa tohan maka kin małpiya śoka wan ahanzi waye cinhan, małpiya śoka kin ekta mitinazipe kin tanin kta.

15 Qa wicotakuye mitawa weksuye kta, niyepi om, qa taku ni un kin owasin om, qa taku cełpi yuke cin owasin awihnuni kta e, detanhan icimana minitan kte śni.

16 Itazipa kin małpiya śoke cin en yanke kta, qa wicotakuye Wakantanka kici, qa taku maka akan niya un kin taku cełpi yuke cin owasin om, owihanke śniyan un kte cin, he weksuye kta e itazipa kin wanwahdake kta ce, Wakantanka eya :

17 Qa, Taku cełpi yuke cin maka akan owasin, wicotakuye wicawaqu kin wowakta kin hee kta, Wakantanka Nowa eciya.

18 Unkan Nowa cinca wicaye cin, wata qon etanhan inanpapi kin deepi, Śem, qa Ham, qa Japet. Unkan Ham Kanan atkuku kin hee.

19 Hena yamni Nowa cinca kin eepi, qa hena etanhan maka kin owancaya enanakiya iyayapi.

20 Unkan, Nowa maka kin kicanyan aye a hastanhanka iyuwi hu hde.

21 Qa hetanhan miniśa yatke a witko, qa wakeya ohna tancodan un.

22 Unkan Ham Kanan atkuku kin hee, atkuku tancodan un kin he wanhdake a cincu nom tankan yakonpi kin, owicakiyaka.

- 23 Unkan Śem Japet kici, śina wan icupi, qa napin hiyetepi kin akan ehnakapi, qa iheyata manipi, qa ateyapi tancodan un kin akahpapi ; itepi kin iheyata unpi, hecen ateyapi tancodan un kin wanhdakapi śni.
- 24 Unkan Nowa, miniśa kin etanhan kikta, qa cinhintku hakakta kin taku ecakicon qon sdotkiya ;
- 25 Qa heya, Kanan yaśicapi kta. Wowidake wowidag yapi kta, cinye wicaye cin he yuhapi kta.
- 26 Jehowa Śem taku wakan tawa kin yawaśtepi nunwe. Kanan wowidake yuhapi kta.
- 27 Wakantanka Japet yuota kta, qa Śem tawakeya kin ohna Japet ounye kta, qa Kanan wowidake yuhapi kta.
- 28 Unkan Nowa, minitan qon iyohakam, waniyetu opawinge yamini sanpa wikcemna zaptan ni.
- 29 Hecen Nowa anpetu tawa owasin, waniyetu opawinge napciwanka sanpa wikcemna zaptan hehan ʒa.

WICOWOYAKE 10.

- 1 Nowa wicowazi kin dee. Nowa cinca kin, Śem, Ham, qa Japet : Unkan minitan qon iyohakam, hena cinca kicitonpi.
- 2 Japet cinca kin Gomer, qa Magog, qa Madai, qa Jawan, qa Tubal, qa Meśek qa Tiras.
- 3 Unkan Gomer cinca kin, Aśkenas, qa Ripat, qa Togarma.
- 4 Unkan Jawan cinca kin, Eliśa, qa Tarśiś, Kitim, qa Dodanim.
- 5 Hena Hetne wita tawapi kin wicakicipamnipi, makoce tawapi kin en, otoiyohi iapi kin, token wicowazi kin, hecen oyate kin en.
- 6 Ham cinca kin, Kuś, qa Mizarim *Egupton hee*, Put, qa Kanan.
- 7 Unkan Kuś cinca kin, Seba, qa Cawila, qa Sabta, qa Rahama, qa Sabteca. Unkan Rahama cinca kin Śeba, qa Dedan.
- 8 Unkan Kuś Nimrod kicitonpi, he tokaheya maka akan waśaka aya.
- 9 Iye waayatesa Jehowa itokam waśake cin hee ; heon etanhan, Waayatesa waśaka Jehowa itokam, Nimrod iyecen, eyapi kin.
- 10 Unkan wokiconze tawa tokaheya kin Babel hee, qa Erek, qa Akad, qa Kalne Śinar makoce kin en unpi.
- 11 Makoce kin he etanhan iyaya, qa Aśur, Niniwe kage ʒa Rehobot otonwe Kala nakun ;
- 12 Qa Niniwe Kala kici otahedan Resen otonwe tanka wan hee.
- 13 Unkan Mizarim *Egupton hee* cinca kicitonpi kin Ludim, qa Anamim, qa Lehabim, qa Naptuhim,
- 14 Qa Partusim, qa Kasluhim, hetanhan Piliśtim, qa Kaptorim inanpapi.

- 15 Unkan Kanan cinca kicitonpi Zidon, he tokapa, qa Het,
 16 Qa Jebusi kin, qa Amori kin, qa Girgişi kin,
 17 Qa Hiwi kin, qa Hareqi kin, qa Sini kin,
 18 Qa Aradi kin, qa Zemari kin, qa Hamati kin ; qa hehan Kanani
 wicowazi kin yuomden iyayapi.
 19 Qa Kanani makoce tawapi kin dee, Zidon etanhan Gerar ektakiya de
 cin Gaza etu, qa hetanhan Sodom, qa Gomora, qa Adma, qa Zeboim Lasa
 ekta.
 20 Ham cinca wicaye cin hena eepi, wicowazipi kin iyececa, oyatepi
 tamakocepi kin en, iapi kin iyecen.
 21 Unkan Japet tokapa kin sunkaku Şem, he cinca kicitonpi, Heber cinca
 wicaye cin owasin ateyapi kin hee.
 22 Şem cinca wicaye cin, Elam, qa Aşur, qa Arpakşad, qa Lud, qa Aram.
 23 Unkan Aram cinca wicaye cin Uz, qa Hul, qa Geter, qa Maş.
 24 Unkan Arpakşad Şela kicitonpi, qa Şela Heber kicitonpi.
 25 Unkan Heber cinca nonpa kicitonpi ; tokapa anpetu tawa kin en maka
 kin akipam icupi kin heon Peleg eciyapi, qa sunkaku kin Joktan cajeyatapi.
 26 Joktan cinca wicaye cin Almodad, qa Selep, qa Hatsarmawet, qa Jera ;
 27 Qa Hadoram, qa Uzal, qa Diqela ;
 28 Qa Obal, qa Abimahel, qa Şeba ;
 29 Qa Opir, qa Hawila, qa Jobal, hena owasin Joktan cinkşi wicaya.
 30 Meşa etanhan de cin, Seper he wan wiyohiyanpata wanke cin,
 hehanyan ounyanpi.
 31 Şem cinca wicaye cin hena eepi ; wicowazipi, qa wicoie hduhapi kin
 iyecen oyatepi kin tamakocepi kin en ounyanpi.
 32 Nowa cinca wicaye cin wicowazipi kin heepi, oyatepi kin en. Hena
 etanhan maka kin owancaya oyate enanakiya iyayapi minitan qon
 iyohakam.

WICOWOYAKE 11.

- 1 Hehan maka kin owancaya wicaiha wanjidan, qa iapi ko wanjidan.
 2 Qa wiyohiyanpata ihdaka unpi, qa Şinar makoce kin he en, omdaye
 wan iyeyapi, qa en eyakonpi.
 3 Qa otoiyohi takodaku hekiciyapi, Ihopo, maka omdoton unkagapi, qa
 şpan unkiyapi kta ce, eyapi. Hecen inyan hee kiya maka omdoton kin he
 icupi, qa upşija hee kiya bitumen icupi.
 4 Qa ake hekiciyapi, Ihopo, otonwe wanji unkagapi kte ça nakun
 conkaşke wan, he ointpa kin mahpiya iyahdeye kta, qa caje unkiyagapi kte ;

heconkupi śni kinhan, maka kin owancaya omdecaheya unkiyayapi kta.

5 Unkan, Jehowa otonwe kin, inatake ko, Adam cinca wicaye cin kagapi kin wanyake kta e kun hiyu.

6 Qa, Ehaeś oyate wanjidan, qa owasin iapi wanjidan yuhapi, qa de tokaheya econpi, qa detanhan taku kaga kecinpi owasin takudan tehike dapi kte śni.

7 Iho, kun unyanpi, qa iapi kin icicahi unyanpi kta ; kinhan iyakitedan iapi nakicihonpi kte śni, Jehowa eya.

8 Qa hetanhan Jehowa, maka kin owancaya, yuomden ye wicaya ; unkan otonwe kagapi qon ayuśtanpi.

9 He etanhan caje kin Babel eciyapi ; heciya Jehowa maka kin owasin iapi kin yuicicahi, qa hetanhan maka kin owancaya yuomden enanakiya ye wicaya.

10 Śem wicowazi *wowapi* kin dee. Śem waniyetu opawinge sanpa nonpa ni, qa hehan Arpakśad kicitonpi, minitan qon iyohakam waniyetu nonpa.

11 Śem Arpakśad tonpi kin iyohakam, waniyetu opawinge zaptan ni, qa cinca wica winyan ko kicitonpi.

12 Unkan Arpakśad waniyetu wikcemna yamni sanpa zaptan ni, qa Śela kicitonpi.

13 Qa Arpakśad, Śela tonpi kin iyohakam, waniyetu opawinge tom sanpa yamni ni, qa cinca wica winyan ko kicitonpi.

14 Unkan Śela waniyetu wikcemna yamni ni, qa hehan Heber kicitonpi.

15 Qa Śela Heber tonpi kin iyohakam, waniyetu opawinge tom sanpa yamni ni, qa cinca wica winyan ko kicitonpi.

16 Unkan Heber waniyetu wikcemna yamni sanpa topa ni, qa Peleg kicitonpi.

17 Qa Peleg tonpi kin iyohakam, Heber waniyetu opawinge tom sanpa wikcemna yamni ni, qa cinca wica winyan ko kicitonpi.

18 Unkan Peleg waniyetu wikcemna yamni ni, qa Reyu kicitonpi.

19 Qa Peleg, Reyu tonpi kin iyohakam, waniyetu opawinge nonpa sanpa napciwanka ni, qa cinca wica winyan ko kicitonpi.

20 Unkan Reyu waniyetu wikcemna yamni sanpa nonpa ni, qa Serug kicitonpi.

21 Qa Serug tonpi kin iyohakam, Reyu waniyetu opawinge nonpa sanpa śakowin ni, qa cinca wica winyan ko kicitonpi.

22 Unkan Serug waniyetu wikcemna yamni ni, qa Nahor kicitonpi.

23 Qa Nahor tonpi kin iyohakam, Serug waniyetu opawinge nonpa ni, qa cinca wica winyan ko kicitonpi.

24 Unkan Nahor waniyetu wikcemna nonpa sanpa napciwanka ni, qa Tera

kicitonpi.

25 Qa Nahor Tera tonpi kin iyohakam, waniyetu opawinge sanpa wikcemna sanpa napciwanka ni, qa cinca wica winyan ko kicitonpi.

26 Unkan Tera waniyetu wikcemna śakowin ni, qa Aberam, qa Nahor, qa Haran kicitonpi.

27 Tera wicowazi *wowapi* kin dee. Tera iye Aberam, Nahor, qa Haran kicitonpi. Unkan Haran Lot kicitonpi.

28 Unkan Haran, iye atkuku, Tera itokam ƚa, Ur Kaśdim heciya, makoce en tonpi kin he en ƚa.

29 Unkan Aberam, qa Nahor winohinca yuzapi. Aberam tawicu caje kin Sari, qa Nahor tawicu caje kin Milka eciyapi. Haran he cunwintku iye Milka Iska ko ateyapi.

30 Tuka Sari cinca ton śni un, cinca wanica.

31 Unkan Tera iye cinhintku Aberam ikikcu, qa takojatpaku, Lot he Haran cinhintku, qa takośku Sari iye cinhintku Aberam tawicu kin hee. Hena om Ur Kaśdim etanhan iyaya, Kanan makoce kin ekta ye kte, ƚa Haran ehan hipi qa hen hiyakonpi.

32 Qa Tera anpetu tawa kin waniyetu opawinge nonpa sanpa zaptan henakeca, qa Haran hen Tera ƚa.

WICOWOYAKE 12.

1 Unkan Jehowa Aberam heciya, Nita makoce kin etanhan ya wo, nitakuye etanhan, qa niyate ti kin etanhan, makoce wan wanyag ciciye kte cin he ekta ya wo.

2 Kinhan oyate tanka icañ ciye, ƚa ciyawašte, qa nicaje kin tanka wakage kta ; qa wowašte yaun kta ;

3 Qa tona niyawaštepi kin hena wicamdawašte, qa tuwe niyaśice cin he mdaśice kta, qa niye en wicowazi tona maka akan unpi kin owasin yawaštepi kta ce.

4 Unkan Aberam iyaya, Jehowa eciye ciqon he iyecen, qa Lot opa. Aberam wanna waniyetu wikcemna śakowin sanpa zaptan, Haran etanhan iyaye ƚehan.

5 Qa Aberam tawicu Sari ikikcu, qa iye cincu cinhintku Lot nakun, qa taku içihdepi, taku tonpi kin owasin, wicanagi tona Haran en wicatonpi ko, qa unhdaka yapi, Kanan makoce kin ektakiya, qa Kanan makoce kin en hipi.

6 Qa Aberam makoce kin ohna ya, Śekem ounye cin etu, More utuhu kin en. Unkan hehan Kanani kin makoce kin en unpi.

- 7 Unkan Jehowa Aberam en tanin içiye ça, Wicowazi nitawa kin makoce kin de waqu kta ce, eciya. Unkan Aberam hen wahna woşapi wan, Jehowa tanin içiye cin he kiciga.
- 8 Qa hetanhan unhdaka ya Betel iwiyo hiyanpatanhan he wan wanke cin, Betel wiyohpeyata, qa Hai wiyohiyanpata otahedan en e wakeya, qa heci wahna woşnapi wan kage ça Jehowa caje kin hoyekiya.
- 9 Qa ake Aberam unhdaka itokañ kiya ihdaka ya.
- 10 Unkan makoce kin he en wicaakihan, qa Aberam Egupta ekta apamahde ya, hen yanke kta, makoce en un qon nina wicaakihan nakaes.
- 11 Qa Egupta ekta wanna hi kte çehan, tawicu Sari heciya, Winohinca owanyag waşte henica sdonwaya ;
- 12 Qa Egupton oyate kin wanniyakapi kinhan, De tawicu kin ee ce, eyapi, kta, qa miye maktepi kta qa niye niniyanpi kta.
- 13 Ceciya ce, tawinohtin ciya keya wo ; hecen tanyan waun kte ça, niye eciyatanhan minagi kin ni kta.
- 14 Qa Aberam Mizarim, *Egupta hee*, en hi qehan, Egupton oyate kin tawicu kin owanyag waşte hinca e wanyakapi.
- 15 Unkan Paro taakicita tancan winohinca kin wanyakapi, qa Paro en yatanpi, qa winohinca kin Paro ti kin en un kte cin icupi.
- 16 Qa iye kin on Aberam tanyan ecakiconpi ; unkan tañin wanuyanpi yuha, tatanka nakun, qa şuktanka şonşonna mdoka wiye ko qa ookiye wica winyan ko, qa camo hena *owasin*.
- 17 Unkan Jehowa Paro oyutan, Sari Aberam tawicu kin on etanhan, Paro tiyohnaka tawa kin koya wowayazan tanka on wicakaştaka.
- 18 Unkan Paro Aberam kico, qa heciya, Tokeca hecamiyecon ? He nitawin kin tokeca omayakidake şni he ?
- 19 De mitankşı ce, ehe ciqon he tokeca heha he ? Hecen miş mduze kta iwacu tuka. Tuka nitawin wanhdaka wo. Ehdaku qa hunktiya wo.
- 20 Qa Paro wicaşta tawa kin hena he iwahokonwicakiya, unkan hde şipi, tawicu taku yuhe cin ko owasin.

WICOWOYAKE 13.

- 1 Unkan Aberam Egupta etanhan iyaya, iye tawicu kici, qa taku yuhe cin ko owasin, Lot nakun opa, itokañ makoce kin etu.
- 2 Qa Aberam wijica hinca, wanuyanpi, mazaska, qa mazaskazi ota yuha.
- 3 Qa itokañ makoce kin oti qon ohna ihdaka ku, Betel etu, wakeya iticage ciqon Betel qa Hai otahedan heciya ;
- 4 Tokag ehan wahna woşnapi kage ciqon he ekta, qa hen Aberam Jehowa

caje kin hoyekiya.

5 Unkan Lot Aberam kici ihdaka un kin he tahnca, qa tatanka wakeya ko yuha.

6 Qa witaya tonwanyanpi kte cin makoce kin iyowinwicakiye śni, ehaeś wanuyanpi ota yuhapi, heon witaya ounyanpi kta okitpanipi.

7 Unkan Aberam wanuyanpi wiħan wicakiyapi kin qa Lot wanuyanpi wiħan wicakiyapi kin akinicapi. Unkan hehan Kanani kin, Perazi kin ko makoce kin en ounyanpi.

8 Unkan Aberam Lot heciya, Unhdokinica kte śni, wiħan wicakiya mitawa kin, qa wiħan wicakiya nitawa kin nakun akinicapi kte śni, hunka wanjin unkiciye cin.

9 Makoce ocowasin nitokam wanke śni he ? Ceciciya ce, miye etanhan kinukankiya ya wo. Niś catka tanhan de cinhan miś etapa tanhan, qa niś etapa tanhan kinhan miś catka tanhan mde kta ce.

10 Unkan Lot wankan etonwe, a Jordan iyomdaye kin ocowasin Zohar itato owancaya mini yukan, (Sodom Gomora kici Jehowa iħangye cin itokam,) Jehowa tamaga kin iyecen, qa Egupta makoce kin iyecen.

11 Qa Lot Jordan ohna makoce kin owasin kaħnige a, Lot wiyohiyanpata kiya unhdaka ya, hecen otoiyohi hunka wanjitku kin etanhan kinukankiya iyayapi.

12 Aberam Kanan makoce kin en ounyan, qa Lot omdaye kin otonwe kin en ounye, a Sodom en wakeya iticaga.

13 Unkan Sodom wicaśta kin wicaśtapi śni, qa Jehowa en nina waħtanipisa.

14 Unkan Lot Aberam etanhan kinukankiya iyaye cin, he iyohakam Jehowa Aberam heciya, Iśta kin yuwankan ikikcu, qa toki yaun kin ihdukśan etonwan wo ; waziyata, qa itokaga, qa wiyohiyanpata, qa wiyohpeyata.

15 Makoce kin de wandake cin sitomniyan ciu kte a, wicowazi nitawa nakun owihankeśniyan.

16 Qa wicoicage nitawa kin maka wiyaka sukaza iyenaka wakage kta. Wicaśta wan maka wiyaka sukaza yawa okihi, hecinhan wicoicage nitawa nakun yawapi kta ce.

17 Najin qa makoce kin ohanske cin, qa ohdakinyan kin ecen omani wo, he ciu kta ce, eya.

18 Unkan Aberam ihdake a Mamore utuhu kin he Hebron en wanke cin ekta i, qa en ounye a hen wahna wośnapi wan Jehowa kicaga.

WICOWOYAKE 14.

- 1 Unkan Amrapel Śinar en wicaśta yatapi ounye cin he ehan, iye qa Ariyok Elasar en wicaśta yatapi, qa Kedorlahomer Elam en wicaśta yatapi, qa Tidal Goim en wicaśta yatapi ozuye kagapi.
- 2 Bera Sodom en wicaśta yatapi, qa Birsa Gomora en wicaśta yatapi, qa Śinab Adma en wicaśta yatapi, qa Śemeber Zeboim en wicaśta yatapi, qa nakun Bela, Zohar hee, he en wicaśta yatapi, hena owasin azuwicayapi.
- 3 Sidim mdaye kin, mini skuya mde kin hee, en hena owasin ecipapi.
- 4 Waniyetu ake nom, hehanyan Kedorlahomer wowidake wicaya, tuka iake yamni kin hehan kipajinpi.
- 5 Unkan waniyetu iake topa, hehan Kedorlahomer qa wicaśta yatapi owicape ciqon owasin upi, qa Repaim kin Aśteret Qarnayim en wicakaśtaka, qa Zuzim kin Ham en, qa Emim kin Qiratayim mdaye kin en, *hena owasin* wicakaśtakapi.
- 6 Hori kin nakun, Sehir he tawapi kin en Paran utuhu kin hetu, he hopuza kin en un.
- 7 Qa hdicupi, Miśpat wakoniya, Qadeś hee en, qa Ameleqi tamakocepi kin owasin awihnunipi, Amori kin tona Hazazon Tamar en ounyanpi kin nakun.
- 8 Hehan Sodom en wicaśta yatapi, qa Gomora en wicaśta yatapi, qa Adma en wicaśta yatapi, qa Bela Zohar he en wicaśta yatapi, qa Zeboim en wicaśta yatapi hena *owasin* zuya iyayapi, qa Sidim mdaye kin en kiczapi.
- 9 Kedorlahomer Elam en wicaśta yatapi, qa Tidal Goim en wicaśta yatapi, qa Amrapel Śinar en wicaśta yatapi, qa Ariyok Elasar en wicaśta yatapi, wicaśta yatapi ece, uman topa uman zaptan ecipapi.
- 10 Unkan Sidim mdaye kin ohna bitumen woħa ota, qa Sodom en wicaśta yatapi Gomora en wicaśta yatapi henios najicapi, qa ohinhpayapi, qa umanpi kin, tona nipi kin, he onapapi.
- 11 Unkan Sodom Gomora ko woyuha, taku yutapi ko yuhapi qon, owasin icupi qa kihdapi.
- 12 Lot Aberam cincu cinhintku kin Sodom en un kin nakun, taku tawa ko owasin icupi, qa hecen hdapi.
- 13 Unkan wicaśta wan okicize etanhan u, qa Aberam Heberi kin wokiciyaka, utuhu oju Mamore Amori tawa kin en un ; Mamore Eśkol Aner kici hunka wanjin wicaye cin, qa hena *yamni* Aberam kici dakon kiciyapi.
- 14 Unkan Aberam sunkaku wayaka ahdapi kin he nakihon, hehan wicaśta opawinge yamni sanpa wikcemna sanpa śahdogan, iye ti kin en icagapi, qa onspewicakiyapi kin hena awicaye ċa wicaśta yatapi qon, Dan hehanyan wicakuwa.

- 15 Qa hanyen taokiye kici anawicatan, qa wicakaštake ɕa owicakuwa, Coba Damaskos icatka tanhan wanke cin hehanyan.
- 16 Qa woyuha qon owasin eyaku ; sunkaku Lot, qa taku tawa ko owasin, winohinca oyate ko owasin ahda.
- 17 Qa Kedorlahomer, qa wicašta yatapi owicape ciqon wicakaštakapi kin etanhan hdi kin, hehan Sodom wicašta yatapi kin itkokim ya ; Kaksiza mdaye kin ekta Wicašta yatapi takaksiza kin hee.
- 18 Unkan Melkizedek Salem en wicašta yatapi, Taku wakan otancanke wakiyušnapi kin, he aguyapi miniša ahna *Aberam* kahi ;
- 19 Qa yawašte, qa heya, Wakantanka otancanke maḥpiya maka ko ocowasin tawa kin, he Aberam yawašte nunwe.
- 20 Qa Wakantanka otancanke kin, toka niyanpi kin nape kin en onihnake cin he yawaštepi nunwe, eya. Unkan taku owasin etanhan iwikcemna kin qu.
- 21 Unkan Sodom wicašta yatapi kin Aberam heciya, Oyate kin micu wo, qa woyuha kin he owasin icu, qa yuha un wo.
- 22 Unkan Aberam Sodom wicašta yatapi kin heciya, Jehowa Wakantanka otancanke kin maḥpiya maka ko ocowasin tawa kin, he ekta nape ye wakiya.
- 23 Taku nitawa kin etanhan haḥonta wanjidan, hanṭpa wanjidan ešta iwacu kte šni, qa Aberam wawokihi wakaga ehe kte šni.
- 24 Tuka koška taku yutapi kin hecehnana, qa Aner Eškol qa Mamore wicašta omicipapi kin hena eepi, onšpa tawapi kin ikikcupi nunwe, eya.

WICOWOYAKE 15.

- 1 Hena henakeca hehan, owanyake wan en Jehowa oie kin Aberam en hi, qa heciya, Aberam ihnuhan koyakipe cin ; wahacanka nitawa qa taku iyotan tanka yahduhe kte cin he miye ce.
- 2 Unkan Aberam heya, Jehowa Itancan taku mayaqu kta he ? Miš micinca manica qa wati kin taku ohnaka kin Eliezer Damaskon he yuha.
- 3 Qa Aberam heya, Miye cinca mayaqu šni, qa wicašta wan wati kin en tonpi kin, he taku mitawa owasin yuhe kta.
- 4 Unkan Jehowa oie kin hoyekiya, De taku nitawa owasin yuhe kte šni ce. Tokešta nitezi kin etanhan inanpe kte cin he taku nitawa kin owasin yuhe kta ce, eya.
- 5 Qa tankan u ši, qa heciya, Maḥpiya ekta etonwe ɕa wicanḥpi kin yawa oyakihi hecinhan hena yawa wo. Qa nicinca kin he iyenakecapi kta ce, eciya.
- 6 Unkan Aberam Jehowa oie kin wicada, qa he woowotanna kiciyawapi.
- 7 Unkan Jehowa heciya, Makoce kin de ciçu, qa yahduhe kta e Ur Kašdim etanhan u ciciye cin, Jehowa he miye ce.

- 8 Unkan, Jehowa Itancan, tokiya tanhan wahduhe kte cin sdonwakiye kta he ? eya.
- 9 Unkan, Pte wan waniyetu iyamni, qa tatokadan wan waniyetu iyamni, qa tamdoka wan waniyetu iyamni, hena *owasin* imicu wo, qa wakiyedan wan nakun, tin wakiyedan wan iyahna.
- 10 Unkan hena *owasin* ikikcu, qa cokaya okiwicakasdece ça wobašpe kin *owasin* iciyotakons ehnaka, qa zitkadan kin hena bašpe šni.
- 11 Unkan taku kinye cin woteca wicakte qon akan kun upi, unkan Aberam ham wicaya.
- 12 Unkan anpetu wi aisinyan iyaye kte cin, hehan woistima tanka wan Aberam ahinhpaye ça nakun otpaza wohitike hinca.
- 13 Unkan Aberam heciya, Wowicake eciyatanhan he sdonya wo, nicinca makoce wan tawapi šni e en waniyetu opawinge tom ounyanpi kte, unkan wowidag wicayapi, qa iyoyag wicayapi kta.
- 14 Unkan oyate wan wicayuhe kte cin he mdaco kta, unkan hehan woyuha ota yuha hinanpapi kta.
- 15 Tuka niye hunkake wicayaye cin ekta tanyan yahde kte ça, pa niska wašte kinahan nihapi kta.
- 16 Qa wicoicage itopa kin, hehan deciya hdipi kta ce. Amori kin woahntani kin nahahin iyatahdepi šni ce.
- 17 Unkan wi iyaya hehan nina otpaza, qa oceti izita wan, petijanjan ideya wan ko, taku okicasdece ciqon itoopteya iyaya.
- 18 Anpetu kin he en Jehowa wicotakuye wan Aberam kicage ça heya, Makoce kin de Egupta watpa etanhan, watpa tanka Yuphrate *eciyapi* hehanyan nicinca wicawaqu kta.
- 19 Keni kin, qa Qenizi kin, qa Qadmoni kin,
- 20 Qa Ceti kin, qa Perazi kin, qa Repaim kin,
- 21 Qa Amori kin, qa Kanani kin, qa Girgaši kin, qa Jebusi kin.

WICOWOYAKE 16.

- 1 Unkan Aberam tawicu kin Sari cinca kiciton šni, qa Egupton wikoška wan yuha, Hagar eciyapi.
- 2 Qa Sari Aberam heciya, Iho Jehowa miye onamataka ; ceciye, wikoška wan mduhe cin he ekta ya ye ; okini cinca miciton kta, eya. Unkan Aberam Sari oie kin anagoptan.
- 3 Unkan Sari Aberam tawicu kin, he wikoška tawa, Hagar Egupton kin icu, qa Aberam hihnaku kin tawicu kta e qu ; wanna waniyetu wikcemna hehanyan, Aberam Kanan makoce en un qehan hecon.
- 4 Unkan Aberam Hagar en i, unkan ihdušake ça, wanna ihdušaka

wanhdake çehan, yuhe cin he ísta kin on ihakta śni.

5 Unkan Sari Aberam heciya, Śicaya ecamiconpi kin he niye en oiyanihde. Miye wikoška wan mduhe cin he ciçu, nimaku kin ekta, unkan ihduśaka wanhdake çá ísta kin on ihamakta śni, miye niye kici unkiyotahedan Jehowa yaco kta ce.

6 Unkan Aberam Sari heciya, Tokešta wikoška nitawa kin he ninape kin ohna un, token iyonicipi ecen ecakicon wo. Unkan Sari iyoyag ya ; unkan najica iyaya.

7 Unkan Jehowa taohnihde wan Hagar tinta kin en iyeya, mini hdoka wan ikiyedán, Śur canku kin ohna mini hdoka he cin hee.

8 Qa heya, Sari tawikoška Hagar, tokiya tanhan yau he ? qa toki da he ? Unkan, Sari mayuha itoye kin etanhan nawajica ce, eya.

9 Unkan Jehowa taohnihde kin heciya, Niyuhe cin ekta icicawin hde, çá nape kin ihukuya eiçihde wo.

10 Kinhan nicinca ota wakage kta, qa ota kin heon yawapi kte śni, Jehowa taohnihde kin Hagar eciya.

11 Qa, Iho ihduniśake cin cinca wanji yaton kte, çá Ísmayel eya caś yakiton kta ; nicakije cin Jehowa nanihon kin heon etanhan.

12 Kinhan íś ikce wicašta kin heca kta. Wicašta owasin nape apaha wicayanke kta, qa íś wicašta owasin nape apaha yankapi kte, çá hunka wanjin wicaye cin owasin itokam ounye kte, Jehowa ohnihdeye cin eciya.

13 Unkan Wakantanka wanmayake cin he deciya awakita he ? eye çá, Jehowa okiye cin, he Wakantanka wanmayadake cin, eya caśton.

14 Heon wakoniya kin he, Tuwe ni qa wanmayake cin tawakoniya eciyapi ; he Qadeś qa Bered otahedan wanka.

15 Unkan Hagar Aberam cinca wan kiciton, qa Aberam cinca Hagar ton kin he Ísmayel eya caś kiton.

16 Aberam wanna waniyetu wikcemna śahdogan sanpa śakpe, Hagar Ísmayel Aberam kiciton kin hehan.

WICOWOYAKE 17.

1 Unkan Aberam wanna waniyetu wikcemna napciwanka sanpa napciwanka, hehan Jehowa Aberam en tanin içiye çá, Taku wakan iyotan waśake cin he miye ; mitokam omani qa iyaonpepica śni un wo.

2 Kinhan odakonciciye kta qa, iyakiçuya ciyuota kta, eciya.

3 Unkan Aberam pustag ehpeiçiya ; unkan Wakantanka okiye çá heya,

4 Odakonciciya qa oyate ota ate niyanpi kta ;

5 Qa detanhan Aberam eniciyapi kte śni, tuka Abereyam nicaje ee kta ; oyate ota ate niyanpi kte cin cicaga ce.

6 Qa nina yuota ciciye ça, oyate cicage kta, niye etanhan wicašta yatapi inanpapi kta.

7 Qa miye niye kici wicotakuye cicage kta, qa taku nitawa nihektam u kte cin hena koya, hecen wakage kta, tohanhanyan wiconi kte cin, hehanhanyan hecetu kta, hecen wakan mayada kta, qa nicinca nihektam u kte cin hena owihanke wanin wakan madapi kta.

8 Makoce en ihdaka yaun kin, Kanan makoce kin he owasin ciçu kta, qa tona enitanhan u kte cin hena, qa owihanke wanin tawayapi kta qa taku wakan mayanpi kta.

9 Qa, niye wicotakuye mitawa kin yahduhe kta, niye, nicinca nihektam upi kte cin hena koya, wicoicage tawapi kin en.

10 Qa wicotakuye mitawa miye, qa niye kici, qa nicinca nihektam u kte cin hena koya, yahduhapi kte cin he dee ce. Tona wica un kinhan hena bakihdayapi kte.

11 Ce inkpa ha kin banicihdayapi kta qa odakonciciyapi wowapetokton kin hee kta.

12 Wicoicage nitawapi kin tona wica owasin yatipi kin ohna tonpi, qa nicinca etanhan śni ešta, tuka oyate tokeca cinca, qa mazaska on opetonpi kin owasin, cincatonpi ehantanhan anpetu išahdogan bahdayapi kta.

13 Tuwe yati kin ohna tonpi qa mazaska nitawa on opetonpi kin he bahdayapi kta, qa odakonciyapi, nicehpi kin en he wicotakuye owihanke wanice kta.

14 Tuwe wica bahdayapi śni, ce inkpa ha kin bakihdayapi śni kinhan, wicotakuye mitawa naksa, heon wicašta kin he oyate tawa kin etanhan bašpapi kta, Wakantanka Abereyam eciya.

15 Qa detanhan Sari nitawin kin Sari cajedate kte śni, Sara caje kin hee kta ce.

16 Qa he mdawašte kte ça, hetanhan cinca wan ciçu kte ça, cinca niciton kte cin he nakun mdawašte kte ça, oyate ota nakun wicašta yatapi tanka hetanhan inanpapi kta, Wakantanka Abereyam eciya.

17 Unkan Abereyam pustag ehpeiçiye ça iha, qa cante kin mahen heya, Wicašta waniyetu opawinge cinca kicitonpi kta he ? qa Sara waniyetu wikcemna napciwanka cinca wan ton kta he ?

18 Hehan, Tokin İsmayel nitokam ni un, Abereyam Wakantanka eciya.

19 Unkan Wakantanka heya, Han ; awicakehan Sara nitawin cinca wan niciton kta, qa Izak eya caş yakiton kta, qa wicotakuye mitawa kin he kici wahdusuta kta ; cinca wicaye kte cin ihektam u kte cin, hena koya wicotakuye owihanke śniyan.

20 İsmayel on nakun nacihon, on mdawašte kta, cinca ota icahye wakiye

ça iyakiçuya yuota wakiye kta, wicašta yatapi ake nom kicitonpi kte ça, oyate tanka icahye wakiye kta.

21 Tuka Izak kici wicotakuye mitawa kin wahdusuta kta, detanhan omaka wanjica kinhan, makoncage kin de en Sara ton kta.

22 Wakantanka ie ça ohinikiye cin, hehan Abereyam itokam wankan ikiyopta.

23 Unkan Abereyam cinhintku Ísmayel ikikcu, qa nakun tona iye ti kin ohna wicatonpi kin, tona maza ska iye tawa on opewicaton kin hena koya owasin, tona wica iye ti kin ohna yakonpi kin hena, anpetu kin he en ce inkpa ha kin bawicakiñdaya, Wakantanka eciye cin he iyecen.

24 Abereyam wanna waniyetu wikcemna napciwanka sanpa napciwanka hehan iye ce inkpa ha kin bakiñdayapi.

25 Qa cinhintku Ísmayel waniyetu ake yamni hehan ce inkpa ha kin bakiñhayapi.

26 Abereyam cinhintku Ísmayel kici, anpetu wanjidani en bawicahdayapi.

27 Qa tiyohnaka wicašta owasin, ti kin ohna wicatonpi, qa oyate tokeca etanhan opewicatonpi kin hena koya, owasin Abereyam kici bawicahdayapi.

WICOWOYAKE 18.

1 Unkan Mamore utuhu kin heciya, Abereyam wakeya tiyopa kin ekta iyotankehan yanke, ça wiyotanhan hehan Jehowa tanin içiya.

2 Unkan Abereyam wankan etonwan, qa wicašta yamni itokam najinpi wanwicayake ça, wakeya tiyopa kin etanhan itkowicakipe kta e inyang iyaye ça, maka kin en canpeška makehdeya inajin.

3 Qa, Itancan ni íšta kin iyokipi ciya hecinhan ceciciya ce, nitaokiye kin etanhan sam iyaye śni wo.

4 Mini onge aupi on siha hdujajapi, qa can kin ihukuya ozi içiyapo.

5 Kinhan aguyapi onśpa cicaupi kta. Nicantepi kin iwakiśakapo, heon nitaokiyepi kin en yahipi, qa hehan idadapi kta ce, eya. Unkan token ehe cin ecen econ wo, eyapi.

6 Unkan Abereyam wakeya kin en ohankoya hda, Sara ti kin ekta qa, Aguyapi iyutapi yamni kohanna icu qa pasuta qa aguyapi hmiyanyan kaga wo, eya.

7 Hehan Abereyam wanuyanpi ekta inyang ye ça, ptejincadan wan cepa qa wašte ikikcu, qa he koška wan qu ; unkan inahniyan pata.

8 Unkan pte asanpi qa pte asanpi ihdi, qa ptejincadan pata qon ikikcu, qa wicitokam ehde, qa iye wicikiyedani najin can kin ihukuya. Unkan wotapi.

9 Qa Sara nitawin kin toki un he ? eciyapi. Unkan, Wakeya ohna yanka ce, eya.

10 Unkan, Detanhan omaka akihde kinhan, ake niye en cihhi kta qa awektunje kte šni. Hehan nitawin Sara cinca wan ton kta. Unkan Sara wakeya tiyopa kin ohna wicašta kin ihektam *yanka* tuka he nahon.

11 Wanna Abereyam Sara kici wanakaš wotapi, napin kanpi ; winohinca ayakonpi kin he, Sara wanna ecece šni un.

12 Heon Sara *cante* mahen iha qa, Wamakanka hehan, qa mayuha is nakun wicahinca ešta imduškin kta he ? eya.

13 Unkan Jehowa Abereyam heciya, Tokeca e Sara iha qa, Awicakehan wamakanka hehan cinca waton kta he ? eya he ?

14 Jehowa taku wanji okitpani tukte e he ? Tohantu kte cin ake niye en cihhi, qa Sara hokšidan wan ton kta.

15 Hehan Sara kokipe ça heon anakihbe ça, Iwaha šni ce, eya. Unkan, Hiya, iyaha ce, eya.

16 Hehan wicašta qon heciya tanhan najinpi, qa Sodom ektakiya etonwanpi ; unkan Abereyam awicaye kta e om iyaya.

17 Unkan Jehowa heya, Taku ecamon kte cin he Abereyam anawakihbe kta he ?

18 Abereyam is oyate tanka, qa wašaka un kte ça iye eciyatanhan oyate maka ohnaka owasin yawaštepi kta ;

19 Qa de sdonwakiye, cinca wicaye cin, tiyohnaka kin iyahna taku owotanna qa ecetu econ wicaši kta, qa Jehowa tacanku kin okicipapi kta, hecen Jehowa Abereyam token wahoye cin owasin kicicahi kta.

20 Unkan Jehowa heya, Sodom qa Gomora ceyapi kin he tanka, qa wahtanipi kin tehika e nawahon, heon

21 Nakaha kun mde ça ceyapi kin mahiyohi kin ocowasin iyececa econpi kinhan sdonwaye kta, qa ecece šni kinahan sdonwaye kta ce, eya.

22 Unkan wicašta qon hetanhan iyayapi, qa Sodom en ipi, qa Abereyam nahahin Jehowa itokam yanka.

23 Qa Abereyam ikiyadan hinajin qa, Tona ohan owotanna wahtanipisa om ihang wicayaye kta he ?

24 Okini wicašta owotanna wikcemna zaptan otonwe kin en unpi ešta ihang yaye kta he ? Wicašta owotanna wikcemna zaptan kin hena on, otonwe en unpi kinhan, otonwe kin itonyape kte šni he ?

25 Wicašta ohan owotanna wahtanipisa om ihang wicayaye kta seca ; tokadan hecanon kte šni. Tona owotanna wahtanipisa iyecen ecawicakiconpi kin he iyonicipi šni. Maka kin owancaya wayaco un kin he wayaco econ kte šni he ? eya.

- 26 Unkan Jehowa heya, Wicašta owotanna wikcemna zaptan Sodom otowwe en iyewaye cinhan, hena on otowwe kin ocowasin itowwape kta ce.
- 27 Unkan Abereyam ayupte ça, Maka mdu qa cahota hemaca qeyas mayuhe cin taku ewakiye kta on iapi iwacu.
- 28 Okini wicašta owotanna wikcemna zaptan kin en zaptan ope kte sni seca ; zaptanna kin hena on otowwe kin ocowasin ihang yaye kta he ? eya. Unkan, Ihang waye kte sni, hen wikcemna tom sanpa zaptan iyewaye cinhan, eya.
- 29 Unkan ake ie kta e hda, qa, Okini hen wikcemna tom iyewicayapi kta, eya. Unkan, Wikcemna topapi on ecamon kte sni, eya.
- 30 Unkan, Mayuha ceciciye canniye maye sni wo ; iwae kta ce. Okini wikcemna yamni hen iyeyapi kta seca, eya. Unkan, Wikcemna yamni hen iyewicawaye cinhan ecamon kte sni, eya.
- 31 Unkan, Tokin Mayuhe cin taku ewakiye kta e epen. Okini wikcemna nonpa hen iyeyapi kta seca, eya. Unkan wikcemna nonpa on ihang waye kte sni ce, eya.
- 32 Unkan, Itancan ceciciye canniye maye sni wo ; wancadan iwae kta ce. Okini wikcemna en iyeyapi kta seca, eya. Unkan wikcemna on ihang waye kte sni ce, eya.
- 33 Unkan Jehowa Abereyam okiya ohinikiye cin hehan toki iyaya, qa Abereyam ekta hda.

WICOWOYAKE 19.

- 1 Unkan htayetu ehan ohnihde wicaye cin nom Sodom en hipi ; he icunhan Lot Sodom tiyopa kin en iyotankehan yanka, unkan Lot wanwicayake ça itkowicakipe kta najin hiyaya, qa wicitokam patuś inajin.
- 2 Qa hewicakiya, Itancan ceciciyapi, wati kin en yapo, he wowidake mayaduhapi, heon hanyetu kin de wati kin en yukanpo. Siha kin hdujaja po, qa hanhanna yektapi, qa tokiya dapi hecinhan ekta katinyan yapo, ewicakiya. Unkan, Hiya, ocanku kin de ohna hanyetu osan unyakonpi kta, eyapi.
- 3 Tuka nina cinwicakiya ; unkan kici kipi. Ti kin ti mahen ipi, unkan aguyapi napohye codan span ye ça nakun wowicakihan ; unkan yutapi.
- 4 Iwankapi kta itokam, Sodom otowwe wicašta kin owasin tipi kin he aohduteyapi, hoksidan wicahinca ko owasin, otowwe ihanke anokatanhan, henana otowwe ohnaka kin owasin kawitaya ihaya.
- 5 Qa Lot kipanpi, Wicašta nom hanyetu kin de yati en hipi kin tukte epi he ? Tankan u wicası wo ; sdonwicunyanpi kte, eyapi.
- 6 Unkan Lot ti kin etanhan inanpe, ça tiyopa kin ecen icu,

7 Qa, Hunka wanjin ciyapi, ceciciyapi ce, ihnuhan hecen sícaya ecanonpi kin.

8 Micunkási nonpapi kin nahahin wicašta sdonye síni yakonpi, heniyos eicupi, qa token yacinpi ecen wicayakuwapi kta, tuka wicašta kin dena conkaške mitawa ohanzi ihukuya hipi kin heon takudan ecawicakiconpi síni po, ewicakiya.

9 Unkan, Tokan hiyaya wo. Wicašta kin de oyate tokeca, tuka den un kta wacin, qa hi qa he unyacopi wacin. Heon ihomeca niye iyotan sícaya unnicuwapi kta, oyate kin eyapi, qa Lot nina paškcapi qa tiyopa kin kaptujapi kta e en yapi.

10 Unkan ohnihde unpi kin tiyopa kin yuganpi, qa Lot ti mahen hdicu yapi, qa tiyopa kin onatakapi.

11 Unkan oyate kin wicašta cistina wicašta tanka ko, oyate otonwe ohnaka kin owasin, tiyopa kin en hiyeye cin hena íšta gonge wicayapi, heon tiyopa kin yutantan akitapi.

12 Unkan ohnihde unpi kin Lot heciyapi, Nakun den takuyaya yukan he ? takoš yaye cin nicinkási, nicunkási, qa taku tona otonwe kin ohna duhe cin, de etanhan om tankata inanpa wo.

13 Otonwe kin de ihang unyanpi kta, heon unhipi ; oyate kin de owasin woahntani hoyapi, qa Jehowa itokam oiyahde içiyapi, heon otonwe kin de owihanke ye unhipi.

14 Unkan Lot tankata inanpe, ça wicašta takoš wicaye kte cin, hena hewicakiya, Otonwe kin de etanhan tankata inanpapo ; Jehowa otonwe kin de ihanke ye kta ce. Tuka takoš wicaye kte cin Lot ceṭunhdapi.

15 Anpao hinanpa, unkan ohnihde unpi kin Lot inahni yapi, qa, Najin wo ; nitawin ehdaku wo, qa nakun nicunkási nonpa den unpi kin, okini otonwe wahtani kin en awihnuniniyanpi kta nace.

16 Tuka ihduwiyyeyapi síni ; unkan ohnihde unpi nape etanhan wicayuzapi, Lot, qa tawicu, qa cunwintku nonpa nape kin wicayuzapi ; Jehowa hena onšiwicakida, he etanhan otonwe kin tankan ewicayayapi.

17 Otonwe tankan awicaipi qa uman heciya, Napa wo, ni içiya wo. Ihnuhan nihektam eyatonwe cin. Omdaye kin ohna tuktedan inajin síni. He kin heciya onapa wo ; hecen yani kta ce.

18 Unkan Lot hewicakiya, Hiya, Itancan ceciciya ce :

19 Wowidake yaya nitokam wopida iyeiçiya, qa nitowaonšida kin icantoyahnake cin he miye. Tuka he onawape kte cin owakitpani kta. Okini taku síca hiyohimaye ça maṭe kta, kowakipa.

20 Heon ceciciya, otonwe wan cistina den aškanan he cin, hee iyowahi kta owakihi kta. Ceciciya, heci ye mayan wo ; cistina tuka hecen on minagi kin

ni kta.

21 Unkan, He wopida kin aciyupte kta ; otonwe cistina kin he ihang waye kte śni.

22 Onapa wo ; inahni wo. Tohan ehan yai śni hehanyan token wahan kte śni, eciya. He etanhan otonwe kin he Zohar eciyapi.

23 Wi toka hinanpa hehan Lot Zohar iyohi.

24 Unkan hehan Jehowa magaju ya, Sodom Gomora heniyozza kiya inyan zi peta ko Jehowa mahpiya eciyatanhan ahinhe wicaya.

25 Otonwe kin hena owihanke wicaya, omdaye ko ocowasin, qa tona otonwe kin en ounyanpi, qa makoce kin hen peji koya.

26 Tuka Lot tawicu kin hakikta, unkan tancan kin tokeca hinhde a miniskuya icu.

27 He icunhan, hanhanna Abereyam kikta, qa Jehowa okiye ciqon en etkiya ya.

28 Qa Sodom, Gomora, makoce ihdukšan koya atonwan ; unkan makoce kin he etanhan śota wan, maza śdoyapi oceti śota iyececa, wankantkiya inanpe cin wanyaka.

29 Jehowa Omdaye otonwe kin hena, owikanke ye cin he icunhan, Abereyam kiksuye a otonwe ohna Lot ounye cin ihang wicaye cin hetanhan Lot tankan iyaye ya.

30 Unkan Lot Zohar etanhan itawankanhde ye, a he wan akan cunwintku napin om e ounyan, Zohar he en un kte cin he wikopa heon, qa makoħdoka wan cunwintku napin om oti.

31 Unkan tokapa kin he tankaku kin hecen eciya, Ate unye cin wanna wicahinca, qa maka ohnaka wanna wicašta wanica, maka akan econpi qon iyecen, tuwedan unkiye en hi kte śni.

32 Iho we, ate miniša yatke unkiye kta, qa kici unwanke kte ; hecen on ate etanhan wicoicage unhdoyapi kta.

33 Hanyetu, unkan atkuku miniša yatke kiyapi. Tokapa kin he tokaheya atkuku kici iwanka, tuka atkuku kin cunwintku en hiwanke cin he sdotkiye śni, nakun kikta kin.

34 Ihanhanna tokapa kin he tankaku kin heciya, Hinhan ate kici imunka ; ecin ake hanyetu kinhan, miniša yatke unkiye kte a niš ito kici nunke kte, hecen on ate etanhan wicoicage unhdoyapi kta.

35 Unkan ake ihanyetu, unkan atkuku miniša yatke kiyapi ; iš ito hakakta kin atkuku kici iwanka. Iš ake cunwintku en hiwanke cin sdotkiye śni, qa kikta kin nakun.

36 Hecen Lot cunwintku napin atkuku etanhan hokšın itpihnakapi.

37 Tokapa kin hokšidan wan ton qa Moab eya caš kiton. He Moab *oyate*

ate yapi anpetu kin dehan aiyahdeya.

38 Unkan hakakta kin ís eya hoksidan wan ton qa, Benami eya caś kiton. He Amon cinca kin anpe dehan aiyahdeya ate yapi.

WICOWOYAKE 20.

1 Hehan Abereyam makoce itokaga kin ekta ihdaka ye ça, Qadeś qa Śur otahedan iyotanke ça Gerar en ounyan.

2 Qa Abereyam tawicu Sara ke ça, Mitankśi kin dee ce, eya. Unkan Gerar wicaśta yatapi Abimelek, he ekta ye wicaśi qa Sara icu.

3 Unkan hanyen, Wakantanka Abimelek ekta hi, qa wowihanmde wan en heciya, Iho niṭe, winohinca iyacu kin he wicaśta wan tawicu kin heca nakaes.

4 Tuka Abimelek nahahin Sara ikiyedana wanke śni, qa heya ; Itancan oyate owotanna wan he nakun ṭe wicayaye kta he ?

5 Mitankśi kin dee, emakiye śni he ? qa winyan kin ís, Timdo waya ce, emakiye śni he ? Micante kin ecedan qa minape iyecetu kin on hecamon.

6 Unkan Wakantanka wowihanmde kin en heciya, Miś nakun nicante ecedan kin en hecanon kin sdonwaya qa, heon ecihdaku, miye en wayahtani kte śni, qa dutan kte cin iyowin ciciye śni.

7 Qa wanna, iho, wicaśta qon tawicu kin kicu wo, ís wicaśta wokcan kin heca, kinhan niye on cekiye kta, hecen yani kta ; tuka ake yecu śni kinahan niṭe kte ça nakun taku nitawa kin owasin, he sdonya wo.

8 Unkan Abimelek hanhanna hin kikta, qa ookiye wicayuhe cin owasin wicakico, qa hena owasin owicakiyaka : Unkan wicaśta kin nina kokipapi.

9 Unkan Abimelek Abereyam kico qa, Tokeca e hecaunyeconpi ? Qa niye en wawahtani kin tukte e on woahntani tanka wan miye qa oyate mitawa ko iyahde unyayapi ? Woecon wan econpi kta iyecece śni tuka hecamiyecon, eciya.

10 Qa, Taku wandaka on hecen ecanon he ? Abimelek Abereyam, eciya.

11 Unkan Abereyam heya, Tuwedan deciya Wakantanka ohoda śni qa mitawin on maktepi kta kepce cin heon hecamon ;

12 Qa awicakehan tankśi waya ce. Ate waye cunwintku kin hee, tuka ina tawa śni, qa mitawin ee kta mduza.

13 Qa Wakantanka ate ti kin etanhan ihdaka ye maye çehan winyan qon hewakiya ; Taku wašte ionśimayada kte cin dee ce. Makoce owasin tokiya kaśta en unki kinhan, Timdo emakiya wo, epe ciqon, eya.

14 Hehan Abimelek tahin wanuyanpi ikikcu, qa tatanka qa hoksidan wicinyanna ko iwicakikcu qa Abereyam qu ; tawicu Sara nakun kicu.

- 15 Qa Abimelek heya, Mitamakoce nitokam wanka ce ; tukten niišta iyonicipi kinhan hen iyotanka wo.
- 16 Qa Sara heciya, Iho nitimdo mazaska kektopawinge waqu ; iho he niišta akañpe kte cin ee, tona nici unpi kin owasin en, qa tokan nakun owasin en ; hecen Sara iyopeyapi.
- 17 Hehan Abereyam Wakantanka icekiya ; unkan Wakantanka Abimelek asni yan, tawicu kici qa wikoška yuhe cin owasin. Unkan cinca tonpi.
- 18 Jehowa, Sara Abereyam tawicu kin on etanhan, Abimelek tiyohnaka tawa owasin tamnipi kin suksuta onawicataka tuka qon.

WICOWOYAKE 21.

- 1 Unkan Jehowa heye ciqon, he iyecen Sara ekta hi, qa Jehowa, eciye ciqon, he iyecen ecakicon.
- 2 Unkan Sara ihduśake ça Abereyam okanta cinca wan kiciton ; Wakantanka eye ciqon iyehantu qehan.
- 3 Unkan Abereyam cinhintku kicitonpi, Sara ton kin he, Izak eya caś kiton.
- 4 Qa Abereyam Izak bakiñdaya anpetu íśahdogan tonpi kin ehantanhan, Wakantanka econ śi qon iyecen.
- 5 Abereyam wanna waniyetu opawinge, hehan cinhintku Izak kicitonpi.
- 6 Unkan Sara heya, Wakantanka iha mayan, qa tona nahonpi kin imiciyuśkinpi kta.
- 7 Qa Sara hokśiyooqopa azin kiye kte cin, tuwe Abereyam eciye kta he ? wicahinca tuka cinca wecicon kin, eya.
- 8 Unkan hokśidan kin tanka aye ça azin ayaśtan kiyapi. Unkan Izak azin ayaśtan kiyapi anpetu kin he en, Abereyam wohe ça wicota wicakico.
- 9 Unkan Hagar Egupton kin cinhintku Abereyam kiciton kin he, wowihaha kin he Sara wanyake ça ;
- 10 Wikoška kin de cinhintku kin iyahna tankan ye wicaya ye. Wikoška kin de cinhintku kin, micinkśi Izak kici woyuha tawaye kte śni, eya.
- 11 Unkan oie kin he, Abereyam íšta kin en tehike hinca, cinhintku kin heon etanhan.
- 12 Unkan Wakantanka Abereyam heciya, Wikoška duhe cin, qa hokśidan kin on etanhan, niišta kin en tehike śni nunwe. Taku Sara eniciye cin owasin ecen ho kin anagoptan wo. Izak he en wicoicage nitawa kin caje yatapi kta
- 13 Wikoška cinhintku kin nicinkśi kin hee, heon he nakun oyate wan icah wakiye kta ce.

- 14 Unkan Abereyam hanhanna hin kikta, qa aguyapi mini apahta wan ahna icu, qa Hagar qu, tahpa kin akan ehna, hoksidan nakun qa toki ye ši. Unkan iyaye ça Berseba tinta kin onuni.
- 15 Unkan mini apahta kin etanhan mini wanna yahepapi, qa hoksidan kin canhaka wan ihukuya ehpekiya ;
- 16 Qa iyaye ça iyotakons iyotanka kitana tehan, wanhinkpe kihiyeyapi hehanyan : Hoksidan te kte cin wanwahdake kte šni ce, eya ; heon aisinyan iyotanke ça hoyeye ça ceya.
- 17 Unkan Wakantanka hoksidan ho kin nahon, qa Wakantanka taohnihde mahpiya eciyatanhan Hagar kipan, Hagar taku yaka he ? Wakantanka he oyanke kin etanhan hoksidan ho kin nahon. Kokipe šni wo.
- 18 Najin qa hoksidan kin ikikcu qa, nape kin on hduha wo. Iye oyate tanka wan icah wakiye kta ce, eya.
- 19 Qa Wakantanka winyan ista kin yuhdoka, unkan minihdoka wan wanyake ça ekta i, qa mini apahta kin iyatahde ye ça hoksidan kin yatke kiya.
- 20 Unkan Wakantanka hoksidan kin kici un ; hecen tanka icage ça tinta kin en ounye ça itazipa on waoka.
- 21 Qa Paran tinta kin en ounye ça hunku kin Egupta makoce kin etanhan, tawicu kte cin kiciyuza.
- 22 Unkan hehan Abimelek qa taakicita tancan Pikol henioza Abereyam heciyapi ; Taku ecanon kin owasin en Wakantanka oniciya.
- 23 Iho hecen eya wo, Wakantanka namahton ; cihnaye kte šni, nicinkši nitakoja ko wicawahnaye kte šni, taku wašte ecamiyecon kin iyecen ecacicon kta, makoce en ounwaye cin nakun.
- 24 Unkan, Miš ecen eya wakonze kta ce, Abereyam eya.
- 25 Hehan minihdoka wan Abimelek taokiye kin kipi qon, he Abereyam cajeyate ça he on Abereyam Abimelek iyopeya.
- 26 Unkan, Tuwe hecon kin sdonwaye šni, qa niš nakun omayakidake šni, nakun miš he nawahon šni, nakaha heceyed, eya.
- 27 Unkan Abereyam tahinca wanuyanpi pte wanuyanpi ko ikikcu, qa hena Abimelek qu ; unkan napin odakota wan kicicagapi.
- 28 Hehan Abereyam tahinca cinca wiyedan šakowin akipam ewicahde.
- 29 Unkan Abimelek Abereyam heciya, Tahinca wiyedan šakowin kinukan ewicayahde kin he taku he.
- 30 Unkan, Minihdoka kin de miš waqe cin he yuotaninpi kte cin, heon tahinca wiyedan šakowin kin hena minape kin etanhan iyacu kta, eya.
- 31 Unkan heon etanhan makoce kin he Berseba eciyapi, napin heciya

Wakantanka namahon eya, ekiciyapi.

32 Unkan Berseba hen odakota wan kicicagapi ; hehan Abimelek najin taakicita tancan nakun, qa Pilištim tamakocepi kin ekta hdapi.

33 Unkan Abereyam Berseba heciya taškoju wan oju, qa hen Jehowa Taku wakan owihanke wanica hoyekiya.

34 Qa Abereyam Pilištim tamakocepi kin en anpetu ota ounyan.

WICOWOYAKE 22.

1 Unkan hena owasin iyohakam, Wakantanka Abereyam iyutan ye ça heciya, Abereyam, eya houkiya. Unkan, Iho miye ce, eya.

2 Unkan, Nicinksi heceyedon wašte yakidake cin Izak he icu, qa Moriya makoce kin ekta ye ça heciya he wan ociciyake kte cin he akan petan wahdušna wo, eya.

3 Unkan Abereyam hanhanna hin kikta, qa šuktanka šonšonna aqin kiton, qa koška nom iwicakikcu cinhintku Izak nakun, can on wošna kte cin he kakse ça, najin qa hena om, makoce tukte en Wakantanka cajeyate ciqon heciya iyaya.

4 Anpetu iyamni Abereyam wankan etonwe ça, tukten ke cin he tehan tanhan wanyaka.

5 Qa Abereyam koška wicayuhe cin hewicakiya, Den iyotankapo šuktanka šonšonna iyahna, qa miš hoksidun kici kan unkipi kinhan canpeška makehdeya unkanpi, qa den dukanpi kin en unhdipi kta.

6 Qa Abereyam can on wošna kte cin icu, qa cinhintku Izak akan ehnake ça peta isan ko nape kin en icu, qa sakim iyayapi.

7 Unkan Izak atkuku Abereyam kici okiye ça, Ate, eya. Unkan, Micinksi nawahon ce, eya. Unkan, Iho peta can ko yukan, tuka wotega kin wošnapi on tukte e he ? eya.

8 Unkan, Micinksi Wakantanka tahin wanuyanpi wakiyušnapi on okide kta, eya. Hecen sakim yapi.

9 Qa wanna tukten Wakantanka ye ši qon hen hiyohipi, qa hen Abereyam wahna wošnapi wan kage ça, cinhintku Izak iyakaške ça wahna wošnapi kin akan ekihnaka, can kin iwankam.

10 Qa cinhintku te kiye kta e nape kiyugate ça isan kin ikikcu.

11 Hehan mahpiya kin eciya tanhan Jehowa ohnihde ye cin kipan, Abereyam, Abereyam, eya. Unkan, Nawahon ce, eya.

12 Unkan, Hoksidan kin ekta ninape kin ye kiye šni, qa takudan ecakicon šni wo. Wanna niye Wakantanka ikoyape cin sdonwaya ce ; nicinksi heceyedon, tuka mayaqu kta wicayada he etanhan, eya.

- 13 Hehan Abereyam wankan etonwe ça, inyun iheyata tamdoka wan otehi ohna he kin on ikoyag najin, he wanyake ça. Abereyam ekta i, qa tamdoka kin icu, qa cinhintku kin hee kiya hee petan wośna.
- 14 Qa Abereyam makoce kin he, Jehowa wiwanhdake kta, eya caś ton ; heon Jehowa he tawa kin akan tanin içiye kta ce, nahahin eyapi.
- 15 Unkan mahpiya kin eciya tanhan Jehowa ohnihde ye cin inonpa akihde Abereyam kipan ;
- 16 Miye kaeś caje mihdate Jehowa eya ; Taku ecanon kin de nicinca wanjidan tuka itonyakipe śni ;
- 17 Heon wowašte on ciyawašte kta, nicinca iyakiçuya yuota wakiye kta. Mahpiya wicanhpi iyena, qa miniwanca kahda wiyaka sukaza iyeye cin iyena, taku nitawa iyacin kte ça, nicinca toka wicayapi kin otonwe tawapi kin yuhapi kta.
- 18 Qa mioie kin anayagoptan kin heon nicinca kin on maka kin oyate owasin wicayawaštepi kta ce, eya.
- 19 Unkan Abereyam kośka wicayuhe cin ekta hda ; unkan najinpi qa yuwitaya Berśeba ekta hdapi ; qa Abereyam Berśeba en ounyan.
- 20 Hena owasin iyohakam Abereyam hecen eya okiyakapi ; Milka he nakun nicinye Nahor he cinca kiciton.
- 21 Uz tokapa kin hee, qa sunkaku Buz, qa Qemuel Aram he atkuku ;
- 22 Qa Kesed, qa Hazo, qa Pildaś, qa Idlap, qa Betuel.
- 23 Unkan Betuel he Rebeka kicitonpi. Hena śahdogan kin Milka he Nahor Abereyam cinca kin kiciton.
- 24 Unkan tawicu tokeca kin, Ruma eciyapi he Teba, qa Gaham, qa Tahos, qa Mahaka hena wicaton.

WICOWOYAKE 23.

- 1 Unkan Sara waniyetu opawinge sanpa wikcemna nonpa sanpa śakowin henakeca, waniyetu kin hena Sara ni.
- 2 Hehan Sara ta, Arba otonwe kin heciya, Hebron Kanan makoce kin etu hee. Unkan Abereyam Sara on iyokiśice ça akiceye kta e en hi.
- 3 Hehan Abereyam *tawicu* te cin itokapa tanhan najin qa. Het cinca wicaye cin owicakiya.
- 4 Qa, Miś wicašta ihdaka waun qa aśkatudan nicipi wahimdotanka, wicašta hnakapi mduhe kta e niyepi om maqupo ; kinhan makite cin mitokapa tanhan wehnake kta ce, eya.
- 5 Unkan Het cinca wicaye cin ayuptapi, qa Abereyam heciyapi ;
- 6 Itancan anaungoptanpo : Wicašta yatapi wakan unkiyepi cokaya

henica. Wicašta hnakapi unhapi kin tukten iyonicipi kin nicite cin en kihnaka wo. Unkiś wanjidan kašta wicašta hnakapi unhapi kin hen nicite cin yehnake kta e tehinda kte śni.

7 Unkan Abereyam najin qa Het cinca wicaye cin oyate makoce yuhapi kin wicitokam apatuja.

8 Qa owicakiye ça, Makița mitokapa tanhan wehnake kte cin he iyonicipipi hecinhan anamagoptanpi, qa Epron Zohar he cinhintku cin makiyapo.

9 Kinhan Makpela imnija ohdoka yuhe cin, tamaga ihanke en un kin, mazaska iyenakeca kin heon maqu kte cinhan, niyepi cokaya wicašta hnakapi wan mduhe kta ce, ewicakiya.

10 Unkan Epron Het cinca wicaye wicehna ounyan ; qa Epron Heti kin Abereyam ayupta ; Het cinca wicaye cin, otonwe tiyopa ohna upi kin hena owasin nahonpi ;

11 Hiya, Itancan namañon wo. Maga kin ciçu ; imnija ohdoka en un kin he nakun ciçu. Mitaoyate cinca wicaye cin wanmayakapi he ciçu. Nicite cin kihnaka wo, eya.

12 Unkan Abereyam oyate makoce tawapi kin wicitokam patuja.

13 Qa ia, Iho amayadupte cinahan, namañon wo. Maga kin on mazaska ciçu kta. Icu wo ; kinhan makițe cin wehnake kta, Epron eciya, oyate makoce yuhapi kin hena nahonpi.

14 Unkan Epron Abereyam ayupte ça heciya ;

15 Itancan namañon wo. Maga kin mazaska opawinge topa iyehantu ce ; tuka unkiyotahedan he taku ? Nicite cin ekihnaka wo.

16 Unkan Epron ie cin he Abereyam anagoptan, qa mazaska opawinge tom wopeton icupi kin heca Abereyam aspe ye ton qa qu, he Epron Het cinca wicaye cin nahonpi cajeyate ciqon hee.

17 Unkan Epron tamaga Makpela en wanka, Mamore iyotakons he qu ; maga kin imnija ohdoka he en wanke cin he nakun, qa can tona he en han qa tona ihdukśan he cin he nakun owasin ;

18 Abereyam tawa kte cin, Het cinca wicaye cin tona otonwe tiyopa kin ohna yapi kin he wanyakapi.

19 Hehan Abereyam tawicu Sara ekihnaka ; Makpela maga imnija ohdoka kin he en, Mamore ikiyedon, Hebron Kanan makoce kin etu hee.

20 Unkan maga imnija ohdoka iyahna, Abereyam wicašta hnakapi on yuhe kte cin, Het cinca wicaye cin qupi.

WICOWOYAKE 24.

- 1 Unkan Abereyam wanna wicahinca omaka ota ; unkan Jehowa taku owasin en Abereyam yawašte.
- 2 Unkan Abereyam he taokiye tiyohnaka tawa tokapa kin, taku yuhe cin owasin awanyag un kin heciya ; Ninape kin miceca ihukuya ekihnaka wo ;
- 3 Kinhan, Jehowa Taku wakan mahpiya maka ko yuhe cin namañon, eye ciciye kta, Kanani oyate om manke cin cunwintkupi kin etanhan micinksi on winohinca iyacu kte sni.
- 4 Tuka mitamakoce qa mitakuye kin hena ekta de kte ça, hetanhan micinksi Izak on winohinca iyacu kta, kehe kta ce, eya.
- 5 Unkan, taokiye kin heya, Okini winohinca kin makoce kin de ekta omape kta tawañenye kte sni ; hecinhan makoce etanhan yau qon, nicinksi ake ekta ye wakiye kta he ?
- 6 Unkan, Ihnuhan micinksi icicawin heciya ye yakiye cin.
- 7 Taku Wakan mahpiya yuhe cin, ate ti kin etanhan qa makoce wan en matonpi kin etanhan, imacu qa omakiye ça, Makoce kin de nicinca waqu kta ce, eya konza, he taohnihde kin nitokam ye si kta, kinhan micinksi kin on heciya tanhan winohinca wan iyacu kta.
- 8 Winohinca kin onipe kta tawañenye sni, hecinhan iyakonze kin de on iyaonpepicasni yaun kta, tuka micinksi heciya ye yaye kte sni ce.
- 9 Unkan taokiye qon nape kin iye yuhe cin Abereyam ceca kin ihukuya ekihnake ça ecen eya konza.
- 10 Qa ookiye kin, iye yuhe cin camo tawa kin etanhan, camo wikcemna, qa iye yuhe cin taku wašte tawa kin owasin etanhan icu, qa hena yuha iyaye ça Nahor otonwe kin ekta i, Aram watpa otahedan etu.
- 11 Qa otonwe kin itankan minihdoka ikiyedani, camo kin canpeška makehdeya inajin wicakiya, htayetu mini huwe ipi eca iyehantu.
- 12 Qa heya, Jehowa Abereyam mayuhe cin Wakan nida ceciciya, nakaha tanyan ihuni makiye ça Abereyam mayuhe cin he wowašte ecakicon ye.
- 13 Minihdoka kin ekta nawajin ; qa otonwe kin wicašta cunwintkupi kin mini huwe upi kta.
- 14 Qa wikoška wan tuwe kašta hewakiye kta ; Wakiškotpa nitawa kin au wo, mini mdatke kta ce ; unkan, Yatkan ye, qa camo nitawa kin nakun yatke wicawakiye kta, eye cinhan, token nitaokiye Izak yuhen yakahnige cin hee, kinhan mayuhe cin wowaonšida ecayecon sdonwayen.
- 15 Unkan is ia nahahin ayaštan sni ehan, Rebeka u, Abereyam cincu Nahor tawicu Milka he cinhintku Betuel he cunwintku kin hee, wakiškotpa hiyeta onpe ça u.

- 16 Wikoška owanyag wašte hinca, hoksiwina, qa wicašta tohini sdoneyeni, minihdoka kin ekta kun ye ça wakiškotpa kin ojudan icu qa wankan hiyu.
- 17 Unkan ookiye qon itkokim inyang ye ça, Wakiškotpa duhe cin etanhan mini onge yatke makiya wo, eya.
- 18 Unkan, Itancan yatkan ye, eye ça wakiškotpa kin nape kin on kun akihde, qa yatke kiya.
- 19 Unkan ayaştan hehan, Camo nitawa kin nakun hena on mini awau kta, yatkan ayaştanpi kin hehanyan, eya.
- 20 Qa inahni qa wakiškotpa kin cankaškotpa tanka kin okaştan, qa inyanka minihdoka kin ekta mini huwe ya heon, qa camo kin owasin mini wicakahi.
- 21 Unkan wicašta kin yuşinyaye ça taku eye şni, canku ohna u kin he Jehowa ohinniyan tanyan ikiyuştan kta hecinhan he sdoneyeni kta.
- 22 Unkan camo kin mini yatkan ayaştanpi, hehan wicašta qon mazaskazi maza oin tanka, mazaska hanke iyecen tke, he icu qa nakun maza huhu nom mazaska wikcemna iyecetu, hena owasin wikoška nape kin en ye kiya ;
- 23 Qa, Tuwe hunkake yaya he ? Omakiyaka wo, niyate ti kin ohna unkiwankapi kta okan he ? eya.
- 24 Unkan, Milka cinhintku Betuel Nahor kiciton kin he cunwintku kin miye ce, eya.
- 25 Qa, Peji puze ça taku yutapi ko ota, qa nakun wankapi kta okan ce, eciya.
- 26 Unkan wicašta qon pamahdedan yanke ça Jehowa cekiye ça,
- 27 Jehowa Abereyam mayuhe cin taku wakan da kin he yawaştepi nunwe. Towicake towaonşida ko mayuhe cin ektakiya ayuştan şni, tuka mayuha sunkaku ti kin canku kin ohna Jehowa amau ce, eya.
- 28 Unkan wikoška kin dus hde ça iye hunku ti kin en hena owasin oyaka.
- 29 Rebeka timdoku wan yukan, Laban eciyapi, qa Laban iş dus iyaya wicašta qon ekta minihdoka kin en.
- 30 Laban oin tanka, qa maza huhu tankşitku nape kin akan wanyake ça Rebeka tankşitku oie ye cin, Wicašta kin hecen emakiya eye cin he nahon qa, hehan wicašta qon minihdoka kin ekta, camo kin icahda najin kin en hi.
- 31 Qa heya, Jehowa he niyawaşte kin u wo. Tokeca tankan nayajin he ? Miş tipi kin wanna wiyeya wakaga, camo yukanpi kte cin nakun.
- 32 Unkan wicašta qon tipi kin ekta hi ; unkan camo kin kiyuşke ça peji puza taku yutapi ko camo kin qu, qa mini on siha hdujaja kta wicašta om hi kin nakun hdujajapi kta e au.
- 33 Qa woyute nakun qu. Unkan, Taku on wahi kin owahdake şni kinhan

onspadan wate kte sni ce, eya. Unkan, Ia wo, eya.

34 Unkan, Abereyam tahoksidan wan he miye :

35 Qa Jehowa he mayuhe cin nina yawašte, qa tahin wanuyanpi qu, qa pte, qa mazaska, qa mazaskazi, qa wicašta winyan ko wowindag wicaye cin, qa camo, qa šuktanka šonsonna, hecen wicašta okinihan.

36 Qa mayuhe cin tawicu kin Sara cinca wan ton, mayuha wanna wicahinca hehan he kiciton, unkan taku yuhe cin owasin kiçu.

37 Qa Kanani makoce tawapi kin en manke cin he cunwintkupi kin etanhan micinksi on winohinca duze kte sni :

38 Tuka hunkake wicawaye cin tipi kin ekta de kte ça, takuwicawaye cin etanhan micinksi on winohinca wan duze kta ce, mayuhe cin eya konza, keye maši.

39 Unkan, Ok ni winohinca kin mici u kte sni, mayuhe cin ewakiya.

40 Unkan, Taku wakan wada Jehowa itokam mawani kin, he taohnihde wan nici ye ši kte ça, mitakuye qa ate ti kin etanhan, winohinca wan micinksi on duze kta e, canku yaye cin tanyan ihuni niciye kta ce.

41 Tuka taku eya konze ciciye cin nihiyahde kte sni, takuwicawaye cin ekta de cinhan, qa niçupi sni kinhan, hehan taku eya konze ciciye cin iyahde niçiye kte sni, emakiya.

42 Unkan nakaha minihdoka kin ekta wahi qa hepa, Jehowa Abereyam mayuhe cin he wakan nida, canku ohna wau kin tanyan ihuni mayakiya hecinhan ;

43 Iho miš minihdoka kin icahda nawajin qa wikoška wan mini huwe hiyu qa, Wakiškotpa duhe cin etanhan mini onge yatke makiya ye, ewakiye kta.

44 Unkan, Yatkan ye, qa nakun camo nitawa kin mini wicawakahi kta ce, emakiye cinhan, winohinca wan mayuhe cin cinhintku yuze kta e Jehowa kahnige cin hee kte.

45 Miš cante mahen ia nahahin mdaştan sni, unkan inyun Rebeka hinanpe ça, minihdoka kin ekta kun i qa mini icu ; unkan, Tokin yatke mayakiyen, ewakiya.

46 Unkan tawakiškotpa kin inahniyan kun ahi qa, Yatkan ye, qa camo nitawa kin nakun woyatke wicawaqu kta ce, eya ; unkan mdatke ça camo kin nakun yatkanpi.

47 Unkan imonge ça, Tuwe cunwintku niyan he ? ewakiya. Unkan Betuel cunwintku he miye, Nahor cinhintku Milka kiciton kin hee. Hehan oin tanka ite kin akan ewahnaka, maza huhu nakun nape kin akan.

48 Qa pamahdedan manke ça Jehowa cewakiya, Jehowa Abereyam mayuhe cin taku wakan da kin he mayuhe cin cinhintku kin on, mayuhe cin

sunkaku cunwintku iwacu kta e canku wicaka ohna amau kin he mdatan.

49 Qa niyepi wanna wowaonśida wowicake ko mayuhe cin ecayeconpi kte cinhan omakiyakapo, qa ecayeconpi kte śni kinhan omakiyakapo : etapa tanhan mduhomni kta qa is catka tanhan, eya.

50 Unkan Laban Betuel ko ayuptapi qa Taku kin de Jehowa etanhan u qa taku śica qa is taku wašte unkeniciyapi kta unkokitpanipi ce, eyapi.

51 Iho Rebeka nitokam *un* ; icu qa hda wo. He niyuhe cin cinhintku kin yuze kta, Jehowa oie ye cin iyececa.

52 Unkan Abereyam taokiye kin iapi hena nahon qehan, Jehowa ohoda kta e makata patuś iyaya.

53 Hehan ookiye qon mazaska oin qa mazaskazi oin ikikcu, wokoyake nakun, qa hena Rebeka qu, timdoku hunku ko taku tehika wacaqu.

54 Hehan wotapi qa wayatkanpi, iye wicašta opapi kin hena koya.

Wankapi qa hanhanna kiktapi qa, Mayuhe cin ekta hdicu mayan wo, eya.

55 Unkan timdoku hunku ko, Wikoška unkipi yanke kte, wikcemna can hehayan, hehan ye kta ce, eyapi.

56 Unkan, Jehowa is canku mitawa kin tanyan ihuni mayan heon mayutehanpi śni po. Mayuhe cin ekta kihde mayanpo, ewicakiya.

57 Unkan, Wikoška kin unkipi qa, iye i kin etanhan unkiwangapi kta ce, eyapi.

58 Qa Rebeka kipanpi, qa, Wicašta kin de kici de kta he ? eciyapi. Unkan, Mde kta ce, eya.

59 Unkan Rebeka tawinohtinpi kin ye yapi, qa azinkiyeye ciqon, qa Abereyam taokiye, qa wicašta tawa nakun.

60 Qa Rebeka yawaštepi qa, Unkitawinohtinpi kin he niye, kektopawinge oyawa tanka icaga wo, qa cinca wicayaye kte cin toka wicayapi otonwe kin yuhapi kte, eciyapi.

61 Hehan Rebeka najin, wikoška yuhe cin nakun, qa camo akan iyotankapi, qa wicašta qon kici iyayapi. Hecen ookiye qon Rebeka icu qa kihda.

62 Wanna Izak minihdoka, Tuwe ni un kin wanmayaka tawa kin hetanhan u, qa makoce puze cin en iyotanka.

63 Qa htayetū ca Izak cekiyeye kta e manin ya, hehan wankan etonwe ça camo upi kin wanwicayaka.

64 Rebeka nakun wankan etonwe ça Izak wanyake ça camo kin etanhan ipsica.

65 Qa ookiye kin heciya, Wicašta wan itkounkipapi hewoskan omani kin he tuwe ? Unkan, Mayuhe cin hee, ookiye kin eya. Unkan ite akaḥpe wan icu qa aihdahpa.

- 66 Unkan ookiye kin, taku token econ kin owasin Izak okiyaka.
67 Hehan Izak iye hunku Sara tawakeya kin mahen Rebeka tin ye ši, qa yuze ça tawicu kin wašte kidaka. Hecen Izak iye hunku Sara te cin iyohakam iwacintonhnag yapi.

WICOWOYAKE 25.

- 1 Hehan ake Abereyam winohinca wan yuza, Qetura eciyapi.
2 Unkan cinca kiciton kin dena eepi, Zimran, qa Joksan, qa Medan, qa Midian, qa Isbak, qa Suha.
3 Unkan Joksan is Seba qa Dedan kicitonpi. Unkan Dedan is Asurim, qa Letusim, qa Lumim cinksi wicaya.
4 Unkan Midian cinca wicaye cin, Epa, qa Heper, qa Hanok, qa Abida, qa Eldaha. Hena owasin Qetura cinksi wicaya.
5 Unkan Abereyam taku yuhe cin iyuhpa Izak qu.
6 Tuka winohinca uman cinca Abereyam kicitonpi kin hena Abereyam taku wicaqu, qa nahahin iye ni un kin wiyohiyanpata makoce kin ekta ye wicası, cinhintku Izak etanhan.
7 Abereyam anpetu tawa kin waniyetu ni un kin dena ee, waniyetu opawinge sanpa wikcemna sakowin sanpa zaptan, hehayan ni.
8 Hehan Abereyam niya sni ta iyaya, pa ska wašte, qa wicahinca imna ; hehan taoyate kin ekta okipa yapi.
9 Qa cinca wicaye cin Izak Ismayel kici kihnakapi ; Makpela immija ohdoka kin en Mamore itokam, Zohar Heti he cinhintku Epron tamaga qon en.
10 Maga wan Abereyam Het cinca wicaye cin opewicakicaton, he en Abereyam hnakapi, tawicu Sara kici.
11 Unkan Wakantanka, Abereyam te cin iyohakam, cinhintku kin Izak yawašte, qa Izak Tuwe ni un qa wanmayake cin minihdoka tawa kin ekta ounyan.
12 Hagar Egupton kin Sara tawikoška kin he Abereyam cinca wan kiciton, Abereyam cinhintku Ismayel wicoicage tawa kin dee.
13 Ismayel cinca wicaye cin cajepi kin deepi, wicowazipi qa cajepi kin iyececa. Ismayel cinca tokapa kin he Nebayot, hehan Qedar, qa Adbel, qa Mibsam ;
14 Qa Misma, qa Duma, qa Masa ;
15 Hada, qa Teman, Jetur, Napis qa Qedma.
16 Hena Ismayel cinksi wicaya ; toki tipi qa tonwanyanpi kin ecen eciyapi, wicastayatapi ihdawapi ake nom, taoyatepi kin om.

17 Ísmayel ni un kin waniyetu kin dena ee, waniyetu opawinge sanpa wikcemna yamni sanpa śakowin, henakeca ; hehan niya śni ʔa iyaye ʔa taoyate kin ekta okipa yapi.

18 Hunka wanjin wicaye cin owasin wicehna ʔa. Hawila etanhan Śur itokam un kin ektakiya de cin ʔa hetanhan Aśur etu makoce kin he en ounyanpi.

19 Unkan Izak Abereyam cinhintku wicoicage tawa kin dee, Abereyam he Izak kicitonpi.

20 Unkan Izak wanna waniyetu wikcemna topa, hehan Rebeka yuza, he Betuel Arami kin he cunwintku, Aram Mdaye kin etanhan, Laban Arami kin tawinohtin kin hee tawicu kta e yuza.

21 ʔa Izak tawicu kin cinca ton śni kin heon, Jehowa icekiya. Unkan Jehowa anakicigoptan, hecen Rebeka Izak tawicu kin ihduśaka.

22 Unkan hokśiyoqopa Rebeka mahen akinicapi ; unkan, De taku hwo hecetu kta hecinhan token on hemaca he ? eye ʔa Jehowa iwange kta e ekta i.

23 Unkan, Nitamni kin mahen oyate nonpa, ʔa nitezi kin etanhan oyate nonpa inanpapi kta, ʔa oyate wan waśaka keś oyate uman sanpa waśake kta, ʔa hakakta kin he tokapa kin wowidake yuhe kta ce, Jehowa eciya.

24 Unkan anpetu cinca ton kte cin wanna henakeca, ʔa inyun tamni kin mahen cekpa yukan.

25 Unkan tokapa kin hiyu owancaya gi, pte ha śina iyecen ; unkan Esa eya caśtonpi.

26 Hehan sunkaku kin hiyu, ʔa nape kin Esa siyete kin yus un ; heon Jakob eya caś kiton. Hena tonpi kin ehan, Izak waniyetu wikcemna śakpe.

27 Unkan hokśipidan tanka icagapi, ʔa Esa wotihni wayupika, wicaśta hewoskan un kin heca, tuka Jakob wicaśta wahbadan wakeya oti.

28 Unkan Izak Esa wašte kidaka, taku o kin yuta heon. Tuka Rebeka Jakob wašte kidaka.

29 Unkan Jakob wahanpi ohe cin icunhan Esa tinta kin etanhan u ʔa watuka un ;

30 ʔa, Akihan maṭe kta heon wahanpi śa kin de onge maqu wo, mdatke kta ce, Esa Jakob eciya. Heon Edom eya caje yatapi.

31 Unkan, Watonikapa kin he nakaha maqu wo, Jakob eya.

32 Unkan Esa, Wanna maṭe kta ʔa watomakapa kin de taku okihi kta he ? eya.

33 Unkan Jakob, Nakaha Wakantanka icajeyan emakiya wo, eya. Unkan Wakantanka icajeyan eciya. Hecen Esa watokapa tawa kin he Jakob qu.

34 Unkan Jakob omnica hanpi aguyapi kici Esa qu, unkan yute ʔa yatkan

qa najin, qa toki iyaya. Hecen Ēsa watokapa kin ihakta śni.

WICOWOYAKE 26.

- 1 Unkan makoce kin he en wicaakiĥan tokeca wan, Abereyam anpetu tawa icunhan wicaakiĥan tokaheya qon he iyohakam. Unkan Izak Piliśtim tawicaśta yatapi Abimelek eciyapi ekta i, Gerar etu.
- 2 Unkan Jehowa iye en tanin iĉiye ĉa heciya, Egupta ekta de kte śni ce, makoce wan ociciyake kte cin hen yanka wo.
- 3 Makoce kin de en ounyan wo, kinhan nici waun qa ciyawaśte, qa makoce kin dena owasin ciĉu kta, nicinca ko wokonze Abereyam niyate konza ewakiye cin he wahdusuta ;
- 4 Qa nicinca yuota wakiye kta maĥpiya wicanĥpi sukaza iyenaka, qa makoce kin dena owasin nicinca wicawaqu kta, qa oyate maka kin ohnaka owasin nicinca kin on yawaśtepi kta.
- 5 Nakaeś Abereyam miho kin anamagoptan qa mitawoahope, mitawokonze, mioie, qa mitoope kin hena yuhe cin heon etanhan.
- 6 Unkan Izak Gerar en ounyan.
- 7 Unkan wicaśta heciya tipi kin tawicu kin on iwangapi ; unkan, Mitankśi kin dee ce, eya. Rebeka owanyag waśte, qa iye on okini wicaśta deciya yakonpi kin maktepi kta *ecin* heon, Mitawin dee eye kte cin itonpa.
- 8 Unkan wanna anpetu ota hen yanke ĉehan, Piliśtim wicaśta yatapi Abimelek ojanjan hdepi wan etanhan eyokasin qa Izak tawicu Rebeka kici śkata e wanwicayaka.
- 9 Hehan Abimelek Izak kico qa, Awicakehan nitawin hee. Tokeca, Mitawinoĥtin dee ehe ciqon he ? eya. Unkan okini iye on maĉe kta epce cin heon hepa ce, Izak eya.
- 10 Unkan, De taku ecaunyeconpi he ? Wanna ecan oyate etanhan wicaśta wan nitawin kici iwanke kta unkanś, taku śica iyahde unyayapi kta tuka ce, Abimelek eya.
- 11 Qa Abimelek oyate tawa owasin iwakta wicaya, Tuwe wicaśta kin de yutan, qa iś tawicu yutan kinhan ĉe kta ce, eya.
- 12 Unkan, Izak makoce kin he en woju, qa omaka kin he en opawinge akiĥde kamna. Hecen Jehowa Izak yawaśte.
- 13 Unkan wicaśta kin tanka qa ohinniyan tanka aya, wijica hinca.
- 14 Qa oiĉihde, tahinca, qa pte wanuyanpi, qa ookiye ota yuha ; heon Piliśtim icekinpi.
- 15 Unkan miniĥdoka, tona atkuku taokiye qapi qon atkuku Abereyam ni qehan, hena owasin Piliśtim aohduteyapi, maka okatapi.

- 16 Unkan Abimelek Izak heciya, Unkiyepi etanhan toki iyaya wo, waunśakapi keś niś sam iyeya waniśaka ce.
- 17 Unkan Izak hetanhan iyaye a Gerar kaksiza kin he en eti, qa hen iyotanka.
- 18 Qa minihdoka atkuku Abereyam ni kin icunhan qapi qon, qa Abereyam e cin iyohakam Piliśtim kin hena aohduteyapi kin, hena ake Izak qe a Abereyam caś ton qon hena iyecen Izak caje yata.
- 19 Qa Izak hokśidan wicayuhe cin kaksiza ohna qapi qa, en minicaduza minihdoka wan iyeyapi.
- 20 Hehan Gerar wanuyanpi wihan wicakiyapi tawa kin, Izak wanuyanpi wihan wicakiyapi tawa kin om akinicapi qa, Mini kin he unkitawapi ce, eyapi ; heon minihdoka kin he Esek Izak caś ton, heciya kiyuśepi kin heon.
- 21 Unkan ake minihdoka tokeca wan qapi ; unkan he on nakun akinicapi, heon he Sitna caśton.
- 22 Qa hetanhan ihdaka ye a minihdoka tokeca wan qapi, qa he on akinicapi śni. Unkan he Rehobot eya caś kiton ; Wanna Jehowa tankaya unkiyukanpi kaga makoce kin en, heon unkiagapi kta ce, eya.
- 23 Unkan hetanhan itawankanhde ye a Berśeba ekta i.
- 24 Unkan hanyetu kin he en Jehowa tanin iiye a heciya, Niyate Abereyam taku wakanda kin he miye ce. Wikopeśni un wo ; niyate Abereyam mitaokiye kin heon nici waun, qa ciyawašte, qa nicinca yuota wakiye kta ce.
- 25 Unkan kakiya wahna wośnapi wan kage a Jehowa caje kin hoye kiye a, kakiya wakeya oti, qa kan Izak taokiye kin minihdoka wan qapi.
- 26 Hehan Abimelek Gerar etanhan Izak en hi ; iye takodaku Ahuzat, Pikol taakicita tancan koya.
- 27 Unkan, Śice mayadakapi qa niyepi kin etanhan toki iyaye mayaśipi, qa tokeca en mayahipi he ? Izak ewicakiya.
- 28 Unkan, Unkanitonwanpi qa Jehowa nici un kin he wanunyakapi qa, Iho wokonze yuke kte, unkiyotahedan qa odakonkiciyapi unnicagapi kta ce, unkeyapi.
- 29 Hecen unkiś unniyutanpi śni, qa taku wašte ecedan ecaunniconpi, qa wounkiyapi iyaye unniśipi kin he iyecen, niś dehan Jehowa niyawašte, taku śica ecaunyeconpi kte śni, eyapi.
- 30 Unkan wowicakihe a wotapi qa wayatkanpi.
- 31 Qa ihanhanna kiktapi qa konza ekiciyapi, napin hunka wanjitku kici heconpi qa, Izak kihde wicaśi. Unkan wookiye iyayapi.
- 32 Anpetu kin he en Izak taokiye kin en hipi, qa minihdoka qapi kin he okiyakapi qa, Mini iyohi unyanpi ce, eyapi.

33 Unkan, Konzapi eya caś kiton. Heon anpetu kin de hehanyan otonwe kin heciya un kin Berśeba eciyapi.

34 Unkan Esa wanna waniyetu wikcemna topa, hehan Beri Ĥeti kin he cunwintku Judit, qa Elon Ĥeti he cunwintku Basmat, henios wicayuzā. Hena napin on, Izak Rebeka ko cante śicapi.

WICOWOYAKE 27.

1 Unkan Izak wanna wicahinca iśta kin mdeze śni, hecen wawanyake śni ; hehan Izak cinhintku tokapa kin Esa kipan qa, Micinkśi, eya. Unkan, Iho miye ce, eya.

2 Unkan, Wanna wicamahinca, qa tohan maṭe kte cin sdonwakiye śni.

3 Ceciya ce, nakaha wipe ikikcu wo, wanju itazipa ko ikikcu, qa hewoskan ye ḡa tado imakihni wo.

4 Qa maṭe kte cin itokam, minagi kin niyawaśte kta e, tado skumna taku waśte wadaka heca micage, ḡa makau wo. Wate kta ce, eya.

5 Unkan Rebeka Izak cinhintku Esa okiye cin he nahon. Unkan Esa atkuku kin on wotihni kta e hewoskan iyaya.

6 Hehan Rebeka cinhintku Jakob heciya, Iho niyate Esa nicinye okiya nawahon ;

7 Qa, Tado makau qa taku skumna waśte micaga wo ; wate kta qa maṭe śni kin itokam Jehowa itokam ciyawaśte kta ce, eciya.

8 Heon micinkśi token econ ciśi miho kin anamakigoptan ye.

9 Ecadan wanuyanpi ekta ye ḡa tatokadan cinca nom waśte imakicu ye, kinhan tado skumna wecage kta, niyate waśte daka iyececa.

10 Unkan niyate ṭe cin itokam niyawaśte kta e en ayai kta ; unkan yute kta ce.

11 Unkan, Jakob hunku kin Rebeka heciya ; Ecah micinye Esa wicaśta hin śma heca, qa miś wicaśta śduśduta hemaca.

12 Okini ate mayutan kte cinhan wicahnayesa wan iyececa iyemaye kta, hecinhan mayaśicapi kin he iyahde miḡiye kta, mayawaśtepi kin hee kte śni ce.

13 Unkan, Micinkśi niyaśicapi kin he miye en amaupi nunwe. Tokeśta miho kin anamakigoptan, qa imakicu ye, hunku kin eciya.

14 Unkan ekta ye ḡa ikikcu qa hunku kin en au ; unkan hunku kin tado skumna atkuku waśte dake cin iyecen kaga.

15 Hehan Rebeka śina waśte wan, cinhintku tokapa Esa he tawa ti kin ohna yuhe cin he icu, qa cinhintku hakakta Jakob in kiya.

16 Qa tatokadan cincadan ha kin he Jakob nape kin, qa tahu śduśduta kin

akan ehnaka.

17 Qa tado skumna kage ciqon aguyapi koya cinhintku Jakob nape kin en qu.

18 Unkan atkuku kin en au qa, Ate, eya. Unkan, Iho micinkí ni tuwe he ? eya.

19 Unkan Jakob atkuku kin heciya, Esa nicinkí tokapa kin he miye ce. Token emayakiye cin ecen ecamon ce. Ceciciya najin qa iyotanka wo ; qa ninagi kin mayawašte kta e tado awahi kin yuta wo, eya.

20 Unkan, Micinkí token inahniyan iyeyaya he ? Izak cinhintku kin eciya. Unkan Jehowa wakanyada kin he itkomakim u kiya heon etanhan, eya.

21 Unkan, Micinkí mikiyedán u wo, ciyutan kta ce, Esa micinkí kin de niye qa ís dee sni uman tukte sdonwaye kta, Izak Jakob eciya.

22 Hehan Jakob atkuku Izak ikiyedán hinajin, unkan yutan qehan, Ho kin Jakob ho kin hee, tuka nape kin Esa nape kin eepi, eya.

23 Nape kin hin sma cincu Esa nape kin iyececapí ; heon etanhan iyekiye sni, qa Jakob yawašte.

24 Esa micinkí kin de niye he ? eya iwanga. Unkan, Han he miye ce, eya.

25 Unkan, Mikiyedán u wo. Minagi kin niyawašte kta e, taku micinkí o kin wate kta ce, eya. Unkan ikiyedán hinajin, unkan wota, miniša nakun en au ; unkan yatkan.

26 Hehan atkuku Izak, Iho micinkí mikiyedán u qa i imaputaka wo, eciya.

27 Unkan en ye ça i iputaka, unkan wokoyake omna kin he omna, qa yawašte qa, Micinkí omna kin he tinta wan Jehowa yawašte omna kin he iyececa.

28 Qa Wakantanka mahpiya cu kin niçu kte ça nakun maka kin wasna qa aguyapi qa miniša ko ota.

29 Oyate wowindag wicayaye kta nitokam wicašta yatapi makata ehpeiçiyapi kta. Nihunka wanji yuha un wo, qa nihun cinca wicaye cin nitokam patujapi kta, tuwe niyašice cin yašicapi kte, qa tuwe niyawašte kin yawaštepi kta ce, eya.

30 Wanna Izak Jakob yawašte hdaštan, unkan Jakob atkuku Izak itoye kin etanhan kitana aisinyan iyaya, hehan cincu Esa wotihni kin etanhan hdi.

31 Qa ís nakun tado skumna kage ça atkuku kin en ahi, qa atkuku kin heciya, Ate najin qa nicinkí taku o kin etanhan yuta wo ; ninagi kin mayawašte kte cin heon etanhan.

32 Unkan atkuku Izak, Ni tuwe he ? eciya. Unkan, Nicinkí tokapa Esa he miye ce, eya.

33 Unkan Izak woyušinyaye tanka hinca on nina yušinyaya ; Token tuwe

tado ihni qa makahi, unkan owasin etanhan wata, yahi śni ehan, qa mdawašte qa nakun iye yawaštepi kta ce, eya.

34 Esa atkuku oie kin nahon hehan nina ceye ça śicahowaye ça, Ate miś nakun mayawašte ye, atkuku kin eciya.

35 Unkan, Nisunka hi qa wohneye kin eciya tanhan niyawaštepi kin icu, eya.

36 Unkan, Jakob eciyapi caje kin iyecetu śni he ? Wanna nonpa yuśna mayan ; watomakapa kin he tokaheya ki qa nakaha mayawaštepi kin icu ; eye ça, Woyawašte wan miyecipatan śni he, eya.

37 Unkan Izak ayupte ça, Ecah ohiniciye kte he wakage, ça hunka wanjin wicaye cin owasin wicayuhe kta waqu, aguyapi miniśa ko yuhe kta waqu, qa dehan micinkśi taku ecacicon kta he ? Esa eciya.

38 Unkan, Ate woyawašte kin wanjidan duha he ? Miś nakun mayawašte wo, ate, Esa atkuku kin eciye ça, Esa panyanhan ceya.

39 Unkan atkuku Izak ayupte ça, Maka wasna kin ohna ounyaye kte ça mahpiya cu kin aniu kte ;

40 Qa nitacanhpi kin on yani kte ça nisunka wowidag niye kta ; tuka tohan waśaka inicage cinhan iye tawanapin nitahu kin etanhan dukse kta ce, eciya.

41 Unkan Esa Jakob śice kidaka, woyawašte kin on atkuku kin yawašte kin heon etanhan, qa Esa cante kin mahen heya ; Ate aceyapi kte cin anpetu kin hena wanna ikiyedana qa, hehan misunka Jakob wakte kta ce.

42 Unkan Rebeka he cinhintku tokapa token ie cin he okiyakapi, unkan ekta ye śi qa, cinhintku hakakta Jakob kico qa, Iho nicinye Esa niye tokiçon qa nikte kta e oiçiya ce.

43 Iho micinkśi miho kin anamakigoptan ye. Najin qa timdo Laban en Haran ektakiya najica ya ye.

44 Qa timdo kici nanke kta anpetu tonana ; nicinye canniye niye cin ayuśtan kin hehanyan.

45 Nicinye wocanniye aniyuśtan qa, taku ecayecon akiktonje cin hehantu, kinhan hetanhan icicu kta e wahociye kta ce. Ehaeś token on etanhan anpetu wanjidan en niye napin makitaninpi kte śni he ? eciya.

46 Unkan Rebeka Izak heciya, Wani kin he wanna owihanketa, Het cunwintku wicaye cin on etanhan, Jakob winohinca wan dena iyececa, Het cunwintku kin etanhan, yuze cinhan token on wani kta he, eya.

WICOWOYAKE 28.

1 Hehan Izak Jakob kipan, qa yawašte qa wahokonkiye ça, Kanan

cunwinkupi kin etanhan winohinca duze kte śni.

2 Najin Aram Mdaye kin ekta ya wo, nihun atkuku Betuel ti kin ekta, qa hetanhan timdoku Laban cunwintku kin etanhan winohinca wan yuza wo.

3 Qa Taku wakan iyotan waśake cin niyawaśte, qa iyakiçuya yuota niciye kta, qa oyate ota yaun kta.

4 Qa Abereyam yawaśtepi kin niçu, makoce wan en ounyaye cin Wakantanka Abereyam qu qon he nicinca om yahduhe kta, eciya.

5 Hecen Izak Jakob ye śi : unkan iyaya Aram Mdaye kin ekta, Betuel cinhintku Laban Arami kin en, Jakob Esa kici hunkupi kin Rebeka timdoku kin hee.

6 Unkan Izak Jakob yawaśte, qa Aram Mdaye kin ekta ye śi kin, heciya tanhan winohinca wan yuze kta, qa yawaśte qehan, Kanan cunwinkupi kin etanhan winohinca duze kte śni ce, eciye cin he Esa wanyaka.

7 Unkan Jakob atkuku hunku kici anawicagoptan, qa Aram Mdaye kin ektakiya ya.

8 Unkan Kanan cunwinkupi kin iye atkuku Izak iśta kin en śicapi e Esa wanyake çehan ;

9 Esa Iśmayel ekta i, qa Abereyam cinhintku Iśmayel cunwintku Mahalat, Nebayot tawinohtin kin he yuza, tawicu nonpa tuka he nakun yuza.

10 Unkan Jakob Berśeba etanhan iyaya Haran ektakiya.

11 Qa toki i kin hen iwanka, wi wanna iyaya nakaes, qa inyan hen yanke cin etanhan icu, qu ipahin ekihnake ça heciya iśtima.

12 Qa wihanmde ça inyun taku iyadipi wan makata han, qa pa kin mahpiya kin ekta iyohiya ; unkan Wakantanka ohnihde wicaye cin adipi qa kun hiyupi.

13 Qa inyun Jehowa iwankam najin qa, Niyate Abereyam taku wakan da qa Izak taku wakan da kin Jehowa he miye ce. Makoce akan nunke cin he ciçu kta nicinca koya.

14 Qa nicinca maka watuśekśeca *sukaza* kin iyenakapi kta, eniciciya idade kta wiyohpeyata, qa wiyohiyanpata, qa waziyata, qa itokaga, qa niye nicinca koya en wicowazi tona maka akan unpi kin owasin yawaśtepi kta.

15 Iho miś nici waun, qa toki da eśta awanciyake kta, qa makoce kin de ekta acihdi kta, ehpeciye kte śni, tohan taku ociciyaka wahduśtan śni kin hehanyan, eya.

16 Unkan Jakob wihanmde cin etanhan kikta qa, Awicakehan Jehowa den yanka, tuka miś sdonwaye śni, eya.

17 Hecen kokipe ça, Oyanke kin de itonpapi kta tuka ce, Wakantanka ti kin qa mahpiya tiyopa kin dee śni he ? eya.

- 18 Qa hanhanna hehan Jakob najin qa inyan wan ipahin ehnake ciqon he icu, qa wokiksuye kte cin ehde, qa he pa kin akan wihdi akaŝtan.
- 19 Qa oyanke kin he Betel, (Taku Wakan ti kin) eya caŝton, tuka tokag ehan otonwe kin he Luz eciyapi.
- 20 Unkan Jakob wokonze wan iŝiconze a heya, Wakantanka mici un kinhan, qa canku kin de ohna mde cin he ohna awanmayake cinhan, qa aguyapi wate kta maqu qa wokoyake komayake kta nakun ;
- 21 Qa ate ti kin ekta tanyan wahdi hecinhan, Jehowa eceedan wakanwada kta ce.
- 22 Qa inyan wokiksuye ewehde kin de Wakantanka tipi tawa kta ce, qa taku mayaqu kte cin owasin etanhan, iwikcemna kin ciu kta ce.

WICOWOYAKE 29.

- 1 Hehan Jakob Wiyohianpata cinca tamakocepi kin ektakiya siha on mani iyaya.
- 2 Qa etonwe a inyun tinta ohna minihdoka wan, qa tahin wanuyanpi optaye yamni heciya minihdoka kin icahda wankapi, minihdoka kin he etanhan optaye kin mini wicaqupi ece. Unkan minihdoka i kin akan inyan tanka wan yanka.
- 3 Unkan hen optaye kin owasin mniciyapi eca, minihdoka i kin akan tanhan inyan kin yuptanyanpi qa, tahinca kin mini wicaqupi ca inyan kin hen yanke kte cin minihdoka i kin akan ehnapapi.
- 4 Unkan, Hunka wanjin ciyapi tokiya tanhan yaunpi he ? Jakob ewicakiya. Unkan, Haran unketanhanpi ce, eyapi.
- 5 Unkan, Laban Nahor cinhintku sdonayayapi he ? ewicakiya. Unkan, Han he sdonunyanpi ce, eyapi.
- 6 Unkan, Zaniyan un he ? ewicakiya. Unkan, Zaniyan un, nakun wanyaka wo ; cunwintku Rahel tahin wanuyanpi kin om hiyu ce, eyapi.
- 7 Unkan, Anpetu nahahin tanka ihan. Wanuyanpi mniciyapi kte cin nahahin iyehantu ŝni. Tahinca mini wicaqupi qa wihan wicakiyapo, eya.
- 8 Unkan, Unkokitpanipi ce ; optaye kin owasin mniciyapi kin, hehan inyan kin minihdoka i kin etanhan yuptanyanpi kinhan, hehan tahinca kin mini wicunqupi kta ce, eyapi.
- 9 Om wohdaka icunhan, Rahel atkuku tahinca tawa om hi ; wihan wicakiya nakaes.
- 10 Hecetu unkan Jakob, iye hunku kin he timdoku Laban cunwintku Rahel he wanyake a, hunku timdoku kin Laban tahinca tawa nakun, qa Jakob ikiyedani qa, inyan qon mini hdoka i kin akan tanhan yuptanye a,

hunku kin he timdoku Laban tahnca tawa mini wicaqu.

11 Qa Jakob Raḥel i iputake ḥa ho taninyan ceya.

12 Qa Jakob Raḥel heciya, Niyate sunkaku kin hemaca, Rebeka cinhintku kin he miye ce. Unkan inyang hde ḥa atkuku okiyaka.

13 Unkan Laban he tawinohtin cinhintku kin Jakob taku ohdake cin nahon qehan, itkokim inyang ye ḥa, poskin yuze ḥa, i iputake ḥa ti kin timahen u ši. Unkan *Jakob* Laban hena taku kin owasin okiyaka.

14 Unkan, Miḥu, qa miceḥpi kin he niye ce, Laban Jakob eciya. Unkan anpetu tona wi wanḥidan en un kin kici yanka.

15 Unkan Laban Jakob heciya, Hunka wanḥin ciye cin on ituya wowidag ciye kta he ? Taku iyuwin yacin kin he omakiyaka wo, eya.

16 Wanna Laban cunwintku nonpa, tokapa kin Leha eciyapi, qa hakakta kin Raḥel eciyapi.

17 Qa Leha iṣta kin wankadan ; tuka Raḥel okaḥ waṣte owanyag waṣte ḥinca.

18 Unkan Jakob Raḥel waṣte dake ḥa, Raḥel nicunkṣi hakakta kin he on waniyetu ṣakowin wowidag mayaye kta, eya.

19 Unkan he ciḥu kinhan waṣte kta ; wicaṣta tokeca waqu kinhan waṣte kte ṣni. Mici ti wo, Laban eya.

20 Unkan Jakob Raḥel on waniyetu ṣakowin okiya ; tuka he waṣte dake cin on iṣta kin en anpetu tonana yawa.

21 Hehan, Mitawin maqu wo, kici imunke kta, anpetu kin wanna henakeca ce, Jakob Laban eciya.

22 Unkan Laban otonwe kin wicaṣta owasin mnawicaye ḥa wowicakihan.

23 Qa otpaza hehan cunwintku Leha he icu, qa Jakob en au. Unkan kici wanka.

24 Unkan Laban wikoṣka wan yuhe cin Zilpa, he icu qa cunwintku Leha wikoṣka yuhe kta e qu.

25 Ihanhanna inyun Leha hee, qa Jakob Laban heciya, Raḥel on ociciye ṣni he ? Tokeca mayahnayan he ?

26 Unkan, Hakakta kin tokaheya qupi, qa hehan tokapa kin deciya hecen econpi ṣni ;

27 Anpetu ṣakowin kin de ihuniyan wo ; kinhan he nakun ciḥu kta, tokata waniyetu ṣakowin tokeca omayakiye kte cin heon etanhan, Laban eya.

28 Unkan Jakob ecen econ, qa ṣakowin kin he ihuniyan. Unkan Laban cunwintku Raḥel he tawicu kta e qu.

29 Qa wikoṣka wan yuhe cin Bilha, he Laban cunwintku Raḥel wikoṣka yuhe kta e qu.

- 30 Unkan Jakob Raḥel kici wanke ɕa, nakun Raḥel wašte dake ɕa, ake waniyetu śakowin uman Laban cajeyate ciqon he yuśtan.
- 31 Unkan Leha śice dakapi kin he Jehowa wanyake ɕa, Leha tamni kin yuḥdoka, tuka Raḥel cinca ton śni.
- 32 Unkan Leha ihduśake ɕa, cinca ton, qa Ruben eya caś kiton ; Makiyuśepi kin Jehowa wanyaka, unkan dehan mihihna wašte madake kta ce, eya.
- 33 Qa ake ihduśake ɕa cinca ton, qa, Śice madapike cin he Jehowa nahon, qa cinca kin de nakun maqu, eye ɕa, Śimeyon eya caś kiton.
- 34 Qa ake ihduśake ɕa cinca ton qa, Wanna detanhan mihihna tinsa mahduze kta : Wanna cinca yamni weciton, eye, ɕa Lewi eya caś kiton.
- 35 Unkan ake ihduśake ɕa cinca ton qa, Dehan Jehowa mdatan kta ce, eye ɕa, Juda eya caś kiton. Hehan cinca ton kin ayuśtan.

WICOWOYAKE 30.

- 1 Unkan Raḥel Jakob cinca kiciton śni e wanhdake ɕa, Raḥel he cunku inakiwizi qa Jakob heciya, Cinca maqu ye, *hecanon* śni kinhan maṭe kta ce.
- 2 Unkan Jakob canniye ye ɕa, Raḥel heciya, Miye Wakanmatanka kecanni he ? Iye taku tamni ton kin onanitaka ce.
- 3 Unkan, Iho wikośka mduhe cin Bilha he ekta ya ye ; unkan miśiyoto kin akan cinca ton kinhan, iye etanhan cinca waton kta ce ;
- 4 Eye ɕa wikośka yuhe cin Bilha he tawicu kta e qu. Unkan Jakob he en i.
- 5 Unkan Bilha ihduśake ɕa Jakob cinca kiciton.
- 6 Unkan Wakantanka mayaco qa, nakun houwaye cin namaḥon, qa cinca wan maqu, Raḥel eye ɕa, Dan eya caś ton.
- 7 Unkan ake Raḥel tawikośka Bilha ihduśake ɕa cinca icinonpa Jakob kiciton.
- 8 Unkan Wakantanka omakiye ɕa micun kici ḥtawani, qa ohiwaya ce, Raḥel eye ɕa, Neptali eya caś ton.
- 9 Unkan Leha cinca sanpa ton śni e wanhdake ɕehan wikośka yuhe cin Zilpa icu, qa Jakob tawicu kta e qu.
- 10 Unkan Leha wikośka yuhe cin Zilpa, he Jakob cinca kiciton.
- 11 Unkan, Wicota kta, Leha eye ɕa, Gad eya caś ton.
- 12 Unkan Leha wikośka yuhe cin Zilpa Jakob cinca icinonpa kiciton.
- 13 Unkan, Wopida mayanpi, cunwintku unpi kin mayawaštepi kta ce, Leha eye ɕa, Aśer eya caś ton.
- 14 Unkan aguyapi baksapi kin icunhan Ruben magata iyaye ɕa, dudaim iyeye ɕa hena hunku kin ekta kai. Unkan Raḥel Leha heciya ; Nicinkśi

dudaim au kin etanhan maqu ye.

15 Unkan, Mihihna yaki kin he taku cistina naceca, micinksi dudaim tawa kin, he nakun iyacu kta he ? eciya. Unkan, Nicinksi dudaim tawa kin he on hanyetu kin de nici iwanke kta ce, eya.

16 Unkan htayetu hehan, Jakob maga tanhan hdi ; unkan Leha itkokim inanpe ça, Miyahna yau kta, micinksi dudaim tawa kin hena on opeciton ce, eya. Unkan hanyetu kin he kici wanka.

17 Unkan Wakantanka Leha anagoptan : unkan ihduśake ça cinca izaptan Jakob kiciton.

18 Qa, Wikoksa mduhe cin he mihihna waqu kin heon, Wakantanka iyunwin maqu, Leha eye ça, Isakar eya caś kiton.

19 Unkan ake Leha ihduśke ça cinca isakpe Jakob kiciton.

20 Qa, Nakaha Wakantanka taku wašte itumakihan, mihihna cinca śakpe weciton, heon detanhan mici ti kta ce, eye ça, Zebulon eya caś kiton.

21 Qa he iyohakam cinca winyan ton qa, Dina eya caś kiton.

22 Unkan Wakantanka Rahel kiksuye ça Wakantanka anakicigoptan, qa tamni kin yuhdoka.

23 Unkan ihduśake ça cinca wan ton qa, Taku iyamaonpapi qon Wakantanka wanna emicihdaku ;

24 Qa Wakantanka cinca tokeca wan nakun maqu kta, eye ça, Josep eya caś kiton.

25 Unkan Rahel Josep ton kin hehan, Jakob Laban heciya, Wanna hde mayan wo. Mitamakoce qa toki manke kte cin ekta wahde kta.

26 Mitawin micinca ko maqu wo, wahde kta ce ; hena on token htawani, qa wowindag mayaye cin niś sdonyaya ce.

27 Unkan, Tokin ništa kin en iyocicipin, niye on etanhan Jehowa mayawašte wahdukcan.

28 Taku on omayakiye kta atayedan omakiyaka wo ; hecece cinhan ciçu kta ce, Laban eciya.

29 Unkan, Niś token ociciye ça, nitawanuyanpi kin token mici unpi qon sdonyaya.

30 Wahi kin itokam taku cistina duhe ciqon, qa wanna ota aye ça, misiha kin eciya tanhan Jehowa niyawašte. Unkan wanna tohan wati ohnaka kin on taku miçicage kta he ? eya.

31 Unkan, Taku ciçu kta he ? eya. Unkan Jakob heciya, Takudan mayaqu kte śni, tuka taku kin de eanon kinhan ake tahinca nitawa kin awanwicamdake kta.

32 Nakaha wanuyanpi owasin ehna mawani kta, qa tona hdehdega qa hdehdeze cin iyog iyewicawaye kta, tahinca wanuyanpi kin tona gigi kin

owasin, qa tatokadan tona hdehdege ça hdehdeze cin heniyos akipam ewicawahde kta ; qa tokata tahin wanuyanpi ehna tona gigi, qa tatokadan ehna tona hdehdega hdehdeza ko, hena iyunwin mitawa kta.

33 Unkan tokata miohan owotanna mihduotanin kta ; taku mitawa nitokam u kinhan, tatokadan tona hdehdegapi sni, qa hdehdezapi sni, qa tahin wanuyanpi ehna tona gigi sni kin hena owasin mawanon kehe kta.

34 Unkan, Tokin token ehe cin hecetun, Laban eya.

35 Qa anpetu kin he en tatokadan mdoka tona hdehdeza hdehdega ko, qa tatokadan wiye tona hdehdege ça hdeškaška kin owasin, tona akan hin san kin hena koya owasin, akipam ewicahdaku, tahin wanuyanpi ehna tona gigi kin nakun owasin, qa hena cinksi wicaye cin nape kin en wicaqu.

36 Qa anpetu yamni imani, iye Jakob kici ihehanyan kaga. Unkan Laban woteka optaye ihe cin hena Jakob wihan wicakiya.

37 Qa Jakob can sakadan icu, waga teca qa can su, qa uma hena owasin etanhan icu, qa ha kin pago hdeza, ska tanin kta e hecen hdehdeza kaga.

38 Qa watpadan tukten wanuyanpi mini yatkanpi kin hena ohna, can sakadan pago qon ehde, wanuyanpi itokapa tanhan, unkan wanuyanpi yatke upi en kiyuhapi ece.

39 Hecen can sakadan qon ekta wanuyanpi kin kiyuhapi, qa wanuyanpi hdehdeza hdehdega hdeškaška ko wicatonpi.

40 Unkan Jakob tacincadan yukinukan ewicahnake ça, wanuyanpi itepi kin taku hdeza ektakiya ewicahde, Laban wanuyanpi gigi kin owasin, qa wanuyanpi tawa kin yukinukan ewicahde, Laban tawanuyanpi kin kici ewicahde sni.

41 Qa tohan wanuyanpi wašakapi kiyuhapi eca, Jakob can sakadan qon watpadan ohna wanuyanpi ista kin wicitokam ehde ; can sakadan kin ekta kiyuhapi kta e hecon.

42 Tuka wanuyanpi wankapidan eca, ehde sni, hecen tona wankapi kin hena Laban tawa, qa tona wašakapi kin hena Jakob tawa.

43 Hecen wicašta kin tanka hinca icage ça wanuyanpi ota ton, qa nakun winyan taokiye, qa hoksidan, qa camo, qa šuktanka šonšonna.

WICOWOYAKE 31.

1 Hehan, Taku ate unyanpi tawa qon he owasin Jakob icu, qa taku ate yuhe ciqon etanhan, woyuha tanka kin de owasin icicaga, Laban cinksi wicaye cin eyapi kin Jakob nahon.

2 Qa Laban ite kin he nakun Jakob wanyaka, qa iye ektakiya wanna tokeca.

- 3 Nakun, Niyate makoce tawapi kin ekta, qa takuwicayaye cin ekta hda wo, kinhan nici waun kta ce, Jehowa Jakob eciya.
- 4 Heon Jakob tuwe ekta ye sí qa, tawicu napin Rahel Leha kici, tinta kin heciya, tawanuyanpi kin ekta wicakico.
- 5 Qa, Niyatepi kin wanna tokeca amatonwe cin wanmdaka, tuka ate taku wakan da kin mici un.
- 6 Qa token owakihi ohinniyan niyatepi kin owakiya sdonayayapi ;
- 7 Tuka niyatepi kin mahnaye ça, wikcemna akihde taku maqu kte cin yutokeca, tuka kiunni maye kte cin Wakantanka iyowinye síni.
- 8 Kaken, Hdehdegapi kin hena iyunwin duhe kta ce, eye çehan, waunyanpi kin owasin hdehdegapi kin heca ece wiconpi ; qa, Hdehdezapi kin hena iyunwin nitawa kta eye çehan, hehan wanuyanpi owasin hdehdezapi heca ece wiconpi ece.
- 9 Hecen Wakantanka niyatepi tawanuyanpi kin ki ece, qa he maqu.
- 10 Wanuyanpi kin kiyuhapi eca wiwahanmde ça, ewatonwe ça, inyun tamdoka hdehdeza hdehdega hdeškaška hecapi ko, wanuyanpi akan adipi e ísta on wanmdaka.
- 11 Nakun wiwahanmde ça, Wakantanka taohnihde ye cin hemakiya ; Jakob. Unkan, Iho miye ce, epa.
- 12 Unkan, Ísta yuwankan ikikcu qa, tamdoka wanuyanpi adipi kin awiconwan wo ; hdehdeza hdehdega hdeškaška hecapi ; token Laban ecanicon kin he owasin wanmdaka ce.
- 13 Taku wakan Betel en tanin içiye cin he miye, hen wokiksuye sdayaye ça, hen taku konza emayakiya. Wanna najin, qa makoce kin de etanhan, iyaye ça taku wicayaye cin ekta hda wo, eya.
- 14 Unkan Rahel Leha ko ayuptapi ; Ate ti kin ohna taku unhapi kte ça taku unkitawapi kte cin yukan he ?
- 15 Oyate tokeca unhdawapi síni he ? Wiyopeunyanpi, qa nakun mazaska unkitawapi kin owasin yusota.
- 16 Heon woyuha ate unyanpi kin etanhan Wakantanka ki kin he iyuhpa unkiye unkitawapi, qa unkcincapi tawapi ce. Iho wanna token Wakantanka econ nişi kin owasin ecen econ ye, eyapi.
- 17 Unkan Jakob najin, qa cinca tawicu ko owasin camo akan ewicahnaka,
- 18 Qa atkuku Izak en Kanan makoce kin ekta kihde kta e tawanuyanpi kin owasin awicaya, woyuha icicage cin, qa taku tonpi kiton kin, taku Aram Mdaye kin en ihdamna kin owasin.
- 19 Wanna, Laban tahinca kin hduşda iyaye çehan, Rahel he atkuku terapim tawa kin manon.
- 20 Unkan Jakob Laban Arami kin cante kin manon, najica iyaya, okiyake

śni nakaes.

21 Hecen najica, taku tawa kin owasin hduha najin, qa watpa kin iyuwege
ça, Gilead he kin ektakiya etonwan.

22 Unkan anpetu iyamni kin hehan, Jakob wanna najica Laban okiyakapi.

23 Unkan hunka wanjin wicaye cin wicakico, hena om okide ye ça,
śakowin can icimanipi hehan, Gilead he kin en kihdegapi.

24 Unkan, Wakantanka hanyen Laban Arami kin en hi qa, wihanmde cin
en heciya, Ihnuhan taku wašte taku śica uman tukte kašta eyakiye cin, eya.

25 Unkan Laban Jakob kihdege çehan, Jakob he kin en wakeya oti, qa
Laban hunka wanjin wicaye cin om Gilead he kin hiyahanpi.

26 Qa Laban Jakob heciya, Taku tokanon micante kin mayahnaye ça,
micunksi canhpi on wayaka iyecen awicayahda.

27 He tokeca e hecanon he ? Anamayakihbe ça, maniçinon, omayakidake
śni. Omayakidaka unkanś wiyuškinyan iyaye ciye ça, cicaidowan, qa cancega
candowankiyapi ko ciciyahoton kta tuka hecanon.

28 Micinca wica winyan ko i iwicawaputake kte, iyowin mayakiye śni.
Wanna witkoya hecanon.

29 Dehan taku śica ecacicon kta nape wamaśaka, tuka niyate taku wakan
da kin hinhan hemakiya ; Ihnuhan Jakob taku wašte taku śica uman tukte
kašta eyakiye cin, eya.

30 Wanna niyate ti kin ekta yahde kte hinca, tuka tokeca Taku wakan
mitawa kin mayanon he ? eya.

31 Unkan Jakob waayupte ça, Kowakipe cin heon, qa okini nicunksi kin
hena mayaki kta naceca ce epe cin heon hecamon ;

32 Taku wakan nitawa kin tuwe kici iyeyakiye cinhan, he ni kte śni. Hunka
wanji unye cin wicitokam, taku nitawa mici un kin, tukte e he, iyukcan qa
ikikcu wo. Rahel hena manon tuka Jakob he sdonye śni, qa heciya.

33 Hehan Laban Jakob tawakeya kin en ti mahen i, Leha tawakeya kin
nakun, qa wikośka nonpa tawakeyapi kin ; tuka iyekiye śni ; hehan Laban
Leha tawakeya kin etanhan hdinanpe ça, Rahel tawakeya kin en i.

34 Tuka Rahel terapim kin icu, qa camo aqinpi kin en ehnaqe ciqon, qa
akan iyotanka. Unkan Laban wakeya kin owancaya yutan qa iyekiye śni.

35 Unkan atkuku kin heciya, Itancan nitokam nawajin owakitpani, hececa
šta canniye maye śni ye. Winohinca ayakonpi kin hemaceca ce. Unkan nina
akita tuka terapim kin iyekiye śni.

36 Unkan Jakob canniye ça, Laban kige, Taku śica ecamon qa wawahtani
kin tukte e he, on hecen mayakuwa ?

37 Mitawahpaya kin owasin mayakidutan, wakśica yati kin etanhan wanji
iyeyaye cin tukte e he ? takuwicunye cin wicitokam ehnaqa wo ; hecece

cinhan uman tukte unkitawa kta yukcanpi nunwe.

38 Waniyetu wikcemna nonpa kin dena nici waun, tuka tawiyedan nitawa kin kpapi śni, qa, nitawanuyanpi tamdoka kin hena wate śni.

39 Taku yahdecapi kin niye en cicai śni, he miye piya wakaga ce. Hanyen manonpi kin, qa anposkan manonpi kin he koya, minape kin etanhan mayakida.

40 Kaken waun, anposkan ipuza maṭa, qa hanyen osni ; woístima miišta kin amayuştan.

41 Miye waniyetu wikcemna nonpa kin yati kin en wowidag mayaye ; waniyetu ake topa nicunkśi nonpa on, qa waniyetu śakpe nitawanuyanpi kin on, ociciye ṅa, taku mayaqu kte cin wikcemna akihde mayadutokan.

42 Ate taku wakan da kin, Abereyam taku wakan da kin qa Izak Tokokipe kin, mici un kin ; hecetu śni unkanś wanna cokadan kihde mayaśi kta tuka ; mawahbadan kin qa minape htanipi kin he Wakantanka wanyake ṅa, hinhan iyopeniyan ce, Jakob Laban eciya.

43 Unkan Laban waayupte ṅa, Jakob heciya, Cinca winyan kin dena micunkśi eepi, qa hokśidan kin dena micinca eepi, qa wanuyanpi kin dena wanuyanpi mitawa eepi, qa taku niye wanyahdake cin he iyuhpa mitawa ce. Tuka de micunkśi qa íś cinca wicatonpi kin dena, nakaha taku ecawicawecon kta he ?

44 Tokin wanna wicoun unkcigen, miye qa niye, hecen waayatanin unkiyotahedan yuke kta.

45 Unkan Jakob inyan wan icu, qa wokiksuye e pasdata :

46 Qa, Inyan icupo, Jakob hunka wanjin wicaye cin ewicakiya. Unkan inyan icupi, qa paha wan kagapi qa, hen paha kin akan wotapi.

47 Unkan paha kin he, Igar sahaduta Laban eya caşton ; tuka Jakob he Galed eya caşton.

48 Unkan Laban heya, Anpe dehan paha kin de unkiyotahedan waayatanin kta ; Galed Waayatanin paha kin he ka, paha kin he eciyapi.

49 Qa, Micunkśi wicayakiduşe, qa winohinca tokeca duze cinhan, wicašta tuwe he atonwe kta unkici un śni, unkiyotahedan Wakantanka he waayatanin kta.

50 Tohan kinukankiya unkiyaye cinhan Jehowa unyacopi kta, Laban eye ṅa, Wayaco caş ton.

51 Qa, Wanyaka wo, paha kin de, wokiksuye unkiyotahedan ewehde kin de ;

52 Paha kin waayatanin, wokiksuye kin de waayatanin, taku śica on paha kin de kapeya imdamde ṅa niye en cii kte śni, qa niś kapeya yahihdu qa hiyohi mayaye kte śni.

53 Abereyam taku wakan da kin, Nahor taku wakan da kin, hunkake wicayapi taku wakan dapi kin unyacopi kta, Laban Jakob eciya. Unkan Jakob iye atkuku Izak Tokokipe kin cajeyan konza.

54 Hehan Jakob he kin akan woşnapi wan wakiyuşna, qa aguyapi yutapi kta e hunka wanjin wicaye cin wicakico. Unkan aguyapi yutapi qa he kin en wankapi.

55 Unkan ihanhanna Laban kikta qa iye cinca wica winyan ko i iwicaputake a, wicayawaşte qa, hehan Laban tohe kin ekta kihda.

WICOWOYAKE 32.

1 Unkan Jakob tacanku kin ohna iyaye a, Wakantanka ohnihde wicaye cin iktokim hipi.

2 Unkan Jakob wanwicayake ehan, Wakantanka wicobe tawa kin dee ce, eye a oyanke kin he Mahanaim caş ton.

3 Hehan Jakob Edom wojupi kin Sehir makoce kin etu, cincu Esa ti kin ekta, ohnihde wicaye cin ye wicaşi.

4 Qa wahokonwicakiye ca, Itancan mitawa Esa hecen eyakiyapi kta ce, eya ; Laban kici wati qon dehantu.

5 Qa pte, qa şuktanka şonşonna, qa tahinca, qa hokşidan wikoşka ko, ota wicamduha, qa onşimayada kta e itancan ociciyag ye wicawaşi, nitaokiye Jakob eya.

6 Unkan Jakob ohnihde wicaye cin hdipi qa, Nicinye Esa ekta unkipi unkan is nitkokim u qa, wicašta opawinge tom opapi ce, eyapi.

7 Hehan Jakob nina kokipe a, oyate kici un kin nonpakiya ewicakihde, tahinca, pte, camo, ko owasin oşpaye nonpa wicakaga.

8 Qa Esa oşpaye wanji en hi qa hena wicakte kinhan, oşpaye uman okapte cin inaşdoke kta ce, eya.

9 Hehan Jakob heya, Abereyam ate waye wakan nida, qa ate Izak wakan nida Jehowa niye, Nitamakoce, qa takuwicayaye cin ekta hda wo, kinhan taku waşte ecacicon kta ce, emayakiye ciqon ;

10 Miye nitowaonşida qa iewicayake cin owasin nitaokiye ecayecon kin aopten waun ; sagye kin heceyedon hduha Jordan watpa kin de imduwege a, wanna oşpaye nonpa imacaga.

11 Wanna cinye nape kin etanhan emahdaku wo ; Esa nape kin etanhan ; hi kinhan cinca hunkupi kin kici mikte kta kowakipa ce.

12 Niye, Ohinniyan taku waşte ecacicon kte a, wiyaka mini wanca kahda sukaza utkana on yawapica şni, iyenaka nicinca wakage kta ehe ciqon, eya.

13 Unkan hanyetu kin he hen wanka, qa taku cincu Esa qu kte cin ikikcu,

taku nape en hiyu ;

14 Tatokadan wiye opawinge nonpa, qa mdoka wikcemna nonpa, tahin wanuyanpi wiye opawinge nom mdoka wikcemna nonpa ahna ;

15 Camo azinkiyapi wikcemna yamni cincapidan om, pte wikcemna tom, qa tatanka wikcemna, súktanka sósonna wiye wikcemna nonpa cincadan wikcemna ahna.

16 Qa ookiye wicayuhe cin woteca otoiyohi kinnukan yuhe wicaśi, qa, Optaye otoiyohi yukinukan awicahiyayapo, ewicakiya.

17 Qa tokaheya kin wahokonwicakiya, Tohan cinye itkonicipapi kinhan, qa, Tuwe tawa niyan he ? qa toki da qa taku nitokam un kin he tuwe tawa he ? eya iniwange cinhan ;

18 Hehan, Nitaokiye Jakob dena tawa, tuka itancan mitawa Esa qu kta ; unkan ís nakun unkihektam u ce, ehapi kta ce, ewicakiya.

19 Unkan inonpa, qa iyamni, qa nakun owasin tona optaye ihakam yapi kin, Esa iyeyayapi kinhan oie kin hena iyecen eyakiyapi kta ce :

20 Nakun, Nitaokiye Jakob unkihektam u ce, ehapi kta ce, ewicakiya. Taku waqu kin mitokapa tanhan ye cin, hecen ite kin iyokipi waye kta, qa hehan ite kin iyowinmakiye kta ce, eya.

21 Unkan taku qu kin, he tokata iyokipta ; tuka ís hanyetu kin he taobe kin om wanka.

22 Qa hanyetu kin he en, najin qa tawicu nonpa kin iwicacu qa cinca wicaye cin ake wanji, qa Jabok oiyuwege kin en iyuwega.

23 Qa iwicakikcu, qa watpa kin iyuweh wicaye ça, taku tawa kin owasin iyuweh wicakiya.

24 Qa Jakob ísnana hekta yanka, unkan wicaśta wan anpao kin hehanyan kici kiihduśpa.

25 Qa wicaśta kin tokadan ohiye śni e wanhdake çehan, cecunte okihe kin en yuza ; unkan kici kiihduśpapi kin icunhan, Jakob cecuntośtan kin papśon iyaya.

26 Unkan, Amayuśtan wo ; wanna anpao hinanpa ce, eya. Unkan, Mayadawaśte śni kinhan, aciyuśtan kte śni ce, eya.

27 Qa, Token eniciyapi he ? eya. Unkan Jakob emakiyapi ce, eya.

28 Unkan, Nicaje Jakob eniciyapi kte śni. Detanhan Israel eniciyapi kta, Wakantanka wicaśta ko, kici kiihduśpe ça niye ohiyaya ce, eciya.

29 Unkan, Tokin nicaje kin omayakidaken, Jakob eya iwanga. Unkan, Token on etanhan micaje kin inonga he ? eye ça hen yawaśte.

30 Unkan, oyanke kin he, Ite wakan, Jakob eya caś ton. Taku Wakan ite icitkokim wanmdaka eśta minagi kin zaniyan un ce, eya.

31 Unkan Ite wakan iyokipte çehan, anpetu wi hinanpa, qa Jakob ceca kin on huśte.

32 Heon etanhan Israel cinca wicaye cin anpetu kin dehan ceca śkotpa kin akan kan kiksuye śni qon he yutapi śni ; Jakob ceca śkotpa kin akan kan kiksuye śni kin he oyutan kin heon etanhan.

WICOWOYAKE 33.

1 Unkan Jakob wankan etonwe a inyun, Esa u, wicašta opawinge tom kici wanwicayake a, hokśiyoqopa kin akipam ewicakihde, Leha kici, a Rašel kici, a wikoška nonpapi kin om.

2 Qa wikoška kin cinca wicayapi kin om tokaheya ye wicaśi, a hena ihektapa tanhan Leha cinca wicaye cin om, a hena ihektapa tanhan Rašel Josep kici.

3 Qa iye owasin wicitokam ye a, cincu ikiyedana u kin icunhan śakowin akihde patuja.

4 Unkan, Esa itkokim inyanke a, nape kin yuze a tahu kin akan ehpeiiye a i iputaka, a napin ceyapi.

5 Hehan Esa wankan etonwe a, tawicu cinca wicaye cin ko wanwicayake a, Dena token takuyaya he ? eya. Unkan, Wakantanka towaonśida kin on nitaokiye cinca qu kin dena eepi ce, eya.

6 Hehan wikoška kin cinca wicayapi kin om ikiyadan hipi, a patujapi.

7 Hehan Leha cinca wicaye cin om ikiyadan hi a patujapi ; a ehake Josep Rašel kici ikiyadan hipi, a patujapi.

8 Unkan, Optaye kin dena owasin itkowicawakipe cin, token yaka he ? eya. Unkan, Mayuhe cin išta kin iyokipi ciye kta e heon.

9 Unkan, Misunka taku ota wahduha ce. Taku nitawa kin hduha un wo, Esa eya.

10 Unkan, Hiya niišta kin iyokipi ciye cinhan, minape kin etanhan taku waqu kin iyacu kta, nitohnake Wakantanka itohnake iyecen wanciyake a iyocicipi kin heon etanhan.

11 Tokin taku ciyawašte kin en aniupi kin he iyacun. Wakantaka onśimada ece, a taku owasin mduha, Jakob kitanyan eya ; unkan icu.

12 Qa heya, Ihdaka unye a miye tokaheya mde kta ce.

13 Unkan, Hokśiyoqopa wankapidana e mayuhe cin sdoneye a, nakon tahinca pte ko ihduśaka micicapi a, anpetu wanjidana keś awicapapi kinhan, wanuyanpi owasin api kta.

14 Tokin itancan nitaokiye itokam yahden, a miś wanuyanpi mitokam token manipi, a hokśiyoqoqa kin token manipi kin, ecen iwahnanna mde kta, mayuhe cin ekta Sehir en wai kin hehanyan.

15 Unkan, Iho oyate mici unpi kin etanhan wanjikśi nici ehpewicawaye

kta ce, Esa eya. Unkan tokeca e, mayuhe cin ísta kin iyocicipi hecinhan, eya.
 16 Unkan anpetu kin he en, Esa tacanku kin ohna Sehir ektakiya kihda.
 17 Tuka Jakob Sukot ekta unhdaka i qa, hen tipi içicage ça, taku tawa kin nakun ohanzi hdepi wicakicaga ; heon otonwe kin he Sukot eya cajeyatapi.
 18 Qa Jakob Aram Mdaye kin etanhan u qehan, Śekem otonwe tawa kin Kanan makoce kin etu zaniyan hi, qa otonwe kin itokam ticaga.
 19 Qa makoce onśpa, tukten wakeya iticage cin, Śekem atkuku Hamor cinca wicaye cin napepi kin etanhan opewicacaton, mazaska opawinge nom wicaqu.
 20 Unkan hen wahna wośnapi wan kage ça, El Israel ta-Wakantanka kin eya caśton.

WICOWOYAKE 34.

1 Hehan Dina Leha he cunwintku Jakob kiciton kin, he makoce wicinypidan wanwicayake kta e toki iyaya.
 2 Unkan wicaśta yatapi ihdawa Hamor Hiwi kin he cinhintku Śekem, he, wanyake ça icu qa kici wanka, hecen wiewaku.
 3 Qa Śekem nagi kin Dina Jakob cunwintku kin en nina iyaskape ça wikośka kin wašte dake ça, wikośka cantohnag ye cin ecen okiya.
 4 Qa, Wicinayanna kin de miciyuza wo, Śekem iye atkuku Hamor eciya.
 5 Unkan cunwintku yuaśapapi kin he Jakob nakihon, tuka cinkśi wicaye cin tinta ekta wanuyanpi om yakonpi, qa hdipi kin hehanyan Jakob inina yanka.
 6 Unkan Hamor Śekem atkuku kin Jakob kici okiye kta e en i.
 7 Unkan Jakob cinkśiwicaye cin tinta kin etanhan hdipi, qa he nahonpi, qa iyokiśicapi ; nina canniye yapi. Jakob cunwintku kin kici iwankapi : hecen econpi kte śni tuka, Israel witkoya ecakiconpi heon etanhan.
 8 Unkan Hamor hewicakiya, Micinkśi Śekem nagi kin nicunkśipi kin iyaskapa ; he tawicu kta e qupo.
 9 Kinhan taku unkiciyapi kta ; nicunkśipi kin hena unqupo, qa niś cunkśi wicunyanpi kin wicayuzapo.
 10 Qa unkiyepi om dukanpi kta, makoce kin nitokam un kta ce, en unpo qa makoce kin en wopetonpi qa he yuhapo.
 11 Qa Śekem wikośka atkuku timdo wicaye cin ko hewicakiya ; Cantemakiyapo, kinhan token emayakiyapi kin ecen ciçupi kta.
 12 Wikośka kin mitawin un kta e mayaqupi kinhan, wohpayapi iyakiçuya tanka mayakidapi, taku qupi tanka eśta ; token emayakiyapi kin ecen ciçupi kta.

- 13 Unkan Jakob cinkási wicaye cin tawinohtinpi kin Dina yuśapapi qon kiksuyapi, qa heon Śekem he atkuku Hamor kici hnayeya awicayuptapi.
- 14 Qa, Taku hececa econpi unkokitpanipi. Wicaśta wan ha iyotan kin baħdayapi śni kin heca tankási unyanpi kin unqupi kinhan, he wiśten unkiçiyapi kta naceca.
- 15 Decehnana on unkaniyuptapi kta ; unkiś baunkihdayapi kin, niś nakun tona wica owasin henicecapi kinhan ;
- 16 Hehan cunkási wicunyanpi kin unniçupi kta, qa nicunkásipi kin wicunyuzapi kta, qa nicipi oununyanpi qa oyate unwanjipidan kta.
- 17 Tuka taku de en anaunyagoptanpi śni kinhan, baniçihdayapi śni kinhan, cunkási unyanpi kin he unkikikcupi, qa toki unkiyayapi kta ce, ewicakiyapi.
- 18 Unkan, Hamor Śekem Hamor cinhintku kici wicoie kin he wašte dakapi.
- 19 Qa kośka kin Jakob cunwintku kin cantiheya, heon taku eyapi kin kohanna econ. Iye atkuku ti kin ohna yakonpi kin hena owasin iyakapeya kinihanpi.
- 20 Hehan Hamor iye cinhintku Śekem kici otonwe tawapi kin ekta kipi, qa otonwe tawapi kin wicaśta om wohdakapi, qa heyapi,
- 21 Wicaśta kin dena unkiyepi om wokiyapi, heon makoce kin en ounyanpi qa, hen iciyopeyapi kte. Ito makoce kin wicitokam tankaya un kinhan, cunwintkupi kin wicunyuzapi kta, qa cunkási wicunyanpi kin wicunqupi kta.
- 22 Tuka decehnana on wicaśta kin wicadapi kta ; wiciye bakiħdayapi kin he iyecen unkiye tona wica owasin baunkihdayapi kinhan ; unkiye om ounyanpi, qa oyate unwanjipidan kta.
- 23 Decehnana en anawicungoptanpi kinhan, unkiyepi om ounyanpi kta ; kinhan tawanuyanpi, qa taku yuhapi kin owasin, taku tonpi koya unkitawapi kte śni he ? eyapi.
- 24 Unkan wicaśta tona otonwe tiyopa kin omanipi kin hena owasin, Hamor iye cinhintku Śekem kici anawicagoptanpi, qa bakiciħdayapi, tona wica otonwe tiyopa kin omanipi kin owasin.
- 25 Unkan anpetu iciyamni kin yazanpi kin icunhan, Jakob cinhintku kin nonpa, Śimeyon Lewi kici Dina timdo wicaya, tacanhpipi kin ikikcupi, qa kokipeśniyan otonwe kin tatpe ipi, qa tona wica owasin wicaktepi.
- 26 Hamor iye cinhintku Śekem ko canhpi hi kin on wicaktepi, qa Dina Śekem ti kin etanhan ehdakupi qa hdohdapi.
- 27 Hehan Jakob cinkási wicaye cin wicakahugapi kin en ipi, qa, otonwe wan tankśitkupi kin yuśapapi qon he ocowasin wicakipi ;

28 Tahinca, qa tatanka, qa súktanka súnsonna, taku otonwe kin ohna un, taku magata un kin ko owasin icupi.

29 Taku yuhapi qon owasin tašiceca tawicupi ahna nakun wayaka icupi, qa taku tipi kin ohna iyeyapi kin owasin icupi.

30 Hehan Jakob Šimeyon Lewi kici hewicakiya, Iyoyag mayayapi, šicamna mayakagapi makoce wojutipi kin wicitokam, Kanani, qa Perazi kin, qa miye matonana hecen tamatpe mniciyapi, qa maktepi kta, hecen miš wati ohnaka ko owasin awimahnuni kta.

31 Unkan wihomnipi kin iyecen tankši unyanpi kin ecakiconpi kta iyececa he ? eyapi.

WICOWOYAKE 35.

1 Hehan Wakantanka Jakob heciya, Najin qa Betel ekta itawankanhde ye ça, hen onunyan wo. Nicinye Esa itohnake kin etanhan nayajice çehan, Taku wakan, niye en tanin içiye cin, he wahna wošnapı wan hen kicaga wo.

2 Unkan Jakob tiyoknaka tawa, qa tona kici unpi kin owasin hewicakiya ; Taku wakan tokeca duhapi kin, hena owasin yutokan iyewicayapo ; piiciyapi qa wokoyake teca ihduzapo ;

3 Qa najinpo, Betel ekta itawankanhde unyanpi kta ce. Heciya wahna wošnapı wan wakage kta, anpetu wan iyomakišice çehan, Taku wakan namañon, qa canku ohna imdamde cin mici ye cin, he wecage kta ce, eya.

4 Unkan Taku wakan tokeca yuhapi kin hena owasin Jakob qupi, oinpidan noge oinpi kin hena koya. Unkan hena owasin nahma, Šekem ekta utuhu wan he cin, he ihukuya.

5 Hehan ihdaka iyayapi, qa Jehowa otonwe ihdukšan unpi kin yušinye wicaya ; hecen Jakob cinkši wicaye cin wicakuwapi šni.

6 Unkan Jakob, iye oyate opeya un kin koya owasin, *otonwe wan* Luz eciyapi, Betel hee, Kanan makoce kin en, he ekta ipi.

7 Qa hen wahna wošnapı wan kage ca, oyanke kin he El Betel eya caš ton, cincu etanhan najica iyaye çehan, heciya iye en Wakantanka ihdutanin kin, heon etanhan.

8 Hehan Debora Rebeka azin kiye ciqon ʔa, unkan Betel hukun utuhu he cin, he ihukuya hnakapi, qa he, Utuhu oceyapi, eciyapi.

9 Wanna Jakob Aram Mdaye kin etanhan hiyu, hehan ake iye en Wakantanka tanin içiye ça yawašte.

10 Qa, Tokata Jakob nicaje qon eniciyapi kte šni, detanhan Israel eya cajeniyatapi kta, Wakantanka eciye ça, hecen Israel caš ton.

11 Qa, El Iyotan wašaka he miye ; ihduota qa cinca ota yuha wo ; oyate qa, oyate obe ota niye etanhan unpi kta, qa wicašta yatapi ninite kin etanhan

inanpapi kta.

12 Qa makoce wan Abereyam Izak kici wicawaqu qon, he niye ciçu kte ça nicinca nihektam unpi kte cin, makoce kin he wicawaqu kta ce, Wakantanka eciya.

13 Qa oyanke kin en, Wakantanka okiye ciqon hetanhan wankantkiya ikiyopta.

14 Unkan tukten okiye ciqon, he en Jakob wokiksuye wan ehde, inyan wokiksuye qa, wośnapi wan akaśtan, wiħdi nakun akaśtan.

15 Qa oyanke kin en, Wakantanka okiye ciqon, he Jakob Betel eya caś ton.

16 Hehan Betel etanhan ihdakapi, qa Eprata ikiyadan hipi, hehan Raħel hokśiksuye ça, kitan seh cinca ton.

17 Wanna kitan ecinyan cinca ton, hehan, Ihnuhan koyakipe cin, cinca kin de wica e nakun duhe kta ce, cincatonkiyesa eciya.

18 Unkan wanna te kta, nagi kin iyaya icunhan, Benoni eya caś kiton ; tuka atkuku kin Benjamin eciya.

19 Hehan Raħel ta, unkan Eprata, Betlehem hee, canku kin ohna hnakapi.

20 Qa Jakob wokiksuye wan ohna hnakapi kin ekta ehde. Raħel ohna hnakapi wokiksuye kin dehantu eciyapi.

21 Hehan Israel unhdake ça, Eder conkaśke kin akotanhan ewakeya.

22 Unkan Israel makoce kin he en ounye cin icunhan, Ruben iye atkuku tawicu Bilha ekta i, qa kici iwanka. Unkan Israel he nakiħon.

23 Jakob cinkśi wicaye cin ake nonpapi ce. Leha cinkśi wicaye cin, Ruben, Jakob cinhintku tokapa kin hee, Śimeyon, Lewi, Juda, Isakar, Zebulon henakeca.

24 Raħel cinkśi wicaye cin Josep, qa Benjamin.

25 Qa Bilha, Raħel tawikośka, cinkśi wicaye cin Dan, qa Neptali.

26 Qa Zilpa Leha tawikośka kin, cinkśi wicaye cin, Gad, qa Aśer. Henakiya Jakob cinkśi wicaya Aram Mdaye kin en wicatonpi.

27 Hehan Jakob iye atkuku kin ekta ki, Arba otonwe, Hebron hee, ekta Mamore etu hen Abereyam ounyan, qa Izak nakun.

28 Wanna Izak anpetu tawa waniyetu opawinge sanpa wikcemna śahdogan.

29 Hehan Izak ta, qa taoyate kin en okipapi, wicahinca qa anpetu kin wanna imna. Unkan cinkśi wicaye cin Esa, Jakob henios kihnakapi.

WICOWOYAKE 36.

1 Esa, Edom hee, wicowazi tawa kin dee.

2 Esa Kanan cunwintku kin etanhan winohinca nom wicayuza, Elon Ĥeti

kin cunwintku Ada, qa Zibeon Hiwi kin cunwintku Ana he cunwintku Aholibama *henioza*.

3 Qa Ísmayel cunwintku Basmat, Nebayot tankítku he nakun yuza.

4 Unkan Ada he Esa kiciton Elipaz hee : qa Basmat he Ruhel ton.

5 Qa Aholibama he Jehus, qa Jalam, qa Qora, wicaton. Esa cinkási wicaye cin, Kanan makoce kin en wicatonpi kin hena eepi.

6 Hehan Esa iye tawicu kin iwicacu, qa cinca wicaye cin wica winyan ko, qa tiyohnaka tawa wicanagi owasin, qa tawanuyanpi taku yuhe cin ko owasin, taku tawa Kanan makoce en ton kin iyuhpa, qa sunkaku Jakob itohnake kin etanhan ya, makoce tokeca wan ekta.

7 Taku yuhapi kin he odota, heon witaya iyotankapi kin okitpanipi, wanuyanpi ota yuhapi kin heon, makoce kin en ounyanpi kte cin iyowinwicakiye *śni*.

8 Unkan Esa Sehir he kin en iyotanka, Esa he Edom eciyapi.

9 Qa Sehir he kin en Edom oyate ateyapi Esa wicoicage kin dee.

10 Esa cinkási wicaye cin cajepi kin dena ee, Elipaz Esa tawicu Ada he cinhintku, qa Ruhel Esa tawicu Basmat he cinhintku.

11 Unkan Elipaz cinkási wicaye cin dena eepi ; Teman, Omar, Zepo, Gatam, qa Kenaz.

12 Unkan Elipaz Esa cinhintku Timna nahmana yuze cin he Ameleqe Elipaz kiciton. Esa tawicu Ada cinkási wicaye cin hena eepi.

13 Unkan Ruhel cinkási wicaye cin dena eepi ; Nahat, qa Zera, qa *Śama*, qa Miza. Esa tawicu Basmat cinkási wicaye cin hena eepi.

14 Unkan Aholibama Zibeon cunwintku Ana he cunwintku kin Esa yuza. Unkan he Esa cinca kiciton kin dena eepi ; Jehus, qa Jalam, qa Qora.

15 Esa cinca kin itancan unpi kin dena eepi. Esa cinhintku tokapa Elipaz cinkási wicaye cin, Teman itancan, Omar itancan, Zepo itancan, Qenaz itancan,

16 Qora itancan, Gatama itancan, Ameleqe itancan. Edom makoce kin en Elipaz itancanyan unpi kin hena eepi, qa hena Ada cinkási wicaya.

17 Unkan Esa cinhintku Ruhel cinca kin dena eepi : Nahat itancan, Zera itancan, *Śama* itancan, Miza itancan, Ruhel itancanyan unpi kin hena eepi, Edom makoce kin en, Esa tawicu Basmat hena cinkási wacaya.

18 Unkan Esa tawicu Aholibama he cinca kin dena eepi ; Jehus itancan, Jalam itancan, Qora itancan, Ana cunwintku Aholibama Esa yuze cin itancan ton kin hena eepi.

19 Esa, Edom hee, cinkási wicaye cin hena eepi, qa itancan yuhapi kin heepi.

20 Makoce kin he en iyotankapi qon Sehir Hori kin cinca dena eepi ;

Lotan, qa Śobal, qa Zibeon, qa Ana, qa Diśon, qa Ezer, qa Diśan.

21 Sehir cinkśi wicaye cin. Edom tamakoce kin en, Hori kin itancanyan unpi kin hena eepi.

22 Unkan Lotan cinkśi wicaye cin Hori, qa Heman, qa Lotan tawinohtin kin Timna ee.

23 Unkan Śobal cinkśi wicaye cin dena eepi ; Alan, qa Manahat, qa Ebal, qa Śepo, qa Onan.

24 Unkan Zibeon cinkśi wicaye cin dena eepi, Aya qa Ana ; Ana kin de atkuku Zibeon taśunka śonśonna wiħan wicakiye ċehan hopuza en wakoniya kata iyeya.

25 Ana cinhintku kin Diśon hee, qa Aholibama Ana cunwinku kin ee.

26 Qa Diśon cinkśi wicaye cin dena eepi, Ĥemdan qa Eśban, qa Jiteran, qa Keran.

27 *Unkan* Etzer cinkśi wicaye cin dena eepi, Bilhan, qa Zawan, qa Aqan.

28 Diśon cinkśi wicaye cin dena eepi, Uz qa Aran.

29 Hori kin itancanyan unpi kin dena eepi ; Lotan itancan, Śobal itancan, Zibeon itancan, Ana itancan,

30 Diśon itancan, Etzer itancan, Diśan itancan ; Hori kin itancanyan unpi kin, token Sehir makoce kin en itancan wicayawapi kin hena eepi.

31 Israel cinca kin nahahin wicaśta yatapi wanica, Edom makoce kin wicaśta yatapi wicayawapi kin dena eepi.

32 Behor cinhintku Bela Edom en wicayuħe cin, qa otonwe tawa Dinaba eciyapi.

33 Qa Bela ĩa, unkan hee kiya Zera cinhintku Jobab Bozra etanhan wicaśta yatapi yawapi.

34 Qa Jobab ĩa, unkan hee kiya Ĥuśam Teman makoce kin etanhan, wicaśta yatapi yawapi.

35 Qa Ĥuśam ĩa, unkan hee kiya Hadad Bedad cinhintku wicaśta yatapi yawapi. Iye Midian *oyate* kin wicakaśtaka, Moab tinta kin ohna qa otonwe en ti kin Awit eciyapi.

36 Qa Hadad ĩa, unkan hee kiya Samla, Masrika etanhan, wicaśta yatapi yawapi.

37 Qa Samla ĩa, unkan hee kiya Śaul, Rehobot watpa kin ohna wanke cin he etanhan, wicaśta yatapi yawapi.

38 Qa Śaul ĩa, unkan hee kiya Balhenan Akbor he cinhintku wicaśta yatapi yawapi.

39 Qa Balhenan Akbor cinhintku kin ĩa, unkan hee kiya Hadar wicaśta yatapi yawapi. Otonwe tawa Pahu eciyapi, qa tawicu kin Mehetabel eciyapi,

Matred cunwintku Mezahab cunwintku.

40 Esa itancan wicayawapi kin hecen ewicakiyapi, wicowazipi kin iyececa, qa tonwanyanpi kin iyecen cajewicayatapi ; Timna itancan, Alwa itancan, Jetet itancan,

41 Aholibama itancan, Ela itancan, Pinon itancan,

42 Qenaz itancan, Teman itancan, Mibsar itancan,

43 Magdiyel itancan, Iram itancan. Edom itancan wicayawapi kin hena eepi, tonwanyanpi kin iyecen, tamakocepi kin en ; Edom Esa ate yapi.

WICOWOYAKE 37.

1 Unkan Kanan makoce kin en Jakob atkuku unhdaka un qon, makoce kin he en Jakob iyotanka.

2 Jakob wicoicage wowapi kin dee, Josep wanna waniyetu ake śakowin, hehan wanuyanpi wiħan wicakiya cinye wicaye cin om, qa Bilha qa Zilpa napin atkuku wicayuze cin, hena cinkśi wicayapi kin om, hokśidan kin un qa taku śica eyapi kin ateyapi kin en ahda.

3 Unkan Israel, cinkśi wicaye cin owasin sam iyeya, Josep wašte kidaka wanna wicahinca ehan kicitonpi kin heon etanhan, qa onħdoħda hanska wan Josep kicaga.

4 Unkan ateyapi kin, cinkśi wicaye cin owasin sam iyeya Josep wašte kidake cin he cincu wanhdakapi, qa wokiya okiyapi kte cin okihipi śni.

5 Unkan Josep wowihanmde wan ihanmna, qa cincu owicakiyaka ; unkan sam iyeya śice kidakapi.

6 Unkan, Ihopo wowihanmde wan iwahanmde cin de nahonpo.

7 Maga ekta aguyapi paunħtapi, unkan inyun pawahte cin bosdan najin hiyaya, unkan payaħtapi kin ihdukśan najin hiyaye ĉa, pawahte cin itokam makata ehpeĩĉiyapi, ewicakiya.

8 Unkan cinye wicaye cin heciyapi, Ehanqon tawaunyayapi kta he ? qa iś wowidake unyaduhapi kta he ? Qa iyakapeya śice kidakapi, wihanmde ciqon oie ko heon.

9 Unkan ake wowihanmde tokeca wan ihanmde ĉa, ake cincu kin owicakiyaka. Ake wiwahanmde ĉa inyun anpetu wi, hanyetu wi, qa wicanħpi ake wanji mitokam makata ehpeĩĉiyapi, ewicakiya.

10 He atkuku cincu ko owicakiyaka ; unkan atkuku he iyopekiye ĉa, Wowihanmde wan iyahanmde cin de taku hwo ? Miye qa nihun nicinye ko *owasin* nitokam makipusdiya ehpeunkĩĉiyapi kta he ? eciya.

11 Unkan cincu kin icekinpi, tuka atkuku kin wicoie kin he awakicin un.

12 Hehan cincu kin ateyapi tawanuyanpi kin wiħan wicakiyapi kta e

Śekem ekta ipi.

13 Unkan Israel Josep heciya, Nicinye Śekem ekta wawihan kiya unpi śni he ? Iho wo hena ekta ye ciśi kta ce. Unkan, Ho miye ce, eciya.

14 Unkan, Iho ekta de a nicinye wanuyanpi ko zaniyan yakonpi hecinhan wanhdake a, hośi makahdi wo, eciya. Unkan Hebron kaksiza kin etanhan iyaye a Śekem ekta i.

15 Qa tinta onuni ; unkan wicaśta wan wanyake a, Den taku ayakita he ? eya iwanga.

16 Unkan, Cinye wicawaye cin awicawakita ce. Ceciye tukten wiħan wicakiyapi kin omakiyaka wo, eya.

17 Unkan wicaśta qon, Wanna detanhan iyayapi ; Dotan ekta unyanpi kta ce, eyapi nawahon ce, eya. Unkan Josep cinye wicaye cin wicihakam ye a Dotan en iyewicaya.

18 Unkan tehantanhan wanyakapi qa wicikiyedana u śni kin itokam, nahmana e yapı kta awacinpi.

19 Qa otoiyohi hunka wanjıtku kin hekiciyapi, Wanyakapo ; wiħanmdesa kin de wanna u.

20 Ihopo dehan unktepi, qa makoħdoka wan ohna ehpeunyanpi kte a, Wamanica ocin śica wan he temya ce, unkeyapi kinhan, wiħanmda ciqon toketu kte cin wanunyakapi kta ce, *ekiciyapi*.

21 Ruben he nahon qa, napepi kin etanhan ehdaku kta e, Unktepi kte śni, eya.

22 Napepi kin etanhan ehdaku kte a, atkuku kin en akiyahde kta e Ruben hewicakiya ; Weyapi śnipo. Woħa hewoskantuya wanke cin de ohna iyeyapo, tuka ninapepi on apapi śnipo.

23 Unkan kaketu, Josep iye cincu najinpi kin en hi qehan, taonħdoħda yuśdokapi, onħdoħda hanska un kin hee ;

24 Qa Josep icupi, qa woħa wan en iyohpeyapi, tuka woħa kin takudan ohnaka śni, mini wanica.

25 Qa aguyapi yutapi kta e iyotankapi, qa pa yuwankan ikikcupi qa, İsmayeli optaye wan Gileyad eciyatanhan u kin wanwicayakapi, camo yuhapi kin taku waśtemna canśin pejihuta koya qinpi, Egupta ekta kun yapı kta.

26 Unkan Juda hunka wanjin wicaye cin hewicakiya, De sunka unyanpi unktepi kinhan, we kin naunħmanpi eśta taku unkiħdamnapi kta he ?

27 Ihopo, İsmayeli kin dena en wiyopeunyanpi kte. De sunka unyanpi qa kici ceħpi unwanjıpidan kin heon, nape on unkatapi kte śni, eya. Unkan hunka wanjin wicaye cin anakigoptanpi.

28 Hehan wicaśta wopeton hecapi Midiani en hiyayapi. Unkan Josep

yuzapi, qa woħa qon etanhan yuwankan ehdakupi, qa mazaska wikcemna nonpa on Josep wiyopeyapi. Unkan Ísmayeli kin Josep opetonpi, qa Egupta ekta ayapi.

29 Unkan Ruben woħa qon ekta hi, unkan Josep en un śni, heon tawekoyake hdupota,

30 Qa hunka wanjitku kin en wicahdi qa, Hokśidan kin tanin śni ce, miś toki imdamde kta hwo, ewicakiya.

31 Unkan Josep taonhdoħda qon icupi qa tatokadan mdoka wan ktepi, qa we kin on oputkanpi.

32 Hehan tuwe onhdoħda hanske cin ahde śipi qa ateyapi kin kahipi qa heciyapi ; De iyeunyanpi ce. Ito de nicinkśi onhdoħda tawa qa iś tawa śni uman tukte hecetu hecinhan iyukcan wo.

33 Unkan iyekiye a, Micinkśi taonhdoħda qon dee. Wamanica śica wan he temya. Ehanqon Josep wanna yapotapi ce, eya.

34 Unkan Jakob tawokoyake hdupote a, waśihda qa anpetu ota cinhintku kin akiceya.

35 Unkan cinca wicaye cin owasin wica winyan ko magagaye wacinpi, tuka iś magaga yapi cin śni, qa, Iyomakiśica ecen micinkśi en Hades ekta mde kta ce, eye a cinhintku kin akiceya.

36 Unkan Midiani kin Egupta en Josep wiyopeyapi ; unkan Potipar Paro taakicita tancan opeton.

WICOWOYAKE 38.

1 Hena owasin hecetu, unkan Juda hunka wanjin wicaye cin etanhan apamahde ye a, Adulami wicaśta wan Hira eciyapi ekta i ;

2 Qa hen Juda Kanani wicaśta wan, Śuha eciyapi, he cunwintku wanyake a yuze a en i.

3 Unkan ihduśake a cinca wan ton ; unkan Er eya caś kiton.

4 Unkan ake ihduśake a, cinca wan ton qa, Onan eya caś kiton.

5 Qa ake cinca wan ton qa, Śela eya caś kiton. He ton kin ehan Kezib en un.

6 Unkan Juda iye cinhintku tokapa kin Er, winohinca wan, Tamar eciyapi yus kiya.

7 Unkan Er Juda cinhintku tokapa kin he śica e Jehowa wanyake a, Jehowa he e ya.

8 Hehan Juda Onan heciya, Nicinye tawicu qon ekta ye a, he yuza wo. Hecen nicinye cinkśi ye kte cin yakage kta ce.

- 9 Unkan cinca kin he iye tawa *yawapi* kte *śni* Onan sdone, *ça* cinca cinca kicage kte *śni* e cinca tawicu qon en i eca, maka kin atpapon.
- 10 Unkan taku econ kin he *śica* e Jehowa wanyake *ça*, he nakun *te ya*.
- 11 Hehan Juda iye takośku kin Tamar heciya, Wiwazica niyate ti kin en yanka wo, micinkśi *Śela* tanka icage cin hehanyan. Okini *iś* nakun cinye wicaye cin iyecen *te kta* kecin, heon *hecen* eya. Unkan Tamar kihde *ça* atkuku ti kin en yanka.
- 12 He iyohakam anpetu ota, qa *Śuha* cunwintku Juda tawicu kin wanna *ta* ; unkan Juda wanna magaga yapi, qa Timnat ekta tahin wanuyanpi tawa yuśdapi kin ekta itawankanhde ya, iye takodaku Hira Adulami kin kicica.
- 13 Unkan Tamar heciyapi, Iho nituncan tahin wanuyanpi tawa hduśda kta e Timnat ekta itawankanhde ya ce, eyapi.
- 14 Unkan Tamar iyoyakeca wokoyake hduśdoke *ça*, ite ahaŋpe on aihdaŋpe *ça*, Timnat canku iyahde kin he icahda taninyan iyotanka ; *Śela* wanna tanka, tuka qupi *śni* he wanyaka, heon hecon.
- 15 Juda he wanyaka ite aihdaŋpe cin heon winohinca wihomni heca kecin ;
- 16 Qa canku kin etanhan ekta i, qa takośku kin hee kin sdone *śni* heon, Tokin unwanken, eciya. Unkan unwanke *ça*, taku mayaqu kta he ? eya.
- 17 Unkan, Miś wanuyanpi kin etanhan tatokadan cincadan wan nichapi waye kta, eya. Unkan, Au wicayakiye cin itokam taku mayaqu kinhan, eya.
- 18 Unkan, He ciçu kta e sdoneyaye kte cin on etanhan taku e nakaha ciçu kta yacin he ? eya. Unkan, Maza huhu duhe cin ikan iyahna, qa nakun nitacanhpi ninape ohna duhe cin, eya. Unkan hena qu qa, kici wanka ; unkan iye etanhan ihduśaka.
- 19 Qa najin qa hde *ça* ite akaŋpe hduśdoke *ça* ake waśihda.
- 20 Unkan Juda taku qu qon, winohinca nape kin etanhan ehdaku kta e, takodaku Adulami kin tatokadan cincadan aye *śi*, tuka iye winohinca qon iyeye *śni*.
- 21 Qa wicaśta heciya yakonpi kin iwicawanga ; Witkowin canku ohna taninyan iyotanke ciqon tukte e he ? eya. Unkan, Tohini witkowin wan deciya yanke *śni*, eyapi.
- 22 Unkan ihdamna, qa Juda ekta i qa heciya ; Winohinca qon iyewaye *śni* qa, nakun wicaśta heciya yakonpi kin, Witkowin wanjidan tohini deciya un *śni* ce, eyapi.
- 23 Unkan, Yuha un nunwe. Tatokadan cincadan kin de aye ciśi tuka iyeyaye *śni* ; sanpa unkakite cinhan, okini wowihaha unke kta, Juda eya.
- 24 Unkan hetanhan wi yamni hehan, Nitakoś Tamar wawicihaha econ, qa

wanna wawicihaha kin etanhan ihduşaka ce, Juda eciyapi. Unkan, Tankan aupo ; huhnage kta ce, eya.

25 He aupi kin icunhan tunkanku hecen wahoya, Tokin maza huhu kin de ikan iyahna, qa canhpi kin de, dena tuwe tawa imiyecidukcan. Tuwe dena tawa ye cin, wicaşta kin he etanhan ihdumaşaka ce, eya.

26 Unkan Juda hena iyekiye ça, Winohinca kin he ohan owotanna miş hemacece şni ; he micinkşi Şela waqu şni kin heon etanhan, eye ça hetanhan icimana winohinca qon sdonye şni.

27 Unkan wanna cinca ton kte çehan, inyun tezi mahen cekpa yukan.

28 Qa tonpi kin icunhan, wanji nape kin qu ; unkan cinca tonkiye cin he nape kin icu, qa taku duta iyakaşke ça, De tokaheya hinanpe kta ce, eya.

29 Unkan nape kin ehdaku, hehan inyun cincu hiyu. Unkan winohinca kin heya, Token payahdeca ; Opaşdeca kin de anicipe nunwe, eye ça, Parez eya caş ton.

30 Hehan sunkaku taku duta nape kin akan yuhe cin he hiyu ; unkan he Zara eya caş ton.

WICOWOYAKE 39.

1 Unkan İsmayeli kin Josep Egupta ekta ayapi. Unkan Potipar Egupton wicaşta kin heca, Paro taakicita tancan kin he aupi kin Josep opewicakicaton.

2 Unkan Jehowa Josep kici un. Unkan taku econ kin owasin tanyan ihuni ye ça iye yuhe cin Egupton ti kin en yanka.

3 Unkan Jehowa kici un, qa taku nape econ kin owasin Jehowa tanyan yuştan kiye cin he yuhe cin wanyaka.

4 Unkan Josep yuhe cin okiye ça iyokipi ya ; unkan tiyohnaka tawa owasin awanyag şı, qa taku tawa owasin nape kin en qu.

5 Unkan tipi tawa, qa taku tawa owasin awanyag şı kin ehantanhan, Jehowa Josep on etanhan Egupton tiyohnaka kin yawaşte, qa taku ti ohnaka, qa tamaga ekta wanke cin ko owasin, Jehowa yawaşte kin akan un.

6 Hehan taku tawa owasin Josep nape kin en ehpeye ça, iş takudan awakicin şni, aguyapi hdute cin heceedan. Unkan Josep owanyag waşte, tancan ite ko waşte.

7 Hena owasin hecetu ; unkan hehan yuhe cin tawicu kin Josep atonwe ça, Mici wanka ye, eya.

8 Tuka wicada şni qa yuhe cin tawicu kin heciya ; Hiya, mayuhe cin taku tawa owasin minape kin en qu, qa taku tipi ohnaka kin mici un kin iye

sdonye śni.

9 De tipi kin ohna tuwedan iyamakapa śni ; qa nihihna miye etanhan takudan tpatan śni, niś nana niyuze cin heon etanhan, qa token woahntani tanka kin de ecamon, qa Wakantanka en wawahtani kta he ? eya.

10 Unkan winohinca qon anpetu owasin heciya, qa kitan hinca, tuka Josep anagoptan śni, kici iwanke śni qa ecaca kici un śni.

11 Unkan kaketu, anpetu wan Josep taku token kta e ti mahen i ehan, wicašta hen tipi kin tuwedan timahen un śni.

12 Unkan winohinca qon Josep tašina kin iyahpaye ça, Mici iwanka ye, eya ; tuka śina kin winohinca nape kin etanhan ehpeya naśdog hdicu, qa tankan iyaya.

13 Unkan nape kin etanhan śina ehpeya tankan naśdog hdicu kin he winyan kin wanyake ça,

14 Hehan wicašta tona ti kin ohna tipi kin hena wicakipan, qa hewicakiya, Wanyakape, Heberi wicašta wan den unkahdipi, unkan wištenunyanpi cin. Manke cin en mahi qa mici wanke kte hinca, tuka ho tankakiya nina waśicahowamda.

15 Nina ho tankakiya waśicahowamde cin he nahon, qa wapan qehan, mitankiyedan śina ehpeya naśdog tankan iyaya ce, eya.

16 Qa yuhe cin hdi kte cin hehanyan śina qon, itankiyedan ehnaka.

17 Qa eye ciqon owasin ake ecen okiyaka, Heberi hokśidan unyakahdipi kin he imaha kta e mikiyadan u.

18 Qa ho tankakiya waśicahowamde çehan mitankiyedan śina ehpeya naśdog tankan iyaya ce, eya.

19 Unkan yuhe cin he tawicu oie kin, Hokśidan nitawa kin hecen ecamicon, eciye cin he nahon hehan cantiyahdeya.

20 Qa yuhe cin Josep icu, qa wicašta yatapi tona kaška wicahnake cin tipi wan en kaška wicahnakapi kin he en Josep kaška ehnaka. Unkan wicakaška tipi kin en yanka.

21 Unkan Jehowa Josep kici un qa, towaonsida kin hiyohiya qa wicakaška tipi kin itancan kin he Josep wacin en yus kiya.

22 Unkan wicakaška tipi itancan kin, tona wicakaška tipi kin en kaška wicahnakapi kin owasin, Josep nape kin en qu. Unkan taku hen econpi kin owasin Josep econ wicakiya.

23 Hecen Jehowa Josep kici un, qa taku econ kin owasin tanyan yuŝtan kiya ; heon wicakaška tipi itancan kin, taku Josep nape en yuhe cin hena takudan awanhdake śni.

WICOWOYAKE 40.

- 1 Hena owasin hecetu, unkan hehan Egupta wicašta yatapi tawayatkekiye tawohekiye ko, wicayuhe cin Egupta wicašta yatapi kin en wahtanipi.
- 2 Hecen Paro akicita nom wicayuhe cin canniye wicaya, wayatkekiyapi tancan, qa wohekiyapi tancan kin henioza.
- 3 Qa akicita tancan tipi tawa wicakaška tipi kin tukten Josep kaška hnakapi yanke cin he en awanyag wicakiyapi kta e ewicahnaka.
- 4 Unkan akicita tancan kin he Josep hena awanwicayag kiya, unkan owicakiya. Unkan anpetu ota kaška hnakapi ecen yukanpi.
- 5 Hehan Egupta wicašta yatapi tawayatkekiye, tawohekiye ko, wicakaška tipi kin ohna kaška wicahnakapi, hanyetu wanjidand en kinukan wowihanmde ihanmnapi, otoyohi wihanmnapi kin iyukcanpi kin iyecen.
- 6 Hehan ihanhanna Josep en wicahi qa iyokišicapi kin wanwicayaka.
- 7 Qa Paro taakicita wicakaška *tipi* kin, iye yuhe cin tipi tawa kin he en iye kici unpi wiwicawanga ; Tokeca nakaha ite iyoyag dukanpi he ? eya.
- 8 Unkan wowihanmde wiunhanmnapi, tuka tuwe iyukcan kte cin den wanica ce, eciyapi. Unkan wiyukcan kin Wakantanka hee šni he? Wiyahanmnapi kin omakiyakapo, Josep ewicakiya.
- 9 Hehan wayatkekiyapi tancan kin wihanmde ciqon ohdaka qa, Wiwahanmde cin en hastanhanka iyuwi wan mitokam han.
- 10 Qa adetka yamni wiyuwi aicage ça ape wahca ko icañ ye, qa iyage hastanhanka suton yapi.
- 11 Hehan Paro wiyatke tawa kin minape ohna mduha, qa hastanhanka kin iwacu, qa Paro wiyatke tawa kin ohna induškice ça Paro nape kin en wiyatke kin ewehde, eya.
- 12 Unkan Josep heciya, Wiyahanmde cin he kaken ka. Adetka yamni qon anpetu yamni ee.
- 13 Ebake yamni can Paro nipa kin yuwankan inicu kte ça nanke ciqon ake en anihde kta ; unkan tokaheya wayatkeyakiye ciqon wicohan kin ake ecen ecanon kta, Paro nape kin en tawiyatke kin yaqu kta.
- 14 Hena hecetu kinhan miksuya wo. Tokin tanyan yaun kinhan wowašte ecamiyecon, Paro en caje mayadaten qa tipi kin de etanhan hinanpe mayayen.
- 15 Awicakehan Heberi tamakocepi kin etanhan mamanonpi, qa deciya takudan ecamon šni on makohdoka kin den emahnakapi kta, eya.
- 16 Hehan wohekiyapi tancan kin wiyukcan wašte e wanyake ça Josep heciya ; Miš nakun wiwahanmde ça inyun, aguyapi makanopiye yamni mapa kin akan.

- 17 Qa makanopiye akantu kin ohna Paro tawoyute ocaje owasin wohekiyapi kage cin. Unkan zitzkadan hena temyapi, makanopiye mapa kin iwankam un kin hetanhan.
- 18 Unkan Josep ayupta ; He kaken ka. Makanopiye yamni kin anpetu yamni eepi.
- 19 Ehake yamni can Paro pa kin yuwankan inicu qa, can akan otke niye kta ; hehan zitzkadan nicehpi kin etanhan yutapi kta.
- 20 Unkan iyamni can, anpetu en Paro tonpi kin he *kiksuyapi* kta e wowidag wicaye cin owasin wowicakihe, ça wayatkekiyapi tancan wohekiyapi tancan henioza wowidake wicaye cin wicehna hdinanpe wicaya.
- 21 Qa wayatkekiyapi tancan kin wayatke wicakiye ciqon wicohan ake hecon sí ; unkan wiyatke kin Paro nape kin en qu.
- 22 Tuka wohekiyapi tancan kin otke ya, Josep iwicakiciyukcan qon iyecen.
- 23 Unkan wayatkekiyapi tancan kin Josep kiksuye síni, tuka akiktonja.

WICOWOYAKE 41.

- 1 Hehan tanhan waniyetu nonpa hehan Paro wihanmna. Unkan iho wakpa kahda inajin.
- 2 Qa inyun wakpa kin etanhan, pte śakowin owanyag wašte qa cepa heca hinanpapi, qa tinta en wihanpi.
- 3 Qa hena ihektapa tanhan pte tokeca śakowin owanyag śica qa tamaheca hecapi, wakpa etanhan hinanpapi, qa pte umanpi qon ehna wakpicahda najinpi.
- 4 Qa pte owanyag śica tamaheca hena pte owanyag wašte cepapi śakowin qon temwicayapi. Unkan Paro kikta.
- 5 Ake ístima qa inonpa wihanmna. Unkan inyun wamnaheza hu wanjidan wahuwapa śakowin suton, qa waštešte aicaga.
- 6 Qa hena iyohakam wahuwapa tokeca śakowin hinanpa, tuka śikśica qa wiyohianpa tanhan tate on śnija.
- 7 Qa wahuwapa conica ton śni kin wahuwapa suton qa ojugjudan qon owasin temya. Paro hecen wihanmde ça hehan kikta.
- 8 Unkan ihanhanna qehan Paro nagi kin iyokiśice ça, Egupton en pejihuta wicašta qa wicašta ksapapi kin owasin wicakico, qa wihanmde ciqon Paro owasin owicakiyaka ; tuka tuwedan yukcan okihi śni.
- 9 Hehan Paro wayatkekiyapi tancan kin ie ça, Anpe dehan wawahtani kin weksuya ce.
- 10 Paro taokiye kin canniye wicaye ça, akicita tancan tipi kin en kaśka mahnaka, miye qa wohekiyapi tancan kin he nakun.
- 11 Unkan hanyetu wanjidan en wiunhanmnapi, miye iye kici kinukan,

wihanmnapi iyukcanpi kin iyecen wiunhanmnapi.

12 Unkan hen unkicipi koška wan Heberi kin heca, akicita tancan tahoksidan kin he wiunhanmnapi kin unkokiyakapi, unkan iye hena iyukcan otoiyohi wiunhanmnapi kin iyecen unkiciyukcanpi.

13 Unkan unkiciyukcanpi kin ecetu ; miye ake wiyatke yuhe makiye ça uman kin otke ya.

14 Hehan Paro Josep huwe ye wicaši, unkan wicakaška tipi kin etanhan kiyuškapi, hehan putin hin hdasar, qa wokoyake tokeca kiçun qa Paro yanke cin en hi.

15 Unkan Paro Josep heciya, Wowihanmde wan iwahanmna, unkan he yukcan kta okihi tuwedan iyewaye šni, tuka wihanmnapi niš nayahon unkan idukcan oyakihi keyapi nawahon.

16 Unkan Josep ayupte ça, Miye ee šni, Wakantanka eqe toketu kin tanyan oniciyake kta ce, eciya.

17 Unkan Paro ie ça, Wiwahanmde ça watpa hutata kin nawajin ;

18 Qa inyun wakpa kin etanhan, pte šakowin cepa, owanyag wašte hinanpapi, qa tinta kin en wihanpi.

19 Unkan hena iyohakam pte tokeca šakowin tamaheca, owanyag šikšica hinanpapi ; tamahenheca šica hena iyececa, Egupta makoce kin en tohini wanmdake šni.

20 Qa pte tamahenheca šice cin pte šakowin cepa tokaheya qon temwicayapi.

21 Unkan tan mahen iyayapi kin hehan, tan mahen iyayapi kin sdoney pica šni ; otokahe ekta šikšica taninpi qon nahahin hececapi. Unkan hehan wekta.

22 Qa ake wiwahanmde ça inyun wamnaheza hu wanjidan wahuwapa šakowin hanskaska waštešte aicage cin wanmdaka.

23 Hehan ake wahuwapa šakowin cikcistina, wiyohiyanpata tateyanpa kin on šnijapi, qa co wanica hinanpapi.

24 Qa wahuwapa cikcistina wahuwapa šakowin waštešte qon owasin temyapi. Unkan wicašta wiyukcan heca owicawakimdaka, tuka miciyukcanpi šni.

25 Hehan Josep Paro heciya, Paro wihanmde cin hena okonwanjidan, Wakantanka token econ kte cin he Paro okiyaka.

26 Pte šakowin wašte qon, hena waniyetu šakowin ee ; qa wahuwapa šakowin waštešte qon, hena nakun waniyetu šakowin ee, wowihanmde kin hena wanjidan.

27 Qa pte šakowin tamaheca, qa šice cin umanpi kin iyohakam hinanpapi kin, hena waniyetu šakowin ee, qa wahuwapa šakowin cikcistina

wiyohiyanpata tateyanpa kin on śnija kin hena nakun, waniyetu śakowin wicaakihan kte cin hee.

28 Paro taku ewakiye cin he dee. Wakantanka taku econ kte cin he Paro wanyag kiya.

29 Hecetu kta, tokata waniyetu śakowin hehanyan, Egupta makoce kin owancaya taku owasin iyakiçuya icage kta.

30 Qa hena iyohakam waniyetu śakowin wicaakihan kta, qa Egupta makoce kin en taku iyakiçuya icage kte ciqon akiktunjapi kte ça, wicaakihan kte cin makoce kin awihnuni kta.

31 Unkan hehan wicaakihan kte cin iyotan tehike kte cin makoce kin en, heon wipipi qon sonyapi kte śni.

32 Qa wicoie kin de Wakantanka yuecetu kte ça, wanna kohanna Wakantanka econ kta, heon Paro nonpa akihde wihanmna.

33 Qa wanna Paro wicašta wan ksape ça wayupika akite ça, Egupta makoce kin yuhe kiya nunwe.

34 Qa Paro akicita wicakage ça makoce kin en wicahdusuta kte ; unkan waniyetu śakowin wipipi kta hena icunhan, taku makoce aicage kte cin owasin izaptanptan icupi nunwe.

35 Hecen waniyetu śakowin waštešte kte cin hena icunhan, woyute ocaje owasin kamnapi kte. Paro nape kin ihukuya, tonwanyanpi kin en aguyapi pahipi kte cin he woyute awanyakapi nunwe.

36 Qa waniyetu śakowin wicaakihan kte cin Egupta makoce kin en hena on, taku yutapi kihnakapi kinhan, makoce kin wicaakihan kte cin on awihnuni kte śni, eya.

37 Unkan Paro ookiye wicaye cin ko wicoie kin he wašte dakapi.

38 Hehan Paro iye taokiye kin hewicakiya ; Wicašta wan Wakantanka taniya en un kin de iyececa iyeunyanpi pica he ?

39 Qa Paro Josep heciya, Wakantanka de owasin sonye niciye cin, niś nana widukcan qa yaksapa, tuwedan iyenicece śni.

40 Niś wati kin awanmiyecidake kta, qa oyate mitawa owasin oie ananigoptanpi kta. Oiyotanke kin en hecedan iciwankam waun kta.

41 Qa wanyaka wo, Egupta makoce kin owasin yuhe ciciya ce, eya.

42 Hehan Paro maza napcupe hduśdoke ça Josep nape kin ohna iyeye ça, minihuha ska wašte koyag ye ça, mazaskazi wanapin wan napin kiya.

43 Qa canpahmihma yuhe cin etanhan canpahmihma inonpa kin he ohna iyotang ye ça, Itokam canpeška makehde inajinpo, ieyanpaha eyapi, qa Egupta makoce kin owasin yuhe kiyapi.

44 Qa Paro Josep heciya, Paro miye ce. Oyate kin tuwedan iye cinka takudan econ kte śni. Niś nana token econ wicayaşi kin hecetu kta ce.

45 Qa Paro Josep, Wicoicage nikiye cin, eya caś ton, qa On *otonwe* kin en wośnapi kage cin, Potipera he cunwintku Asenat tawicu kta e qu. Unkan Josep Egupta makoce kin ehna iyaya.

46 Josep, Egupton wicaśta yatapi Paro itokam najin qehan, wanna waniyetu wikcemna yamni qa, hehan Josep Paro itokapa tanhan inanpe ça Egupta makoce kin owancaya iyoptapta iyaya.

47 Unkan waniyetu wipipi kin hena icunhan, makoce kin napohnahnaka icah ya.

48 Qa waniyetu śakowin Egupta makoce kin en, taku yutapi owasin pahipi, qa tonwanyanpi kin en kihnakapi ; otonwe otoiyohi ohna maga ihdukśan un kin etanhan woyute otonwe kin en kihnakapi.

49 Qa Josep, miniwanca kahdaya wiyaka wanke cin iyecen, aguyapi ota hinca pahi, yawapica śni nakaes yawapi kte cin ayaśtanpi.

50 Unkan Josep cinca wica nonpa kicitonpi, waniyetu wicaakihan kin itokam, Asenat Potipera On en wośnapi kage cin he cunwintku kin hena Josep kici ton.

51 Iyomakiśice ciqon owasin, qa ate ti kin owasin Wakantanka akiktunś mayan, eye ça tokapa kin Manaśe eya caś kiton.

52 Qa, Makoce en kakiś mayanpi qon, he en Wakantanka taku icah mayan, eye ça iyokihe Epraim eya caś kiton.

53 Unkan waniyetu śakowin wipipi kin Egupta makoce kin en wanna henakeca.

54 Qa waniyetu śakowin wicaakihan kte cin wanna en au, Josep eye ciqon hecetu. Unkan makoce owasin en wicaakihan, tuka Egupta makoce kin en owancaya aguyapi yukan.

55 Unkan Egupta makoce kin owancaya akihanpi kte çehan, oyate kin aguyapi on Paro hoyekiyapi. U kan, Josep ekta yapi qa, token econ niśipi kin ecen econpo, Paro Egupton owasin ewicakiya.

56 Wanna maka ohnaka owancaya wicaakihan, hehan Josep aguyapi opiye kin owasin hduhdoke ça, Egupton taku yutapi wicaqu ; Egupta makoce kin en wicaakihan tehika aye nakaś.

57 Unkan maka owancaya etanhan, Egupta ekta Josep en taku yutapi opeton hipi, maka kin owancaya nina wicaakihan ece.

WICOWOYAKE 42.

1 Hehan Egupta makoce kin en aguyapi yuke cin Jakob wanyake ça cinkśi wicaye cin hewicakiya, Tokeca ecin opakicihta dukanpi he ?

2 Ihopo Egupta heciya aguyapi yukan *keyapi* nawahon. Ecin kutkiya ekta

yapi qa heciya tanhan woyute ope unkiatonpo, kinhan unnipi qa untapi kte
śni ce, eya.

3 Unkan Josep cinye wicaye cin wikcemna qon aguyapi opetonpi kta e
Egupta *makoce kin* ekta kutkiya ipi.

4 Tuka Benjamin Josep sunkaku kin ope śni, Okini taku śica akipe kta
naceca, Jakob eye ça hecen ye śi śni.

5 Unkan Kanan makoce kin en wicaakihan, heon uman hipi kin om,
Israel cinkśi wicaye cin woyute opeton hipi.

6 Wanna makoce kin en Josep itancanyan un, qa makoce kin ohna oyate
hiyeye cin owasin taku yutapi wicaqu kin Josep hee. Unkan cincu qon en
hipi, qa itokam ite makipusdiya makata ehpeiçiyapi.

7 Unkan Josep wanwicayake ça cincu iyewicakiya, tuka wicitokam
ihdutokeca, qa icanksiya owawicakiya qa, Tokiyatanhan yaupi he ? eya
iwicawanga. Unkan Kanan makoce kin etanhan taku yutapi opeton unhipi
ce, eyapi.

8 Hecen Josep ege cincu kin iyewicakiya, tuka iye Josep iyekiyapi śni.

9 Hehan Josep wowihanmde ihanmde ciqon kiksuye ça, Makoce
iwanyakapi kin henicapi, qa makoce wanna śdayehna wanke cin he iwanyag
yahipi ce, ewicakiya.

10 Unkan, Hiya itancan hecetu śni. Hokśidan nitawa woyute opeton
unhipi.

11 Wicašta wanijidan owasin cinkśi unyanpi. Unkiye iewicaunkapi ;
hokśidan nitawa kin makoce iwanyakapi kin heuncapi śni ce, eciyapi.

12 Unkan, Hiya makoce śdayehna wanke cin he iwanyag yahipi ce,
ewicakiya.

13 Unkan, Hokśidan nitawa hunka wanjin unkiciyapi ake unnonpapi ;
Kanan makoce kin en wicašta wanjidan ate unyanpi, qa hakakta kin he
anpe dehan ate unyanpi kin kici yanka, qa wanjidan tanin śni, eyapi.

14 Unkan, Makoce iwanyakapi kin henicapi ; eya eciciyapi qon he hecetu
ce.

15 Deciya tanhan niyukcanpi kta. Paro ni un kin nisunkapi cistinna kin he
hi śni kinhan detanhan tokidan dapi kte śni.

16 Ihopo, niyepi kin wanjidan sunka yayapi kin hduwe ye śipo, qa nioiepi
kin yahduwicakapi kin hehanyan kaška dukanpi kta. Hecen niyukcanpi kta,
hecetu śni kinhan, Paro ni un kin makoce iwanyakapi kin henicapi kta,
Josep ewicakiya.

17 Qa iyamni can hehanyan witaya onatag wicahnaka.

18 Anpetu iciyamni hehan Josep hewicakiya, Wakantanka kowakipa ce.
Kaken e econpo qa ni unpo.

19 Wicayakapi kinhan, hunka wanjin yayapi kin wanjidan kaška yanke

kta, tipi kin de onatag nihnakapi kin he en, qa niye umanpi kin ihopo, tiyohnaka nitawapi kin wicaakihan kin on woyute akiyhdapo.

20 Qa sunka yayapi cistina kin he miye en makaupo, hecen nioie yahduwicakapi kinhan niṭapi kte śni. Unkan ecen econpi.

21 Qa iyakitedan hekiciyapi, Ehanqon waunhtanipi. Sunka unyanpi wacin iyokiśin wanunyakapi qa ceunkiyapi, tuka anaungoptanpi śni, heon wocante śice cin de unhiyahdepi ce, eyapi.

22 Unkan Ruben ayupte a, Hoksıdan kin en wahtanipi śnipo eciciyapi śni he ? tuka anamayagoptanpi śni ; unkan ecin iye we kin wanna wiunwangapi kin he dee ce, eya.

23 Unkan Josep he nahon sdonyapi śni. Taku ewicakiya eca wicašta wan ie ska kiya ece nakaeś.

24 Tuka Josep wicitokapa tanhan toki ye a ceya. Hehan icicawin en wicahdi qa, taku ewicakiye a, hehan umanpi kin etanhan Śimeyon icu qa, ištapi kin wicitokam pakihta.

25 Hehan Josep wojuha tawapi kin aguyapi on ojuwicakicitonpi kta, qa mazaska tawapi otoiyohi wojutonpi kin en owicakicihnakapi kta ; waneya nakun wicaqupi kta, keya. Unkan hecen ecawicakicon.

26 Unkan śuktanka śonśonna kin taku yutapi qin wicakiyapi qa hdapi.

27 Qa tukten kiwankapi kin, wanji taśunke śonśonna wo qu kta e wojutonpi kin hduhdoka ; unkan inyun wojutonpi i kin en tamazaska kin yanka.

28 Unkan hunka wanjin wicaye cin hewicakiya, Mazaska mduhe ciqon ake micupi. Wanyakapo, wojutonpi mitawa kin en ohnakapi ce. Unkan owasin icanwankapi qa ikopapi qa, De taku Wakantanka ecaunkiconpi hwo, ekiciyapi.

29 Qa Kanan makoce kin ekta ateyapi Jakob en hdipi, qa token akipapi qon owasin okiyakapi.

30 Makoce yuhe cin he ihnuhana icanksiya taku unkekiciyapi, qa makoce kin iwanyag unkipi iyecen ecaunkiconpi.

31 Tuka, Ohan unkowotanpi qa makoce iwanyakapi kin heuncapi śni ;

32 Hunka wanjin unkiciyapi ake unnonpapi hena owasin ate unwanjipidan, wanjidan tanin śni, qa hakakta kin he anpe dehan Kanan makoce kin en ate unyanpi kici yanka ce, unkekiyapi.

33 Unkan, Ohan oniwotanpidan kinhan, detanhan sdonwaye kta ce. Hunka wanjin yayapi kin wanjidan den mici yanke kta, qa yatipi kin en wicaakihan kin on, *woyute* icupi qa ekta hdapo.

34 Qa sunka yayapi hakakta kin he makaupo. Kinhan makoce iwanyakapi kin henicapi śni, qa ohan oniwotanpidan kin sdonwaye kta ce, qa hehan,

hunka wanjin yayapi kin de ciçupi kta ; kinhan makoce kin den wopeyatonpi kta ce, makoce yuhe cin unkekiciyapi ce, eyapi.

35 Hehan wojutonpi kin tokokadapi ; unkan inyun mazaska apahtapi qon, owasin wojutonpi kin en yanka. Owasin ateyapi kin kici mazaska apahtapi qon wanhdakapi, qa inihanpi.

36 Hehan Jakob ate yapi kin hewicakiya ; Miye micinca mayakipi, Josep tanin śni, qa Śimeyon tanin śni, qa Benjamin iyacupi kta ; hena owasin iyokiśin mayanpi.

37 Unkan Ruben he atkuku kin heciya, He minape kin en maqu wo. Miś niye en awahdi kta ce. He niye en awahdi śni kinhan, micinca nom kaṭa iyewicaya wo, eya.

38 Tuka, Micinkśi kin *de* nicipi ye kte śni ce. Cincu wanna ṭe ṭa iś nana okaptapi, qa canku ohna dapi kin he tahepi Benjamin taku śice cin akipe cinhan, mapa ska kin Hades ekta iyokiśin yemayayapi kta ce, eya.

WICOWOYAKE 43.

1 Wanna makoce kin en wicaakihan tehika aya.

2 Unkan aguyapi Egipta etanhan ahdipi qon temyapi, hehan ateyapi kin hewicakiya, Ake ekta yapi qa taku yutapi onge opeunkicitonpo.

3 Unkan Juda ayupte ṭa, Wicaśta qon, Nisunka nicipi *hi* śni kinhan miite kin wanmayadakapi kte śni ce, nina kitanyan unkekiciyapi.

4 Hecen niś sunka unyanpi kin unkipi ye yaśi kinhan kun unyanpi, qa woyute opeunnicitonpi kta.

5 Tuka, niś ye yaśi kte cin tawaṭenya ye śni kinhan, kun unyanpi kte śni. Nisunkapi kin ope śni kinhan, miite kin wandakapi kte śni ce, wicaśta kin unkekiciyapi ce, eya.

6 Unkan, Tokeca nisunka wanji yuke cin, wicaśta kin oyakidakapi qa śicaya ecamiyeconpi he ? Israel eya.

7 Unkan, Wicaśta kin atayedan wicowazipi kin unkiwangapi, qa heya, Niyatepi kin nahahin ni he ? Nisunka wanji yukan he ? Unkan owasin wicoie kin hena ecen unkokiyakapi. Ecin token on, Nisunkapi kin makaupo, eye kte cin sdonunyanpi kta he ? eyapi.

8 Qa, Kośka kin mici ye śi wo, kinhan naunjinpi qa unyanpi kta ; hecen unnipi kta, unkiye niye unkcincapi ko owasin unṭapi kte śni.

9 Miś he awanmdake ṭa minape kin etanhan mayakida kta. Niye en cicicahdi śni, qa nitokam ewehde śni kinhan, anpetu owasin, Niye en wawahtani *kemakiyapi* kta.

10 Ye unkapinpi śni unkanś, wanna dehan inonpa unhdipi kta tuka ce ;

Juda atkuku Ísrael eciya.

11 Unkan, Hecetu hecinhan kaken e econpo. Makoce kin de waskuyeca tukte iyotan wašte kin wojuha duhapi kin ohna yuha yapo, cansin onge, qa hastanhanka hanpi tiktica onge, qa taku waštemna, qa pejihuta yatan, hma qa uma, henakiya wicašta kin yaqupi kta.

12 Mazaska nakun oiyopeye nom, nape kin ohna icupo, mazaska wojutonpi ohna yahdohdipi qon he koya, nape ohna adapi kta, he wanun econpi naceca.

13 Nisunkapi kin nakun icupi, qa najinpi qa wicašta qon ekta ake yapo.

14 Qa wicašta kin cante niciyapi qa hunka wanjin yayapi kin, uman kin he ku ši kte, Benjamin koya, Taku wakan Otancanke ionsinidapi kte. Miš micinca makipi kinhan hecen makipi kta, ateyapi Ísrael ewicakiya.

15 Hecen wicašta kin taku ikce qupi kte cin he icupi, qa mazaska nape ohna icupi, qa Benjamin kici injinpi, qa Egipta ekta kun yapi qa Josep itokam injinpi.

16 Unkan Josep wanwicayaka, Benjamin kici, qa taokiye wan tipi awanyake cin he heciya ; Wicašta kin dena tin awicaye ça, wanuyanpi wan pata, qa španyan wo. Wiyotanhan hehan wicašta kin dena om wawate kta ce.

17 Unkan wicašta kin token Josep eye cin owasin ecen econ, qa Josep ti kin ti mahen u wicaši.

18 Unkan Josep ti kin ti mahen awicaipi kin heon wicašta kin kokipapi qa, Mazaska tokaheya wojutonpi unkitawapi kin ohna unhdohdapi qon, heon anauntanpi, qa taku iyaunkonpapi kta e unkipi, qa wayaka unyuzapi kta unkiye šuktanka šonšonna unhapi koya, eyapi.

19 Qa Josep ti kin awanyake cin he en ikiyedani hinajinpi, qa tipi tiyopa kin en okiyapi.

20 Qa, Itancan otokahe ekta taku yutapi opeuntonpi kta e kun unhipi.

21 Qa owanka qon, en unkiwankapi, qa wojutonpi unhdohdokapi, unkan mazaska unkahipi qon otioyohi wojutonpi unkitawapi i kin ohna yanka, mazaska aspeunkiye unkitonpi qon he iyececa, he owasin nape ohna unnicicahipi.

22 Qa mazaska tokeca on taku yutapi opeuntonpi kta e nape ohna yuha unhipi. Tuwe mazaska unkahipi qon, unkitawojutonpi kin ohna iyohpeye cin sdonunyanpi šni ce, eyapi.

23 Unkan, Tanyan yaunpi kta ce. Wikopapi šni po. Taku wakan yadapi kin niyatepi ta Wakantankapi kin hee wojutonpi nitawapi kin ohna woyuha niçupi. Mazaska nitawapi qon miye en makahipi, eye ça hehan Šimeyon wicitokam hinanpe ya.

24 Qa Josep ti kin ti mahen u wicaši, qa mini wicaqu ; unkan siha

- hdujajapi, qa súktanka sónsonna tawapi kin nakun taku yutapi wicaqu.
- 25 Unkan, Hen aguyapi yutapi kta keya nahonpi, heon wiyotanhan hehan Josep hdi kte cin he itokam taku ikce qupi kte cin owasin wiyeya ehnapapi.
- 26 Unkan Josep tiyata hdi hehan taku ikce qupi kte cin, nape ohna Josep en ti mahen aupi, qa itokam makipusdiya ehpeiçiyapi.
- 27 Unkan, tanyan unpi hecinhan iwicawange ça, Niyatepi kin wicahinca cajedatapi qon nahahin ni he ? tanyan un he ? eya.
- 28 Unkan, Nitaokiye ate unyanpi kin he nahahin ni, qa tanyan un ce, eyapi qa patujapi qa makata ehpeiçiyapi.
- 29 Unkan Josep en etonwe ça, sunkaku Benjamin kici hunku wanjidan kin he wanhdake ça, Sunkayayapi cistina miye en cajedatapi qon he dee he ? eye ça, Micinksi Wakantanka cantonihnake kte, eya.
- 30 Qa sunkaku kin en cante kin skanskan he cin heon Josep inahniyan tukten ceye kta akite ça wankan tipi ekta i, qa ceya.
- 31 Hehan ite kin hdujaja qa hdinanpe ça ihduhe ça, Aguyapi ehnapo, eya.
- 32 Unkan aiyog Josep qupi, qa hunka wanjitku kin is aiyog wicaqupi, qa Egupton tona hen wotapi kin aiyog wicaqupi ; Egupton Heberi om aguyapi yutapi okhipi sni nakaes, heconpi kinhan isten içiyapi kta.
- 33 Unkan Josep itokam iyotankapi, tokapa kin watokapa kin iyecen, qa hakakta kin cistina un kin iyecen, qa wicašta qon iyakitedan yušinyayapi.
- 34 Taku yutapi iyacinpi otoiyo hi wicaqu, tuka Benjamin taku tawa tanka umanpi taku tawapi zaptan akihde heon. Unkan kici yatkanpi, qa iyuškinpi.

WICOWOYAKE 44.

- 1 Unkan Josep tuwe tipi tawa awanyake cin heciya, Wicašta kin wojuha yuhapi kin en taku yutapi oju wo ; tohan qin okhipi kin hehanyan, qa mazaska aupi kin owasin otoiyo hi tawojutonpi i kin ohna ehna ka wo.
- 2 Qa hakakta kin tawojutonpi i kin ohna mazaska wakšica mitawa kin he oyahnake kta, mazaska woyute iyopeye ahi kin he iyahna. Unkan token Josep eciye cin, ecen econ.
- 3 Anpao hehan hde wicašipi, wicašta tašunke sónsonna koya.
- 4 Wanna otonwe kin etanhan kinanpapi kitanna tehan *hdapi*, hehan Josep wicašta tipi tawa awanyake cin heciya ; Najin qa wicašta qon tawicapa wo, qa wicayehdege cinhan, He tokeca tanyan ecaniconpi kin itkom šicaya ecanonpi ?
- 5 Mayuhe cin taku ohna wayatke ça on ayate cin dee sni he ? Taku ecanonpi kin he šica, ewicakiya wo.

- 6 Unkan ewicakihdege ça wicoie kin hena ewicakiya.
- 7 Unkan, Itancan tokeca e hecen eha he ? Hoksidan nitawa token heconkupi kta he ?
- 8 Mazaska wojutonpi i kin ohna iyeunyanpi qon he ake, Kanan makoce kin etanhan unnicahipi kin sdonyaya. Hehan ecin token on etanhan niyuhe cin ti kin etanhan mazaska qa ís mazaskazi maunnonpi kta he ?
- 9 Hoksidan nitawa uman tukte kašta he yuha iyeyaye cinhan te kta, qa unkiye owasin wowindag unyayapi kte, eyapi.
- 10 Unkan, Wanna token ehapi kin hecetu kte. Tuwe he yuha iyewakiye cinhan wowidake waye kta, tuka umanpi kin iyaonpepicaśni yaunpi kta, eya.
- 11 Unkan owasin inahnian wojutonpi kin makata pahpapi qa, otoiyohei wojutonpi hduhdokapi.
- 12 Unkan tokapa kin tawojutonpi kin en tokaheya akite ça hakakta kin ecen owecinhan yušan. Qa Benjamin tawojutonpi kin ohna wakšica kin iyeya.
- 13 Unkan wokoyake kin hdupotapi qa owasin šuktanka šonšonna qin wicakiyapi, qa icicawin otonwe kin ekta ipi.
- 14 Hehan Juda, hunka wanjin wicaye cin om, Josep ti kin en ipi. Unkan iye nahahin hen yanka, qa he itokam owasin makata ehpeiçiyapi.
- 15 Unkan woecon kin de taku ecanonpi hwo ? Wicašta tuwe hemacece cinhan ayate cin okihi sdonyayapi šni he ? Josep ewicakiya.
- 16 Unkan Juda heya, Mayuha token unkaniyuptapi kta he ? Taku unkeyapi kta, qa tokiya tanhan unhduecetupi kta he ? Waunhtanipi qon wanna Wakantanka iyeunyanpi. Iho, Itancan wayaka unyaduhapi, wakšica kin yuha iyeyapi qon qa unkiyepi owasin nakun, eya.
- 17 Unkan, Hecamon kte cin Wakantanka iyomaki šni nunwe. Wiyatke yuha iyeyapi qon wicašta kin he, hecedan wowindag waye kta ; tuka niyepi wookiye on niyatepi kin ekta hdapo, Josep eya.
- 18 Unkan Juda ikiyedat hinajin qa heya, Itancan ceciya ce, hoksidan nitawa canniye maye šni wo. Mayuhe cin Paro iyeniceca. Tokin hoksidan nitawa taku epe cin nayahon.
- 19 Mayuhe cin hoksidan nitawa wiwicanonga ; Niyatepi yuke ça nisunkapi yukan he ? ehe ciqon.
- 20 Unkan itancan hecen unkeniciyapi ; Han ate unyanpi kin wanna wicahinca, qa cinhintku cistina kin wicahinca ehan tonpi kin he kici yanka, qa cincu kici hunku wanjidan qon he ta, hecen isnana okaptapi, unkan atkuku cantekiya ce, unkeyapi.
- 21 Unkan, Nisunkapi kin makaupo, wanmdake kta ce, hoksidan nitawa

kin ewicayakiye ciqon.

22 Unkan, Itancan hoksidan kin atkuku kin ehpeye kte cin okitpani, he atkuku ehpeya u kinhan, atkuku kin te kta ce, unkeniciyapi qon.

23 Unkan, Nisunkapi cistina kin he kici kun yaupi sni kinhan, ake miite kin icimana wandakapi kte sni, hoksidan nitawa unkeyakiyapi.

24 Unkan hoksidan nitawa kin ate unyanpi kin ekta itawankanhde unhdapi, qa he en token iyae cin owasin unkokiyakapi.

25 Unkan, Ake ekta yapi, qa woyute onge opeunkicatoponpo, ate unyanpi kin eya.

26 Unkan, Sunka unyanpi cistina kin de ope cinhan unyanpi kta ce ; tuka iye ope sni kinhan apamahde unyanpi kte cin unkokitpanipi. Sunka unyanpi hakakta kin kici unyanpi sni kinhan, wicašta qon itohnake kin wanunyakapi kte sni ce, unkeyapi.

27 Unkan hoksidan nitawa ate unyanpi kin heunkiciyapi, Mitawin cinca nom nana miciton e sdonyayapi.

28 Tuka uman kin mitan tanhan toki iyaye ça, Ehanqon yapotapi ce, epe ciqon ehantanhan wanwahdake sni.

29 Qa wanna de nakun mitan tanhan toki adapi kta, qa tahepi taku síce cin akipe cinhan pa maska iyokisica Hades ekta amayadapi kta ce, eya.

30 Unkan dehan kaketu kta ce. Nitahoksidan ate unyanpi kin ekta unhdapi, qa iye nagi kin hoksidan nagi kin en ihdaske ça hoksidan kin ope sni kinhan ;

31 Ate unyanpi kin hoksidan tanin sni kin wanhdake cinhan te kta. Hecen wowindag unyayapi kin hoksidan nitawa ate unyanpi kin pa ska kin iyokisica Hades ekta kun unkeyapi kta.

32 Hoksidan nitawa miye hoksidan kin ate wakida qa hewakiya ; Niye cicicahdi sni kinhan, ate niye en wawahtani ohinniyen kecanni kta ce, epa.

33 Unkan wanna ceciciye, hoksidan kin hee kiya den manke ça mayuhe cin wowindag mayaye kta, qa hoksidan kin cinye wicaye cin om itawankanhde hde kta.

34 Hoksidan kin omicipe sni kinhan ate ekta itawankanhde wahde kte cin owakitpani. Taku síca ate ahinhpaye kte cin he wanmdake kte cin tawatenwaye sni, *eya*.

WICOWOYAKE 45.

1 Hehan Josep tona en najinpi kin owasin wicitokam ihduhe kta okihi sni, qa panyanhan hewicakiya, Wicašta owasin mitokapa tanhan tankan iyayapo. Hecen Josep hunka wanjin wicaye cin en sdonye içiye çehan, tuwedan kici yanke sni.

- 2 Hehan Josep hotaninyan ceya. Unkan Egupton he nahonpi, Paro tiyohnaka tawa kin nakun nahonpi.
- 3 Unkan Josep hunka wanjin wicaye cin hewicakiya, Josep he miye ce, Ate nahahin ni he ? eya ; tuka cincu itokapa tanhan yuŕinyayapi qa ayuŕtapi kte cin okitpanipi.
- 4 Unkan, Ihopo, mitan kiyedan upo, Josep hunka wanjin wicaye cin, ewicakiya. Unkan kiyadan hinajinpi. Unkan, Josep nisunka Egupton ekta wiyopeyayapi qon he miye ce.
- 5 Qa dehan wiyopemayayapi kin on iyokiŕin iŕiyapi ŕnipo, qa icanniye kiciyapi ŕnipo. Wanikiye makage kta e Wakantanka u makiya ce.
- 6 Wanna waniyetu nonpa wicaakihan maka kin ohna, qa tokata waniyetu zaptan yumdupi kte ŕni, qa woksapi kte ŕni ce.
- 7 Taku maka akan ecicihnakapi, qa taku iyotan tehika etanhan ni ciyapi kta e Wakantanka nitokam u makiya ce.
- 8 Wanna deci u makiyapi kin he niyepi ee ŕni. Wakantanka hee *hecon* qa, Paro ate maye a tiyohnaka tawa kin owasin itancan makiyapi, qa Egupta makoce kin owancaya wowindag wicawaye kta e emahde.
- 9 Inahnipo, qa ate ekta itawankannde hdapi, qa heciyapo ; Nicinkŕi Josep hecen eya ; Wakantanka Egupta owasin yuhe makiya ce. Iho kun en mahi qa yutehan ŕni wo.
- 10 Kinhan Goŕen en ounyaye a mitan kiyedan yaun kta ce. Niye nicinca qa nicinca cinca wicayapi, tahin wanuyanpi nitawa, pte nitawa ko, qa taku duhe cin owasin ;
- 11 Kinhan wo ciu kta : nahahin tokata waniyetu zaptan wicaakihan kte cin heon, yau ŕni kinhan, okini niwahpanica kta nace, niye yati ohnaka kin, qa taku nitawa ko owasin.
- 12 Ihopo, niiŕtapi kin misunka Benjamin iŕta kin nakun mii kin on ociciyakapi kin he wanmayahdakapi.
- 13 Egupta en wowitan mduhe owasin, qa taku wandakapi ko owasin, ate okiyakapo, qa inahnian ate deciya kun aupo ;
- 14 Eye a sunkaku Benjamin poskin yuze a ceya. Unkan Benjamin cincu tahu kin akan ceya.
- 15 Hehan hunka wanjin wicaye cin owasin i iwicaputake a wicahduha ceya. Unkan cinye wicaye cin kici wohdakapi.
- 16 Wanna Josep hunka wanjin wicaye cin hipi ce, eya oyakapi kin, Paro tiyohnaka tawa kin nahonpi, qa Paro ookiye wicaye cin ko he waŕte dakapi.
- 17 Qa Paro Josep heciya, Hunka wanjin wicayaye cin hecen ewicakiya wo. Kaken econpo ; wanuyanpi duhapi kin qin wicakiyapi, qa Kanan makoce kin ekta hdapo.

- 18 Qa niyatepi tiyohnaka nitawapi kin ko owasin, icupi qa en maupo ; kinhan Egupta makoce kin en taku wašte yuke cin ciçupi kta qa, taku iyotan wašte makoce aicage cin yutapo.
- 19 Qa niye hecen econ nišipi. Nitašicecapi nitawinpi ko on Egupta makoce kin etanhan canpahmihma yuha hdapi, qa niyatepi kin kici wicahduha upo.
- 20 Tuka wahpaye duhapi kin he awakicinpi šnipo. Taku wašte Egupta makoce ohnaka kin owasin nitawapi kta ce.
- 21 Unkan Israel cinca kin ecen econpi, qa Josep canpahmihma wicaqu, Paro eya econ ši qon iyecen, waneya tahepi yutapi kta nakun wicaqu.
- 22 Qa owasin wokoyake iyohi wicaqu, tuka Benjamin mazaska opawinge yamni qu, qa wokoyake owasin zaptanptan nakun.
- 23 Qa šuktanka šonšonna wikcemna taku Egupta aicage cin qin wicakiya, qa nakun šuktanka šonšonna wiye wikcemna wamnaheza, qa aguyapi span, woyute atkuku waneya yuhe kte cin qin wicakiye ça, hena owasin atkuku kin en ahde wicaši.
- 24 Qa hunka wanjin wicaye cin kihde wicaši qa, Ihunhan tahepi taku ayakinicapi kin, ewicakiya. Unkan hdapi.
- 25 Egupta makoce kin etanhan itawankanhde hdapi, qa Kanan makoce kin ate yapi Jakob yanke cin ekta kipi.
- 26 Qa heciyapi, Josep nahahin ni, qa Egupta makoce kin owasin yuha ce, eyapi. Unkan ceṭonwicahda qa wacin hnuni.
- 27 Hehan Josep oie ewicakiye cin owasin okiyakapi, qa canpahmihma ohna iye ihdaka ye kta e Josep ahde wicaši qon hena wanyake çehan, Jakob ate yapi cante kin kimdeza.
- 28 Qa Israel heya, Iho henana Josep micinkši nahahin ni. Maṭe šni wanhdag mde kta ce.

WICOWOYAKE 46.

- 1 Hehan Israel ihdaka, iye taku tawa ko owasin, qa Beršeba en hi qa, atkuku Izak taku wakan da kin wošnapı wakiyušna.
- 2 Unkan Wakantanka hanyetu wowanyake wan en Israel heciya, Jakob, Jakob, eya. Unkan, De miye ce, eya.
- 3 Unkan, El niyate ta Wakantanka kin he miye. Egupta en de kte cin ikope šni wo. Hen oyate tanka icaḥ ciciye kta ce.
- 4 Miye Egupta ekta ciyahna kun mde ça ake acihdi kta, qa Josep nape kin ništa kin akan aniputake kta ce, eya.
- 5 Unkan Jakob Beršeba etanhan inajin. Unkan Israel cinkši wicaye cin tašicecapi, qa tawicupi, qa Jakob ate yapi kin, henakiya canpahmihma Jakob aupı kta e Paro wicaqu qon, hena ohna yuha yapi.

- 6 Qa tawanuyanpi, qa tawahpayapi, taku Kanan makoce kin en tonpi kin ikikcupi qa Egupta ekta ihdaka ipi. Jakob taku tawa ko owasin ;
- 7 Cinksi wicaye cin, qa sanpa cincapi, cunksi wicaye cin qa cinhintku cunksi wicayapi kin, taku tawa ko owasin, Jakob kici Egupta ekta ipi.
- 8 Israel cinca kin Egupta en ipi kin, decen ewicakiyapi, Jakob qa iye cinca, Jakob cinhintku tokapa kin Ruben eciyapi.
- 9 Qa Ruben cinksi wicaye cin Hanok, qa Palu, qa Hezron, qa Karmi.
- 10 Unkan, Simeyon cinksi wicaye cin ; Jemuel, qa Jamin, qa Ohad, qa Jakin, qa Zohar, qa Saul, he Kanani winohinca wan ton.
- 11 Unkan Lewi cinksi wicaye cin Gerson, qa Qehat, qa Merari.
- 12 Unkan Juda cinksi wicaye cin Er, qa Onan, qa Sela, qa Perez, qa Zera ; tuka Er Onan kici Kanan makoce kin en tapi ; qa Perez cinksi wicaye cin Hezron, qa Hamul.
- 13 Unkan Isakar cinksi wicaye cin Tola, qa Puwa, qa Job, qa Simron.
- 14 Unkan Zebulon cinksi wicaye cin Sered, qa Elon, qa Jalel.
- 15 Hena Leha cinksi wicaye qa Jakob kiciton, Aram Mdaye kin hen, cunwintku Dina nakun, cinca wica winyan ko wicanagi owasin wikcemna yamni sanpa yamni.
- 16 Gad cinksi wicaye cin Zipeyon, qa Hagi, qa Suni, qa Ezebon, Eri, qa Arodi, qa Areli.
- 17 Unkan Aser cinksi wicaye cin Jimma, qa Jiswa, qa Jiswi, qa Beriya, qa Sera tawinohtinpi. Unkan Beriya cinksi wicaye cin Heber, qa Malkiyel.
- 18 Hena Zilpa, Laban iye cunwintku Leha qu qon, cinksi wicaya. Hena Zilpa Jakob kiciton wicanagi ake sakpe.
- 19 Rahel Jakob tawicu kin cinksi wicaye cin Josep, qa Benjamin.
- 20 Unkan Josep cinksi wicaye cin Manase, qa Ephraim hena Asenat, Potipera On otonwe kin en woşnapi kage cin he cunwintku, Egupta makoce kin en Josep kiciton.
- 21 Unkan Benjamin cinksi wicaye cin, Bela, qa Bered, qa Asbel, Gera, qa Naaman, Eri, qa Ros, Mupim, qa Hupim, qa Ared.
- 22 Hena Rahel cinksi wicaye qa Jakob kiciton, wicanagi owasin ake topa.
- 23 Unkan Dan cinksi wicaye cin Husim.
- 24 Unkan Neptali cinksi wicaye cin Jahzel, qa Guni, qa Jezer, qa Silem.
- 25 Bilha, he Laban iye cunwintku Rahel qu qon, hena Jakob kiciton, wicanagi cinksi wicaye cin owasin sakowin.
- 26 Wicanagi Jakob nite kin etanhan inanpapi, (Jakob cinca tawicupi kin hena yawapi sni) Jakob kici Egupta ekta ipi kin wicanagi owasin wikcemna sakpe sanpa sakpe.
- 27 Unkan Josep cinksi wicaye cin Egupta en kicitonpi kin, wicanagi

nonpa. Jakob wicowazi Egipta en hi qon, wicanagi kin owasin wikcemna śakowin.

28 Wanna Jakob Juda tokata ye śi, Josep en, Gośen etu itkokim u kte cin heon. Unkan Gośen makoce kin en hipi.

29 Unkan Josep śuktanka canpahmihma koyag wicakiye a atkuku Israel itkokipe kta e Gośen etu i, a wanhdake a poskin hduze a tahu akan tehan ceya.

30 Unkan Israel Josep heciya, Nahahin yani kin, nitohnake kin he wanciyaka, heon dehan maa eta tehike kte śni.

31 Unkan Josep cinye wicaye cin, a atkuku tiyohnaka tawa kin owasin hewicakiya ; Wahde a Paro owakimdake kta, Hunka wanjin wicawaye cin, a ate tiyohnaka tawa kin Kanan makoce kin en unpi qon, wanna en mahipi.

32 Qa wicata kin wanuyanpi wihan wicakiyapi kin hecapi, wicata wanuyanpi yuha unpi kin iś hecapi, a tahinca pte ko, a taku tawapi kin owasin awicahipi.

33 Hecen tohan Paro nicopi, a winiwangapi a, Wicohtani tukte wanji opiniiya he ? eye cinhan ;

34 Hehan kaken ehapi kta ce, Hokśidan unyaduhapi kin, wanuyanpi awanwicunyakapi ece ; unkiś uncistinpidan ehan tanhan heuncapi, a hunkake wicunyanpi kin hecen opiiyapi ece, ehapi kta ; hecinhan Gośen en idotankapi kta. Tona wanuyanpi wihan wicakiyapi kin hena owasin Egipton wahte wicadapi śni.

WICOWOYAKE 47.

1 Hehan Josep hde a Paro okiyake a, Ate a hunka wanjin wicawaye cin, a tahinca tawapi, pte tawapi ko, a taku tawapi owasin, Kanan makoce kin etanhan upi, a wanna Gośen makoce kin en ahi tipi. eya.

2 Qa hunka wanjin wicaye cin etanhan wicata zaptan iwicacu, a Paro itokam ewicahde.

3 Unkan, Wicohtani tukte wanji opiniiyapi he ? Paro Josep hunka wanjin wicaye cin ewicakiya. Unkan, Hokśidan nitawa wanuyanpi wihan wicunkiyapi, unkiś hunkake wicunyanpi koya, Paro eciyapi.

4 Qa, Makoce kin en ounyanpi kta e unhipi ce, Kanan makoce kin heciya wicaakihan wanna tehika ; wanuyanpi unhapi ko tukudan yutapi śni, peji wanica ; heon ceunniiyapi Gośen makoce kin en hokśidan nitawa unkiyotankapi kte, Paro eciyapi.

5 Unkan Paro Josep heciya, Wanna niyate a hunka wanjin wicayaye cin

niye en hipi ;

6 Egipta makoce kin owasin nitokam wanka. Makoce kin tukte iyotan wašte kin, hen niyate hunka wanjin wicayaye cin ko iyotanke wicakiya wo. Gošen makoce kin he en iyotankapi kte ça, wanjiksi minihecapi sdonwicayaya hecinhan, hena wanuyanpi mitawa kin awanyag wicakiya wo.

7 Unkan Josep iye atkuku Jakob u kiye ça Paro itokam ehde. Unkan Jakob Paro yawašte.

8 Unkan, Waniyetu anpetu tona yani he ? Paro Jakob eciya.

9 Unkan, Waniyetu anpetu ihdaka wani kin hena waniyetu opawinge sanpa wikcemna yamni. Waniyetu anpetu wani kin hena tonana qa šikšica. Hunkake wicawaye cin waniyetu anpetu ihdaka nipi qon iyehan wani šni ce, Jakob Paro eciya.

10 Hehan Jakob Paro yawašte, qa Paro itokapa tanhan kinanpa.

11 Unkan Josep atkuku hunka wanjitku ko, makoce tukte iyotan wašte kin, Rameses makoce kin he en, iyotang wicaši, qa Egipta makoce kin en maga wicaqu, Paro hecen econ ši qon, he iyecen.

12 Qa Josep atkuku, hunka wanjin wicaye cin, qa atkuku wicowazi kin owasin, taku yutapi wicaqu, tašiceca iyacinyan aguyapi wicaqu.

13 Unkan wicaakihan kin iyotan tehika aye cin, heon makoce kin owancaya aguyapi wanica. Wicaakihan kin on Egipta makoce, Kanan makoce ko, awihnnuni aya.

14 Unkan aguyapi opetonpi kin he Josep wiyopeye cin, hecen mazaska taku Egipta makoce kin en iyeyapi, Kanan makoce en nakun mazaska iyeyapi kin owasin, Josep kamna, qa mazaska kin Paro ti kin en ahiju.

15 Unkan wanna Egipta makoce kin etanhan, Kanan makoce kin etanhan ko, mazaska kin wanna henakeca, hehan Egipton Josep en ahi qa, Aguyapi unqupo. Tokeca e nitokam untapi kta he ? Ecin mazaska wanna unnicapi kin, eciyapi.

16 Unkan, Wanuyanpi duhapi kin maqupo. Mazaska wanice cinhan nitawanuyanpi kin on aguyapi ciçupi kta ce, Josep eya.

17 Unkan tawanuyanpi kin Josep en ahipi ; šuktanka, tahinca, pte, qa šuktanka šonšonna, henakiya on, waniyetu kin he aguyapi wicaqu.

18 Waniyetu kin he wanna ihunipi, qa waniyetu iyokihe ake Josep en hipi qa, Itancan anaunkihmapi kte šni, mazaska wanna ecaca wanice ça woteca wanuyanpi *owasin* itancan duha. Unyuhapi kin itokam takudan unkohdaptapi šni, tancan maga kici ehake hecehnana unhapi.

19 Tokeca awiunhnunpi kin wandake kta unkiye, maga unhapi ko owasin he ? Opeuntonpo unkiye unkitamagapi koya. Aguyapi unyaqupi kinhan Paro wowindag unyanpi kta, unkiš maga unhapi koya. Taku unkojupi kta

nakun unqupo ; kinhan unnipi qa unṭapi kte śni, qa unkitamagapi kin hewoskan wanke kte śni ce, eyapi.

20 Hecen Egupton wicaakiḥan kin on iyotan iyekiyapi, qa wicašta otoiyoḥi owasin tamagapi kin wiyopekiyapi ; unkan Josep Egupta makoce kin owasin Paro opekiciton, qa Paro makoce kin owasin tawa ya.

21 Qa oyate kin he Egupta makoce ihanke kin anokatanhan otonwe tokeca ohna iyotang wicakiya.

22 Wośnapi kagapi kin henana tamagapi kin wiyopeyapi śni ece. Wośnapi kagapi kin taku yutapi onḡe Paro wicaqu ece, qa taku Paro wicaqu kin he yutapi, heon tamagapi kin opeton śni.

23 Qa Josep oyate kin hewicakiya, Ihopo nakaha opecitonpi niyepi nitamagapi ko, Paro tawa niyanpi kta. Ihopo de wojupi kin ciḡupi qa makoce kin oyajupi kta.

24 Qa kaketu kta, tohan taku aicaga eca, owasin idutapi qa iyutapi tomtom yahduhapi kta, hetanhan ake maga kin woyajupi qa he yatapi kta, niye, nitaśicecapi qa tona yatipi kin ohna yakonpi kin hena *owasin* he yutapi kta ; tuka iyutapi izaptanptan kin owasin Paro yaqupi kta ce, eya.

25 Unkan, Itancan ni unyayapi iyounnicipipi kte ; hecen Paro wowindag unyanpi kta.

26 Unkan wicoope kin de Josep ope wicakiya, qa anpe dehan hececa, Egupta makoce kin en wiyutapi izaptanptan kin Paro tawa ya. Wośnapi kagapi tamagapi kin henana hecapi śni, henana Paro tawa ye śni.

27 Unkan Israel Egupta makoce kin ohna, Gośen makoce kin en iyotanke ḡa, maga yuhapi qa icagapi qa nina ihduotapi.

28 Qa Jakob Egupta makoce kin en waniyetu ake śakowin ni, hecen Jakob anpetu tawa kin waniyetu ni un kin, waniyetu opawinge sanpa wikcemna topa sanpa śakowin henakeca.

29 Qa anpetu en Israel ṭe kte cin he wanna aśkadan, hehan cinhintku Josep kico qa, Ceciciya iyocicipi kinhan ninape miceca kin ihukuya kiyugata wo ; kinhan wowaonśida wowicake ko ecamiyecon, qa Egupta makoce kin en mayahnake kte śni ;

30 Tuka Egupta makoce kin etanhan amayade ḡa, ate wicawaye cin ohna hnakapi kin ohna mayahnake kta ; hecen hena om imunke kta ce, eciya. Unkan, Miś token ehe cin ecen ecamon kta ce, eya.

31 Unkan Wakantanka cajeyate ḡa emakiya wo, eya. Unkan Wakantanka cajeyate ḡa eciya. Unkan Israel can sagye ipa kin akan pamahdedan wocekiye eya.

WICOWOYAKE 48.

- 1 Unkan hena owasin iyohakam hehan, Iho niyate wayazanka ce, Josep eciyapi, qa cinhintku napin Manaše Epraim kici hduha ekta i.
- 2 Unkan Jakob okiyakapi, Nicinkí Josep niye en u ce, eyapi. Unkan Israel wakişag içiye ça owinja kin akan iyotanka.
- 3 Qa, El Iyotan waşake cin Kanan makoce kin heciya Luz ekta miye en ihdutanin, qa mayawaşte,
- 4 Qa hemakiya, Miye wawicahiye cicage, yuota ciciye ça, oyate obe ota cicage ça makoce kin de nakun ciçu kta, nicinca nihakam upi kte cin owihankeşniyan tawapi kta ce, emakiya.
- 5 Qa wanna nicinca nonpa, Egupta makoce kin en nicitonpi, Egupta ekta niye en cihi şni kin itokam, Epraim Manaše kici, hena mitawa ce, Ruben Şimeyon kici iyecen, tawa wicawaye kta ce.
- 6 Qa taku nitawa kin hena iyohakam nicitonpi kte cin hena nitawapi kta, tuka cinye wicayapi kin eciyatanhan, makoce tawapi kin en caş wicatonpi kta.
- 7 Miye Aram Mdaye kin etanhan wau qon, hehan Rahel makıta, Kanan makoce kin en, canku ohna Eprata etanhan makoce iyutapi kin wanjidand, qa heciya owehnaka Eprata, Betlehem eyapi kin hee, canku kin ikiyedand, eya.
- 8 Hehan Israel Josep cinkí wicaye cin wanwicahdake ca, Dena tuwepi he ? Jakob Josep eciya.
- 9 Unkan, Wakantanka cinca deciya maqu kin dena eepi, Josep atkuku kin eciya. Unkan, Ceciciya ce, napin makau wo, wicawahdawaşte kta ce, eya.
- 10 Wanna Israel wicahinca heca on iştá gonga, wanyaka okitpani. Unkan en awicahi, unkan poskin wicahduze ça i iwicaputaka.
- 11 Israel Josep heciya, Niite kin eqeş wanwahdake kte cin epce şni, unkan wanna icah wicayaye cin hena, Wakantanka wanwicahdag mayan.
- 12 Unkan Josep hupahu kin etanhan inanpe wicaye ça, ite kin maka kin etkiya patuja.
- 13 Qa napin wicahduza, Epraim Josep nape etapa kin en, Israel catka kin ektakiya, qa Manaše iye nape catka kin en, Israel etapa kin ektakiya ; hecen atkuku kin en awicai.
- 14 Unkan Israel kiyugate ça nape etapa kin Epraim pa kin aputaka, he hakakta tuka, qa nape catka kin Manaše pa kin akan he tokapa tuka, nape yukcanyan ye kiya.
- 15 Qa Josep yawaşte qa heya, Wakantanka ate wicawaye Abereyam Izak kici itokam manipi qon, he Wakantanka matonpi kin ehantanhan anpe dehanyan won mayan kin ;

- 16 Ohnihde un kin taku síca owasin etanhan opemakiton kin he, hokšípidan kin wicayawašte kte, micajeyan qa ate wicawaye cin Abereyam Izak kici icajeyan ewicakiyapi, qa maka kin ohna nina ihduotapi kte, eya.
- 17 Unkan atkuku nape etapa kin Epraim pa kin aputake cin he Josep wanyake ça, síce dake ça atkuku nape kin yuze ça, Epraim pa kin etanhan Manaše pa kin etkiya ye kiye kta tuka ;
- 18 Qa, Hecetu síni ate, de tokapa kin ee. Iye pa kin nape enitapa kin on aputaka wo, Josep atkuku kin eciya.
- 19 Unkan sdonwaya. Micinkší sdonwaya ce. He nakun oyate kta qa he tanka kta, qeyaś sunkaku iyotan tanka kta qa cinca wicaye kte cin oyate ota kta ce ;
- 20 Eye ça anpetu kin hehan wicayawašte qa, Nicajeyan Israel ihdawaštepi qa, Wakantanka Epraim qa Manaše iyecen icah niyan nunwe, eyapi kta ce, eya. Hecen Epraim Manaše itokam cajeyata.
- 21 Hehan Israel Josep heciya, Anagoptan wo. Miye maṭe kta, tuka Wakantanka nicicapi, qa ate wicayayapi tamakocepi kin ekta anihdapi kta.
- 22 Qa miye makoce onśpa, Amori nape kin etanhan mitacanhpi mitinazipe kin iyahna on iwacu qon, he hunka wanjin wicayaye cin iyakapa ciṭu, eciya.

WICOWOYAKE 49.

- 1 Qa Jakob cinkší wicaye cin wicakico qa heya, Mniciyapo, tokata anpetu yeye cin token nihyahdepi kte cin ociciyakapi kta.
- 2 Jakob cinkší wicaye cin witaya upi qa anagoptanpo. Israel niyatepi kin he anakicigoptanpo.
- 3 Ruben micinkší tokapa kin he niye, mitowaśake mitowookihi tokaheya kin iyotan wicimdeza iyotan suta.
- 4 Mini iyecen nihduhepicaśni, heon initancan kte śni. Niyate ohehde kin ayadi qa hehan mitowinja kin duśapa ce.
- 5 Śimeyon Lewi kici hunka wanjin kiciyapi. Tacanhpipi kin wipe wicakisa kin heepi.
- 6 Canteptanyanpi qehan wicaśta wan ktepi, qa iyokipi iṭiyapi kta e oinatake wan oqapi ; heon wohdakapi kin en minagi kin ye kte śni, qa omniciye tawapi kin en wowitan mitawa un śni nunwe.
- 7 Wicocanniye tawapi kin yaśicapi nunwe, waditaka ce, towahaniṭidapi kin he nakun, wohitika ce ; Jakob en yukinukan wicawakiye ça Israel ohna yuomden iyaye wicawakiye kta.
- 8 Juda niye hunka wanjin wicayaye cin niyatanpi kta. Ninape kin toka niyanpi tahu kin akan niyate cinkší wicaye cin nitokam patujapi kta.

9 Mnaja cincadan wan Juda heca. Wicayapotapi kin etanhan micinkí nayajin. Mnaja iyecen canpeška makehde wanka, qa mnaja wiye wan iyecen, tuwe he pahice kta he ?

10 Juda etanhan maza sagye yutokanpi kte śni, tuka cadotahedan wicašta yatapi yuke kta, Śilo hi kin hehanyan, qa iye en oyate kin mniciyapi kta.

11 Taśunke śonśonna hastanhanka iyuwi kin en iyakaškahan, qa taśunke śonśonna cinca kin hastanhanka wašte hinca iyuwi kin ekta, taonhdohda kin miniśa on hdujaja kta qa taśina hastanhanka we kin on.

12 Ísta kin miniśa on śa kte a hi kin pte asanpi on ska kta.

13 Zebulon miniwanca huta kin en ti qa iye en wita wata oihuni kta, qa Zidon *otonwe kin* hehanyan yuhe kta.

14 Isakar śuktanka śonśonna waśake cin heca wan, conkaške otahedan makan wanka.

15 Okihpapi kin he wašte kin, qa makoce kin wiciyokipi kin he wanyake a qin kta e taħpa kin qu, hecen wayaka wicohtani kin econ.

16 Dan Israel wicoun wan iyecen taoyate kin wicayaco kta.

17 Wamduška wan canku tukte ohna yapi kte cin ohna naiihbe a, śuktanka siyete kin yahtaka on tuwe akan yotanke cin itunkam hinhpaye kta Dan hecece kta.

18 Jehowa woyuške nitawa kin awape.

19 Ozuye wan Gad azuye kta, tuka ihakam iye azuwicaye kta.

20 Aśer taaguyapi kin wašte qa wicašta yatapi woyute wiciyokipi kin wicaqu kta.

21 Neptali tamdoka kiyuškapi kin heca iapi wicimdeza ia.

22 Josep adetka waicahya ece, adetka waicahya mini hdoka icahda, taadetka kin conkaške iyadipi.

23 Wanhinkpe yuhapi kin hena iyaonpapi qa kigepi qa śicaya kuwapi.

24 Tuka tinazipe kin sutaya han, Jakob waśagye cin towaśake kin eciya tanhan nape isto kin yuwaśakapi ce. Heciya tanhan Israel taimnija *qa* wo wicaqu kin hee ;

25 Niyate Taku wakan da kin eciya tanhan. Iye oniciye a Iyotan waśake cin iye niyawašte kta, maħpiya wankan tanhan wowašte kin, ośbe kin ihukuya wanke cin wowašte kin, aze tezi ko wowašte kin niu kte.

26 Niyate wicayawašte kin he wawokihika, he ohinniyan he cin isanpa. Paha owihanke wanice cin taku wiciyokipi aicage cin he Josep pa kin en, qa tuwe hunka wanjin wicaye cin etanhan yukinukanpi qon, pesdete kin en unpi kte.

27 Benjamin śunktokeca yaśesa heca anpao kte cin hehanyan yute kta ece ; htayetueca wawicaki kin pamni kta.

- 28 Israel wicoun ake nonpa kin hena owasin heepi, qa hecen ate yapi kin ewicakiye ça wicahdawašte, otoiyohi towašte kin iyecen wicayawašte.
- 29 Qa hecen wahokonwicakiya, Miś oyate mitawa kin en ope mayanpi kta, ate wicawaye cin om emahnakapo, imnija ohdoka maga wan Epron Heti kin tawa qon en un kin, he en.
- 30 Kanan makoce kin etu, Mamore itokam, Makpela maga kin en imnija ohdoka wanke cin he ohna. Abereyam wicašta ohna hnakapi kte cin he tawa kta e maga kin he Epron Heti kin he opekicaton.
- 31 Hen Abereyam tawicu Sara kici wicahnakapi, hen Izak tawicu Rebeka kici wicahnakapi, qa hen miś Leha wehnaka.
- 32 Maga kin he imnija ohdoka ohna wanke cin ko, Het cinca wicaye cin opewicakicaton qon, ewicakiya.
- 33 Hecen Jakob cinkśi wicaye cin wahokonwicakiye cin ayaştan qehan, siha kin ohehdepi kin en ehdaku qa ға ; unkan taoyate kin ekta okipe yapi.

WICOWOYAKE 50.

- 1 Hehan Josep atkuku ite kin akan ehpeiçiye ça i iputake ça ceya.
- 2 Qa Josep taokiye peji huta wicaştapi kin atkuku yuhwin śni waştemna ye wicaśi. Unkan peji huta wicašta kin Israel waştemna yanpi ; anpetu wikcemna tom hecakiconpi.
- 3 Tona yuhwin śni waştemna yanpi eca hehanyan yuştanpi ece. Unkan Egupton anpetu wikcemna śakowin Jakob aceyapi.
- 4 Anpetu hena aceyapi kin wanna iyokiptapi, hehan Josep Paro tiyohnaka tawa kin hewicakiya, Wanna wašte mayadapike cinhan *miye makapi qa* Paro itokam hecen eyapo.
- 5 Ate hecen emakiya, Iho miś wanna mašte kta ce. Kanan makoce kin heciya ohna hnakapi wan miçiçe cin he ohna mahnaka wo, eye ça Wakantanka cajeyate maśi. Unkan tokin wanna itawankanhde mde ça ate wehnaken, kinhan wahdi kta.
- 6 Unkan Paro ayupte ça, Itawankanhde ye ça niyate kihnaka wo, konza eye niśi qon iyecen.
- 7 Unkan Josep atkuku kihnake kta e itawankanhde ye ça Paro taokiye kin owasin opapi, tiyohna hunka wicayapi, qa Egupta makoce kin hunka wicayapi ko owasin.
- 8 Qa Josep tiyohnaka tawa, qa hunka wanjin wicaye cin atkuku tiyohnaka tawa owasin ; taśiceca qa tahinca, pte ko yuhapi kin henana Gośen makoce kin en kihnakapi.
- 9 Canpahmihma qa wicašta śuktanka akan yotankapi ko opapi, hecen

oşpaye tanka hinca.

10 Unkan Atad tahocoka kin ekta ipi he Jordan akasanpa wanka, qa heciya woceye tanka anpetu şakowin atkuku kin nina aceyapi.

11 Unkan makoce wojutipi kin Kanani hena Atad tahocoka ohna ceyapi kin he wanyakapi qa, Egupton de nina ceyapi ce, eyapi ; heon oyanke kin he Egupton oceyapi kin eciyapi, he Jordan akasanpa wanka.

12 Hecen cinkşı wicaye cin token econ wicaşı qon, ecen ecakiconpi.

13 Qa cinkşı wicaye cin, hena Kanan makoce kin ekta hduha yapi, qa Makpela maga kin en innija ohdoka wanke cin he ohna kihnakapi ; Mamore itokam ; maga kin he Abereyam Epron Ĥeti kin etanhan opekicon wicašta ohnahnakapi tawa kta e hecon.

14 Unkan Josep Egupta ekta hda, atkuku hnakapi kin iyohakam ; iye hunka wanjin wicaye cin, qa tona iye om atkuku hnakapi kta e itawankanhde yapi qon owasin.

15 Unkan Josep cinye wicaye cin ate yapi kin ęe cin, heon wikopapi qa heyapi, Okini Josep şicaya unkuwapi qa iye en taku şica ecaunkiconpi qon iş owasin tokiçon kta.

16 Qa hecen Josep okiyag wicaşıpi ; Niyate ęe cin itokam hecen wahokonunkiyapi.

17 Josep kaken eyakiyapi kta, Tokin nicinye wahtanipi kin wicayecicajujun. Şicaya ecaniconpi tuka niyate ta Wakantanka kin wowindag wicaye cin wahtanipi qon kajujun ; eya ce, eyapi. Unkan Josep wicoie okiyakapi kin on ceya.

18 Hehan Josep cinye wicaye cin iye en ipi, qa itokam ehpeiciyapi qa, Iho unyaduhapi ce, eciyapi.

19 Unkan, Ihnuhan ininihanpi kin. Miş Wakantanka hemaceca he ?

20 Niyepi kin şicaya ecamicon wacanipi, tuka Wakantanka waşte kta e cin, oyate ota ni wicaye kta anpe dehan iyecen hecon ce.

21 Heon nakaha inihanpi şnipo. Miş wo ciçupi kta niyepi nitaşicecapi ko, ewicakiye ęa, hecen wicakihna qa cantowicahnaka.

22 Josep Egupta en ounyan ; iye atkuku tawicoun koya, qa Josep waniyetu opawinge sanpa wikcemna ni.

23 Qa Josep Epraim cinca takojatpaku, qa sanpa cinca wanwicahdake ęa nakun Manaşe cinhintku Makir cinca kin hena Josep şiyoto akan wicahduha.

24 Hehan Josep hunka wanjin wicaye cin hewicakiya ; Miş maęe kta tuka Wakantanka niyepi en nihipi kte ęa, makoce kin de etanhan itawankanhde ye niyanpi kta ; makoce wan Abereyam Izak Jakob ko konza ewicakiye cin he ekta.

25 Qa Josep Israel cinca kin konza ewicakiya, Awicakehan Wakantanka niyepi kin en nihipi kta, qa mihi kin detanhan ayahdapi kta ce, eya.

26 Hehan Josep ta iyaya. Wanna waniyetu opawinge sanpa wikcemna hehan. Unkan iye *tancan* yuhwin sni wastemna yanpi, qa Egupta makoce kin en can ohna knakapi wan ohna hnakapi.